

শিঃ বঙ্গুর খয়মুলা



অজেয় বায়



নিউ বেগুন প্রেস (প্রাঃ) লিঃ
৬৮, কালেক্টর স্ট্রীট
কলকাতা-৭০০ ০৭৩

Mr. Basur Formula
A Mystery Story by
Ajeya Ray

প্রকাশক :

শ্রীপ্রবীরকুমার মজুমদার

নিউ বেঙ্গল প্রেস (প্রাঃ) লিঃ

৬৮ কলেজ স্ট্রীট

কলিকাতা-৭০০ ০৭৩

প্রথম প্রকাশ :

আষাঢ়, ১৩২৫—ইং জুন, ১৯৮৮

প্রচ্ছদ ও অলংকরণ

রাহুল মজুমদার

মুদ্রক :

বি. সি. মজুমদার

নিউ বেঙ্গল প্রেস (প্রাঃ) লিঃ

৬৮ কলেজ স্ট্রীট

কলিকাতা-৭০০ ০৭৩

অজেয় রায় হলেন প্রকৃত বিজ্ঞান-ভিত্তিক কিশোর উপন্যাসের জগতে একজন বিশিষ্ট লেখক। এঁর গল্পে সরস ভাষায় প্রকৃত বৈজ্ঞানিক তথ্য পরিবেশন করা হয়। এগুলি পাঠ্যপুস্তকের চাইতে বেশি মূল্যবান, কারণ ছেলেমানুষরা আনন্দ এবং আগ্রহের সঙ্গে পড়ে। এঁর প্রচ্ছন্ন রসিকতাগুলিও পরম উপভোগ্য। আজগুবি গল্প লেখা বরং সহজ, কিন্তু তথ্যসমৃদ্ধ আনন্দের উপাদানের অনেক বেশি দাম।

এই বইটিকে আমি স্বাগত জানাই এবং আশা করি তরুণ পাঠকরাও পড়ে এক অন্য জগতের আনন্দ পাবে। ইতি—

আঃ লীলা মজুমদার

১৫ই জুন

১৯৮৮

মঙ্গু

আমাজনের গহনে

ফেরমন

boirboi.net

এক

সুনন্দ ও অসিত মনমরা। কারণ তাদের মামাবাবু অর্থাৎ প্রাণীবিজ্ঞানী প্রোফেসর নবগোপাল ঘোষকে পাখিতে পেয়েছে।

পাখি নিঃসন্দেহে জীবজগতের এক অভিনব সৃষ্টি। সুনন্দ বা অসিতের পাখি সম্বন্ধে জানবার আগ্রহ নেই এমন নয়। বিচিত্র তাদের পালকের রঙ, আচার-আচরণ, আকৃতি। কোনো কোনো পাখির ডাক কি মধুর! সৃষ্টির আদিমকালে কি আশ্চর্য কৌশলে সরীসৃপ থেকে বিবর্তনের ফলে এই খেচর গোষ্ঠির উদ্ভব। শুধু ভারতবর্ষে আছে পঁচাত্তরটি পক্ষিপরিবার। তাদের প্রায় বারোশো গোষ্ঠিতে ভাগ করা হয়। এবং তাদের মধ্যে তিনশো রকম পাখি ঘাঘাবর—বিদেশ থেকে উড়ে আসে এখানে শীত কাটাতে। এ সব তত্ত্ব বিলক্ষণ আকর্ষণীয়। সুনন্দর কাছে না হলেও অসিতের কাছে খবরগুলো নতুন বটে। তাই প্রথমটা সে আগ্রহ নিয়ে শুনত। তবে কোনো বিষয়ে বাড়াবাড়ি কি ঠিক! কিন্তু মামাবাবুর ক্ষেত্রে তাই যে ঘটছে।

মামাবাবুর স্বভাবের বৈশিষ্ট্য হচ্ছে যে তিনি অত্যন্ত ঝোঁকাল। যখন যা ধরেন, একবারে চূড়ান্ত করে ছাড়েন।

পাখি সম্বন্ধে মামাবাবুর জ্ঞান যথেষ্টই ছিল। তবে এখন একেবারে বুঁদ হয়ে গেছেন। দিনরাত ওই নিয়ে পড়াশুনা করছেন, ভাবছেন ও আলোচনা করছেন। খাবার সময়ে পাখির কথা, বেড়াতে বেরলে পাখির চিন্তা। চোখ দুটো তখন পায়ের কাছের জমি ছেড়ে মদ্যাই আকাশে বাতাসে টেলিগ্রাফের তারে, জানলার কার্নিশে বা গাছের ডালে পাখি খুঁজে বেড়ায়। অণ্ড কোনো বিষয়ে কথাবার্তা বলা তিনি প্রায় ছেড়েই দিয়েছেন।

মামাবাবুর ইদানীং কিছু নতুন বন্ধু জুটেছিল। সব পক্ষিপ্রেমিক।

এদের হাবভাবই আলাদা। যখন তখন এদের আগমন। সবচেয়ে বেশি আসতেন বঙ্কিম হাজারা। অবশ্য তারা সুনন্দ অসিতের ধাত বুঝে ফেলেছিল। বুঝতে পেরেছিল এই দুইজনের পক্ষিপীতি মোটেই গভীর নয়। তাই সুনন্দদের সামনে পড়লে সামান্য ভদ্রতা করা ছাড়া আলাপের আগ্রহ দেখাত না। তাদের আলোচনার বৈঠক বসত। কখনো সবাই বেরতেন ফিল্ড স্টাডি করতে। অর্থাৎ মাঠে ঘাটে দূরবীন দিয়ে নানান পাখির স্বভাব চরিত্র লক্ষ্য করা। এদের মধ্যে অনেকেই অবশ্য পক্ষিবিদ হিসেবে বেশ নামী। তবে বঙ্কিমবাবু এ লাইনে নেহাত আনকোরা। সুনন্দ তাঁর নাম দিয়েছিল ভক্ত বঙ্কিম। ভদ্রলোককে নিয়ে তারা হাসাহাসি করত।

মামাবাবু মাইশোর গিয়েছিলেন পক্ষিবিদদের এক সম্মেলনে মাস তিনেক আগে। সেখান থেকে মাদ্রাজে বেদনথঙ্গল পক্ষিনিবাস দেখতে যান। পথে বঙ্কিমবাবুর সঙ্গে আলাপ হয়। কৌতূহলী বঙ্কিমবাবু ছুটো দিন মামাবাবুর সঙ্গে পাখি দেখে কাটান। ক্রমে ক্রমে সমস্ত ব্যাপারটায় ভদ্রলোকের এমন দারুণ আগ্রহ জন্মায় যে কলকাতায় ফেরার পরেও তিনি মাঝে মাঝে প্রফেসর ঘোষের কাছে এসে পাখি সম্বন্ধে জ্ঞান আহরণ করে চলেছেন।

বঙ্কিমবাবুর সর্বক্ষণই একটু ব্যস্ত সমস্ত ভাব। যদিও ব্যস্ত হবার কারণ তাঁর নেই। সুনন্দরা শুনেছে ভদ্রলোকের পয়সা এবং অবসর দুই-ই অচেল। চাকরি বা ব্যবসা করেন না। বাড়ির ভাড়া, শেয়ার ইত্যাদি প্রচুর পৈত্রিক সম্পত্তির আয়ে ভর করে দিব্যি কাটাচ্ছেন। স্ত্রী-পুত্রের ঝামেলাও নেই, কারণ তিনি অবিবাহিত। তবে ভারি অমায়িক লোক।

চেহারা সাধারণ। মুখ চোখে খুঁত না থাকলেও কৈশিষ্ট্য নেই। অবশ্য রঙ ফর্সা। মাঝারি লম্বা। মাঝারি স্বাস্থ্য। মাথাভর্তি কাঁচা-পাকা চুল এলোমেলো হয়ে থাকে। কিন্তু ভদ্রলোক পোশাকের ব্যাপারে বেশ শৌখীন। চওড়া পাড়ের তাঁতের ধুতি, পাঞ্জাবী, কাঁধে

পাট করা চাদর, পায়ে পাম্প শু্য দিয়ে সর্বদা ফিটকাট থাকেন।
 ধূমপান করেন দামী ব্রিগের সিগারেট। দাড়ি গৌফ কামানো পরিষ্কার
 মুখখানি হাসি হাসি, তবে কিঞ্চিৎ বোকা বোকা। লোকটির
 কথাবার্তাতেও মোটেই বুদ্ধির ছাপ নেই। যদিও মামাবাবুর কাছে
 হাজির হলেই তাঁর হাতে থাকে এক ভালুম সেলিম আলির লেখা
 বাউসি অফ ইণ্ডিয়া এবং অত্যন্ত সিরিয়াস মুখে তিনি অগ্রদের, বিশেষত
 মামাবাবুর কথা শোনেন ও বিজ্ঞের মতো ঘাড় নাড়েন।

তবে ভদ্রলোকের এক মহৎ গুণ আছে অস্বীকার করা যায় না।
 মামাবাবুর কাছে এলে প্রায়ই এক বাস্তব উত্তম কড়া পাকের সন্দেশ
 উপহার দিয়ে যান। এ নাকি গুরুদক্ষিণা। বলা বাহুল্য সন্দেশের
 ভাগ সুনন্দ অসিতেরও জোটে।

যাহোক মামাবাবুর এই নতুন নেশায় সুনন্দ অসিতের অবস্থা
 কাহিল হয়ে উঠেছে। আরও রাগের কারণ, মামাবাবু প্ল্যান
 করেছিলেন ভুটান বর্ডারে যাবেন অতি দুর্লভ গোল্ডেন লেংগুর অর্থাৎ
 সোনালী হনুমান স্বচক্ষে দর্শনের চেষ্টায়। আপাতত 'সে কথা মনে
 করিয়ে দিলেও কানে তুলছেন না। বলছেন—'হবে হবে। তাড়াছড়োর
 কি?'

স্কুন্ধ সুনন্দ রাগে ফুঁসছিল। শেষে একদিন অসিতের বাড়ি এসে
 বলল, 'চ আমরা দু'জনে 'কোথাও 'ঘুরে আসি। পাখি পাখি শুনে
 বাড়িতে কান ঝালপালা হয়ে গেল। আর তিষ্ঠানো যায় না।'

হয়তো সত্যি তারা দু'জনে কয়েকদিনের মধ্যেই কলকাতা ছেড়ে
 বেরিয়ে পড়ত, যদি না সেদিন হঠাৎ কুনালের আবির্ভাব হোত।

অসিতের বাড়ির বৈঠকখানায় একটি মুখ উঁকি মারল।

অসিত দেখল প্রথমে। ডাকল—'আরে কুনাল যে? আয় আয়!
 তিতরে। অনেক দিন পরে।'

কুনাল মিত্র ছিল সুনন্দ ও অসিতের কলেজের সহপাঠি। চার

বছর তারা এক সঙ্গে পড়েছে। খুব ভাব ছিল তাদের। গ্র্যাজুয়েশনের পর তাদের ছাড়াছাড়ি হয়। কুনাল পড়তে যায় রসায়ন বিভাগ। পাশ করে সে বছর চারেক এক কারখানায় কেমিস্ট হিসেবে চাকরি করে তারপর কাজ ছেড়ে দিয়ে স্বাধীন ব্যবসা শুরু করে। নানা রকম জিনিস তৈরি করতে থাকে। প্রথম দিকে সাবান, কলমের কালি, মার্জিন ইত্যাদি তৈরির পর এখন গোটা ছুই ওষুধও বানাচ্ছে। শুধু অণুর আবিষ্কৃত ফরমুলায় তৈরি জিনিস নয়, নিজেও সে গোটা কয়েক ছোটখাটো ওষুধ উদ্ভাবন করেছে। কুনালের সঙ্গে সুন্দদের আজকাল দেখা হয় কম। তবে পুরনো টানটা বজায় আছে।

কুনাল ঘরে ঢুকল। ওর চেহারায় বেশ চেকনাই এসেছে। পরনে দামী জামা-প্যান্ট। অর্থাৎ ছু-পয়সা কামাচ্ছে আজকাল। সুন্দরা খুশি হল। বেচারি অনেক কষ্ট করেছে গোড়ায়।

অসিত বলল, 'চা খাবি তো? আর সঙ্গে সেই রকম আলুর চপ চলবে নাকি? না, ওসব ছেড়ে দিয়েছিস?'

'খুব চলবে।' চেয়ারে বসতে বসতে বলল কুনাল—'তবে বুঝলি কিনা ওসব বস্তু একা খেয়ে সুখ নেই। সঙ্গে জুৎসই আড্ডার পাট তো ভাই উঠে গেছে। কতবার ভাবি আসব তোদের কাছে, মোটে সময় পাই না।'

'ভাল ভাল', সুন্দ হাসল, 'মানো তোর ব্যবসার শ্রীবৃদ্ধি হচ্ছে। তোর মিত্র কেমিক্যালস্-এর উই পোকা তাড়াবার ওষুধটা তো খুব নাম করেছে। বিজ্ঞাপন দেখলাম কাগজে।'

'হ্যাঁ, ওটা বেশ চলছে।'

চা এবং গরম আলুর চপ এল।

সুন্দ লক্ষ্য করল। কুনাল মাঝে মাঝে কেমন আনমনা হয়ে পড়ছে। ও যেন কিছু বলতে চায় কিন্তু বলে উঠতে পারছে না। এক সময় সুন্দ বলে ফেলল, 'হ্যারে কুনাল, শ্রেফ আড্ডা দিতে এসেছিস? না কোনো কাজ-টাজ আছে?'

কুনাল একটু অস্বস্তি আমতা করে বলল, 'হ্যাঁ, মানে একটা অদ্ভুত ব্যাপার হয়েছে। ভাবছিলাম তোদের পরামর্শ নিই।'

কথাটা বলে কুনাল একটুক্কণ চুপ করে রইল। বোধ হয় মনে মনে গুছিয়ে নিল ঘটনাগুলো। তারপর বলতে শুরু করল—

মাসখানেক আগে আমি একটা চিঠি পাই। ইংরেজীতে লেখা। জনৈক মিস্টার বাসু লিখেছেন। বক্তব্য—তিনি ধানের রান্ফুসে পোকা মারার একটি রাসায়নিক ঔষুধ আবিষ্কার করেছেন। উপযুক্ত দাম পেলে ঔষুধের ফরমূলাটি তিনি বিক্রি করতে প্রস্তুত। এ বিষয়ে আমি আগ্রহী হলে যেন তাঁকে জানাই।

'চিঠি পেয়ে ধাঁধায় পড়লাম। বাজে ফরমূলা বিক্রি করে ঠকানোর চেষ্টা এ লাইনে নতুন নয়। প্রথমে ভেবেছিলাম দরকার নেই উৎসাহ দেখিয়ে। কিন্তু ধানের রান্ফুসে পোকাকার উল্লেখে আমি মত বদলালাম। এগুলি এক জাতীয় খুব ক্ষুদ্র কীট। চাষীরা নাম দিয়েছে রান্ফুসে পোকা। ধানের শীষ একটু পুষ্ট হলেই এই পোকা তার শাঁস খেয়ে নেয়। ফলে শস্যদানা ছিবড়ে হয়ে ফসল নষ্ট হয়ে যায়। এই পোকাকার উৎপাত ভারতে আগেও কয়েকবার দেখা গেছে, এক রকম কীটনাশক ব্যবহার করে তাকে দমন করাও সম্ভব হয়েছে—কিন্তু এবার পুরনো ঔষুধে কোনো কাজ দিচ্ছে না। রান্ফুসে পোকা ভীষণ তাড়াতাড়ি বংশ বৃদ্ধি করে। ফলে ছ ছ করে ছড়িয়ে পড়ছে। পশ্চিম বাংলায়—চব্বিশ পরগনা-হুগলীতে ছড়িয়েছে। আবার গুণচি দক্ষিণ ভারতেও কয়েক জায়গায় উপদ্রব শুরু হয়েছে। কোনো রকমে তাকে বাগ মানানো যাচ্ছে না। উজাড় হয়ে যাচ্ছে ধান। এমন চললে নির্ঘাত ছুড়িফ লাগবে।'

'এত খবর তুই পেলি কোথায়? কাগজে তো কিছু বেরয় নি।' জিজ্ঞেস করল সুন্দর।

'কাগজে কি আর সব খবর দেয়। এখন রোগটার সবে শুরু। আমি এসব খবর রাখি কারণ এখন আমি ফসলের ক্ষতিকারক রোগের

ওষুধ তৈরির চেষ্টা করছি। এ দেশে কোন্ ফসলের কি কি শত্রু, কী তাদের প্রতিকারের ওষুধ—এ সব খবর রাখতে হচ্ছে তাই। মাস ছয় হল মিত্র কেমিক্যালস্ টমাটো গাছের শত্রু শুঁয়ো পোকা মারার একটা নতুন কীটনাশক ছেড়েছে বাজারে। একজন কৃষি-বিজ্ঞানীর আবিষ্কার। আমার কারখানার ল্যাবরেটরিতে রিসার্চ করেছেন। সুতরাং ভেবে দেখলাম মিঃ বাসুর অফার একবার যাচাই করে দেখি। যদি সত্যি ওষুধটা কাজের হয় এবং বাসুর চাহিদা আমার সাথে কুলোয়, তাহলে আমার বরাত ফিরে যাবে। অতএব আমার আগ্রহ জানিয়ে উত্তর দিলাম।

চারদিন পরে রেজিস্ট্রি পার্শেলে এক প্যাকেট পাউডার এল। নমুনা পাউডার জলে গুলে কি ভাবে ক্ষেতে ছিটতে হবে তার নির্দেশও রয়েছে ইংরেজি টাইপে। মিঃ বাসু লিখেছেন—ওষুধের ফলাফল পরীক্ষা করে সন্তুষ্ট হলে যেন আমি চিঠিতে জানাই। তারপর সাফাতে ব্যবসায়িক কথাবার্তা হবে।

‘একস্পেরিমেন্ট করে আশ্চর্য ফল পেলাম। তক্ষুণি জানালাম বাসুকে, আমি ফরমুলা কিনতে চাই।

‘মিঃ বাসুর নির্দেশ মতো চৌরঙ্গীর কুতুব হোটেলে সতের নম্বর ঘরে ছুপুর ছুটোর সময় তাঁর সঙ্গে দেখা করলাম। প্রথম দর্শনে বেশ হকচকিয়ে গেলাম। আশা করেছিলাম এক খোলামেলা বৈজ্ঞানিককে দেখব, কিন্তু তার বদলে দেখলাম রীতিমত রাসভারি সাহেবী কেতার এক মানুষ। গায়ের রং যদিও শ্যামবর্ণ কিন্তু পরনে নিখুঁত স্যুট টাই। কুচকুচে কালো চুল টেনে ব্যাকব্রাস করে আঁচড়ানো, মোটরগোঁক, মুখে পাইপ, চোখে চওড়া ফ্রেমের চশমা। চশমার কাচের রং ঈষৎ নীল। উপরের পাটির সামনের ছুটি দাঁত একটু বড় ও উঁচু। অল্প কুঁজো হয়ে সামনে বুঁকে হাঁটেন, কথা বললেন বেশিরভাগ ইংরেজিতে গম্ভীর গলায় চিবিয়ে চিবিয়ে। হালকা গল্লের ধার কাছ দিয়েও গেলেন না। সোজা কাজের কথায় এলেন। এক গোছা টাইপ করা কাগজ এগিয়ে

দিলেন—সলিউশন্ বানানোর পদ্ধতি। ফরমুলার জগ্ৰ দর হাঁকলেন
বিশ হাজার টাকা। টাকাটা এক সঙ্গে দিতে হবে।

‘আমি আশ্চর্য হয়ে জিজ্ঞেস করেছিলাম ফরমুলার ওষুধের সব
বিক্রি করতে চাইছেন কেন? রয়ালটি রাখলে যারা এই ফরমুলায়
ওষুধ বানাবে তাদের কাছ থেকে ওই ওষুধ বিক্রির আয়ের একটা ভাগ
বরাবর পেয়ে যাবেন আপনি। মনে হয় তাতে মোট আরও বেশি অর্থ
পেতে পারবেন ভবিষ্যতে।

‘উনি বললেন, আমার এখনই অনেক টাকার দরকার বছর বছর
একটু একটু করে পেলে চলবে না। যদি এ ব্যবস্থায় আপনার আপত্তি
থাকে তাহলে আর কথা বলে লাভ নেই।

‘আমি বললাম, আমার আর কি আপত্তি। এরপর আমি
কাগজপত্রগুলো একটু দেখতে চাইলাম। ভদ্রলোক আমাকে ঘরে
রেখে বেরিয়ে গেলেন। ফিরলেন ঘণ্টাখানেক বাদে। লেখার একটা
অংশ ঠিক বুঝতে পারছিলাম না—তাই জিজ্ঞেস করলাম।

‘বাসু ভুঙ্গ কুঁচকে পড়লেন জায়গাটা। তারপর বললেন, জায়গাটা
উনি আরও পরিষ্কার করে লিখে পাঠাবেন পরে।

‘এর পর আরও কয়েকটা প্রশ্ন করলাম। কিন্তু তখন একটাও
প্রশ্নের জবাব দিলেন না। প্রশ্নের জায়গাগুলো দাগ দিয়ে নিলেন।
বললেন, কয়েকদিন পরেই আমি উত্তর পাব। তারপর কাগজ-পত্র
গুটিয়ে সেদিন বিদায় নিলেন।

‘তিন দিন পরে আবার সেই কাগজ-পত্রগুলো এল আমার কাছে
ডাক মারফৎ। প্রশ্নের জায়গাগুলো টুকে সুন্দরভাবে ব্যাখ্যা করা
হয়েছে। পাউডারটা হাতে-কলমে বানাতে আমার কোনো অসুবিধাই
হয় নি। এবার হবে ফাইনাল কথাবার্তা।’

ব্যাপারটা ইনটারেস্টিং। তবু তেমন রহস্যের ইশারা পাচ্ছিল না
সুন্দর বা অসিত। সুন্দর বলল, ‘অর্থাৎ সলিউশনের ফরমুলাটা তুই
কিনছিস?’

‘পাগল। অতটাকা আমি পাব কোথায়?’

‘তবে আর কথা বলার দরকার কি? চিঠিতে তোর মত জানিয়ে দিলেই তুই চুকে যায়।’

কুমাল বলল, ‘আসলে আমি বাসুর সঙ্গে যোগাযোগটা নষ্ট করতে চাইছি না। তাই বুলিয়ে রেখেছি।’

‘কেন?’

‘মানে আমার একটা সন্দেহ হচ্ছে।’

‘কি?’

‘কীটনাশক ওষুধটার প্রকৃত আবিষ্কারক হয়তো মিঃ বাসু নন; অন্য কেউ।’

‘কি করে বুঝলি?’ প্রশ্ন করে অসিত।

‘পাউডারটা বানাবার পদ্ধতি সম্পর্কে প্রথম ছোটো প্রশ্ন আমি সত্যি ভাল বুঝতে না পেরে জিজ্ঞেস করেছিলাম। কিন্তু উনি একটারও জবাব দিলেন না। মানে, মনে হল যেন উনি ধোকায় পড়েছেন। কেমন খটকা লাগল আমার। তখন পরের প্রশ্নগুলো করলাম নেহাৎ সোজা সোজা।’

একসপেরিমেন্টের বিভিন্ন স্টেজে কেমন রেজাল্ট পাওয়া গেছে? গ্রীমে এবং শীতের ধানে কি একই ডোজ ওষুধ ব্যবহার করতে হবে? ধানের ক্ষতিকারক আর কি কি পোকাকার উৎপাতে এই ওষুধ কাজে দেবে ইত্যাদি। সেগুলোরও জবাব পেলাম না। যে লোক ওষুধের আবিষ্কারক তার পক্ষে ও সব প্রশ্নের তক্ষুণি উত্তর না দেওয়ার কোনো কারণ নেই। তাছাড়া এত দামী ওষুধের সর্বস্বত্ব অবধি বিক্রি করে দিতে চায় এ খুব অস্বাভাবিক। আর বৈজ্ঞানিক হিসাবে মিঃ বাসুর নামও কখনো শুনি নি আগে।’

‘অর্থাৎ বলতে চাস, বাসু কারো ফরমুলা চুরি করেছে?’ বলল সুনন্দ।

‘হতে পারে। আবার এমনও হতে পারে আসল আবিষ্কার কর্তাটি কোনো বিশেষ কারণে আড়ালে থাকতে চায়। বাসু তার হয়ে

কথাবার্তা চালাচ্ছেন। মোট কথা আমি ব্যাপারটা তলিয়ে দেখতে চাই। কিন্তু কি ভাবে এগোব বুঝতে পারছি না।’

সুনন্দ অসিত এতক্ষণে বুঝল কুনালের আগমনের উদ্দেশ্য। তারা পরস্পরে চোখাচোখি করল। মনে মনে উত্তেজিত হয়ে উঠল। অনেকদিন নিষ্কর্মা থেকে রোমাঞ্চকর কিছু একটা করার ইচ্ছেয় ছটকট করছিল দু’জনে।

‘তোর সঙ্গে মিঃ বাসুর আবার কবে দেখা হচ্ছে?’ জানতে চাইল অসিত।

‘আসছে কাল। বিকাল চারটে। স্থান হোটেল কুতুব। সতেরো নম্বর ঘর। মিঃ বাসু চিঠিতে জানিয়েছেন।’

ঘরের মধ্যে মিনিট তিনেক নিস্তব্ধতা। সবাই ভাবছে। অসিত একবার উঠে বাড়ির ভিতরে গিয়ে এক রাউণ্ড চায়ের বন্দোবস্ত করে এল।

‘বাসু কি ওই হোটেলে থাকেন?’ সুনন্দ মুখ খুলল।

‘না।’ বলল কুনাল, ‘আমি খোঁজ নিয়েছিলাম। উনি হঠাৎ হঠাৎ এসে ওঠেন এবং একদিনের বেশি থাকেন না কখনো।’

‘ওকে চিঠিপত্র লিখতিস কোন্ ঠিকানায়?’

‘ওই হোটেল কুতুব। কেয়ার অফ ম্যানেজার। মাঝে মাঝে উনি নিজে বা ওঁর লোক এসে ডাক নিয়ে যায়।’

‘হুম।’ সুনন্দ মাথার চুল টানছে। অর্থাৎ ভাবছে। তারপর দৃঢ়স্বরে বলল, ‘কাল আমরা ওকে ফলো করব। আমি আর অসিত। উনি হোটেল থেকে বেরোলেই। নিশ্চয় উনি বাড়ি ফিরবেন। ওঁর আস্থানার খোঁজ পেলে তারপর ওঁর পরিচয় বা গতিবিধি জানা অসুবিধে হবে না। তখন জানা যাবে ওই ফরমুলার আসল আবিষ্কারকটি কে?’

বিকেল প্রায় সাড়ে পাঁচটা।

হোটেল কুতুবের গেট থেকে শ' খানেক হাত দূরে ফুটপাথ ঘেঁষে দাঁড়িয়ে একটা ছাইরঙা অ্যামবাসাডর, তার মধ্যে বসে আছে তিনজন—সুনন্দ, অসিত এবং তাদের বন্ধু মির্টু।

গাড়িখানা মির্টুর। মিঃ বাসুকে ফলো করার জন্য গাড়িটা চাওয়া হয়েছিল মির্টুর কাছে। বলা হয়েছিল কেবল গাড়িটা পেলেই চলবে। সুনন্দ নিজেই ড্রাইভ করবে। বাসু যে ধরনের লোক, মনে হচ্ছে ট্রামে বাসে ঘুরবেন না, ট্যাক্সি বা নিজের গাড়িতে যাওয়া-আসা করবেন। মির্টু কিন্তু কেসটা শুনেই লাফিয়ে উঠল। সে বেজায় অ্যাডভেঞ্চার-প্রিয় ডানপিটে। বলল সে স্বয়ং হবে গাড়ির চালক। তার খুব ইচ্ছে ছিল একজোড়া নকল দাড়ি গৌফ লাগিয়ে আসে, কিন্তু সুনন্দ বারণ করল। হঠাৎ খুলে টুলে গেলে বিক্রী কাণ্ড হবে।

তিনজোড়া চোখ আটকে আছে হোটেল কুতুবের গেটে।

অধীর উত্তেজনায় ঘন ঘন সিগারেট টানছে মির্টু। গেট দিয়ে কাউকে বেরোতে দেখলেই চট করে আঁকড়ে ধরছে স্টিয়ারিং হুইল। চারটে বাজতে ঠিক পাঁচ মিনিট আগে হোটেলে ঢুকেছে কুনাল। বেরিয়েছে চারটে পঞ্চাশে। গেটের বাইরে এসে একবার আড় চোখে দেখে নিয়েছে সুনন্দদের। তারপর হনহন করে চলে গেছে উণ্টো পথে।

ভাগ্য ভাল তাই বেশিক্ষণ অপেক্ষা করতে হল না। ছ'টা নাগাদ কুতুবের গেট দিয়ে বাইরে এসে দাঁড়াল যে ব্যক্তি তাকে কুনালের বর্ণনা অনুযায়ী মিঃ বাসু বলে চিনতে ভুল হল না। বাসুর হাতে একটা পেট-মোটা ফোলিও ব্যাগ। তিনি এদিক-ওদিক চেয়ে একটা ট্যাক্সি ডাকলেন এবং তাতে চড়ে বসলেন। সঙ্গে সঙ্গে মির্টুর গাড়ি স্টার্ট দিল।

মিঃ বাসুর ট্যাক্সি চলল চিত্তরঞ্জন অ্যাভিনিউ ধরে। প্রায় পঞ্চাশ হাত পিছনে থেকে মির্টুর গাড়ি তাকে অনুসরণ করল।

সামনের ট্যাক্সি সোজা শ্যামবাজার পাঁচ মাথার মোড়ে পড়ল।

তারপর টালাব্রীজ পার হয়ে ব্যারাকপুর ট্রাঙ্ক রোড ধরল। অতএব বাসুর গন্তব্যস্থল কলকাতা শহরের বাইরে কোনো শহরতলী অঞ্চলে।

ডিসেম্বরের মাঝামাঝি। দিন ছোট তাই তখনই সন্ধ্যা নেমে গেছে। মিন্টুর সুবিধেই হল। অন্ধকারের জন্ম সামনের আরোহী টের পাবে না যে কেউ তাকে অনুসরণ করছে। ট্যাক্সির পিছনের কাচের ভিতর দিয়ে মিঃ বাসুর টুপি দেখা যাচ্ছে। নিশ্চল হয়ে বসে আছেন তিনি। আরও ছুখানা একই রকম ট্যাক্সি বাসুর ট্যাক্সির আগু-পিছু যাচ্ছিল। ফলে বাসুর ট্যাক্সি কোনটা খেয়াল রাখা শক্ত হচ্ছিল। সিঁথির মোড়ে ট্র্যাফিক কন্সটেবল হাত দেখাল গাড়ি থামাতে, একটা ট্যাক্সি বেরিয়ে যেতে পারল। মিন্টু গাড়ি থামাতে হঠাৎ আবার একসিলারেটর চেপে গতি বাড়িয়ে পেরিয়ে গেল মোড়। এবং তড়িৎবেগে যে ট্যাক্সিটা এগিয়ে গিয়েছিল তার পিছু ধরল। সামনের গাড়ির নম্বর দেখে সুনন্দ বুঝল ওটা মিঃ বাসুর ট্যাক্সি। অদ্ভুত নজর মিন্টুর, ঠিক লক্ষ্য করেছে।

অসিত চলল, 'ট্র্যাফিক পুলিশটা কিন্তু আমাদের গাড়ির নম্বর টুকে নিল। ফাইন করবে।'

'করুক গে।' মিন্টু নির্বিকার।

আরও প্রায় পনেরো মিনিট হু হু করে ছুটল গাড়ি সিধে রাস্তা বেয়ে।

একটা বড় চৌমাথা। চারপাশে দোকান। অনেক লোকের ভিড়। রাস্তার পাশে এক সিনেমা হল। জায়গাটা ছাড়িয়েই মিঃ বাসুর ট্যাক্সি থেমে গেল।

মিন্টুর গাড়ি তাকে পাশ কাটিয়ে খানিক এগিয়ে থামল পথের ধারে। গাড়িতে বসে তারা দেখল মিঃ বাসু নামলেন—ট্যাক্সির ভাড়া মিটিয়ে দিলেন—এবং বাঁ পাশে একটা সরু পথ ধরে হেঁটে অদৃশ্য হলেন।

মিন্টু তার গাড়ি ঘুরিয়ে সেই রাস্তার কাছে গেল।

পাকা রাস্তার খান্নিকটা অংশ খোঁড়া। মেরামতি হচ্ছে। এই কারণেই বাসুর ট্রাঙ্কি ঢোকেনি। তারাও নেমে পড়ল।

অসিত বলল, 'কোথায় এসেছে বুঝছিস? এটা পানিহাটি। এ রাস্তাটা সোজা গেছে গঙ্গার ধার অবধি।'

'কি করে জানলি?' সুন্দ জিজ্ঞেস করল।

'এ জায়গা আমি চিনি। একটু দূরেই যে আমার সেজমাসির বাড়ি। এর পরের বাস স্টপেজে নামতে হয়। কতবার এসেছি।'

তিনজনে পথটা ধরে এগোল। গাড়ি রইল বড় রাস্তায়।

পথ প্রায় অন্ধকার। অনেক দূরে দূরে এক একটা ল্যাম্পপোস্ট রয়েছে বটে, কিন্তু কুয়াশা ভেদ করে আলোর জ্যোতি খুব আবছা। শীতের রাতে ছ' ধারের বাড়িতে জানলা দরজা বন্ধ। নিস্তব্ধ লোকালয়। ছ-একজন মাত্র পথিক আপাদমস্তক মুড়ি দিয়ে হন্ হন্ করে চলে গেল। তিনজনে দ্রুত পা চালাল—যতটা সম্ভব নিঃশব্দে। তীক্ষ্ণ দৃষ্টিতে দেখতে দেখতে চলল পথের ধারের বাড়িগুলো—সামনে কেউ যাচ্ছে কিনা।

অল্প এগিয়েই চোখে পড়ল মিঃ বাসুর চলমান মূর্তি। তাঁর জুতোর শব্দ উঠছে—খট খট খট।

মিষ্ট, অসিত, সুন্দ গা ঢাকা দিয়ে এগোল।

রাস্তাটা অবশ্য সিধে নয়। অনেক এঁকেবেঁকে গেছে। হঠাৎ থামলেন বাসু। তক্ষুণি সুন্দরা গাছের ছায়ায় মিলিয়ে গেল। পুরনো লোহার গেট খোলার কর্কশ আওয়াজ। বাসু ঢুকলেন একটা বাড়িতে।

তিনজনে গুটি গুটি এগোল।

যে বাড়িতে মিঃ বাসু ঢুকেছেন সেটা পাঁচিল ঘেরা একটা দোতলা বাড়ি। বাড়ির সামনে অনেকখানি বাগান। বাড়ির যতটুকু অংশ চোখে পড়ছে, কোনো আলোর চিহ্ন নেই। কোনো লোকজনেরও সাড়া পাওয়া যাচ্ছে না। তিনজনে গেটের সামনে থেকে সরে এল।

কী করা যায় ?

খানিকক্ষণ অপেক্ষা করা যাক ।

বাড়ির পাঁচিল ঘেঁষে চল্লিশ-পঁয়তাল্লিশ মিনিট দাঁড়িয়ে রইল তিনজনে । কুনকনে বাতাস বইছে । হাত মুখ যেন অসাড় হয়ে যাচ্ছে । এ ভাবে কীতক্ষণ থাকা যায় ? তাছাড়া বে-পাড়া । দৃশ্যটা কেউ দেখে ফেললে ফল মোটেই ভাল হবে না । অসিত বলল, 'বাড়িটা তো চিনে গেলাম, এখন চল আমার মাসির বাড়িতে রাত কাটাই । সকালে এসে খোঁজ-খবর করা যাবে ।'

প্রস্তাবটা মনঃপূত হল সবার । কিন্তু মিন্টু থাকতে পারবে না । তার কাজ আছে খুব সকালে । অত্যন্ত ক্ষুণ্ণ মনে সে বিদায় নিল । কারণ তার ধারণা কাল একটা জোর অ্যাডভেঞ্চার জুটে যাবে সুনন্দের বরাতে । সে প্রস্তাব দিয়েছিল—'চল ঢুকি পাঁচিল টপকে । বাড়িটা সার্চ করি । হয়তো সেই বৈজ্ঞানিককে বন্দী করে রেখেছে ।'

কিন্তু তার বন্ধুরা এমন বেআইনী কারবারে রাজি হল না । সত্যি যে কাউকে এখানে আটক করে রাখা হয়েছে তার প্রমাণ কৈ ? হয়তো বাসু স্বয়ং সেই বৈজ্ঞানিক । অথবা বৈজ্ঞানিকের বন্ধু । অতএব সে ক্ষেত্রে বিনা অনুমতিতে পরের বাড়িতে প্রবেশের অপরাধে নির্ঘাৎ হাজতবাস ভোগ করতে হবে । আপাতত মিঃ বাসুকে ঘাঁটিয়ে লাভ নেই । কাল বরং এসে খোঁজ করা যাবে ।

পরদিন বেশ সকাল সকাল সুনন্দ অসিত এসে মিঃ বাসুর বাড়ির সামনে হাজির হল । কি ভাবে বাসুর সঙ্গে আলাপ জমানো যায়, কোন্ ছুতোয় বাড়ি ঢুকবে ইত্যাদি যুক্তি করছে তারা, এমন সময় একজনকে বাগানের রাস্তা ধরে গেটের দিকে আসতে দেখে তারা ভীষণ অবাক হয়ে গেল । আগন্তুক—শ্রীবঙ্কিম চন্দ্র হাজারা ওরফে ভক্ত বঙ্কিম ।

বঙ্কিমবাবুও সুনন্দদের দেখতে পেয়েছিলেন । হাতজোড় করে বললেন—'আরে কি ব্যাপার, আপনারা এখানে?'

সুনন্দরা হকচকিয়ে গেল। কোনো রকমে সামলে নিয়ে অসিত বলল, 'আমরা বেড়াতে এসেছি। এই কাছেই আমার মাসির বাড়ি। আপনি এখানে থাকেন নাকি?'

'পার্মানেণ্টলি নয়। মাঝে মাঝে। বাড়িটা ভাড়া নিয়ে রেখেছি। গঙ্গার ধারে, দিব্যি খোলামেলা। কয়েকদিন কাটিয়ে যাই। আসুন ভিতরে।'

অসিত একটু ইতস্ততঃ করে বলল, 'আমরা ভেবেছিলাম বাড়িটা অস্থায়ী এক ভদ্রলোকের।'

'কেন?' বঙ্কিমবাবু রীতিমত অবাক।

'মানে কাল সন্ধ্যায় ফিরছিলাম এই পথে। দূর থেকে দেখলাম কোর্ট-প্যান্ট পরা এক ভদ্রলোক ঢুকলেন এই বাড়িতে, তাই।'

'ওঃ, বুঝেছি। মিঃ বাসুকে দেখেছিলেন।' বঙ্কিমবাবু হাসলেন। 'এ কিন্তু অস্থায়ী। যে কাউকে আমার এ বাড়িতে ঢুকতে দেখলে তাকে মালিক বলে ধরে নেবেন।'

অসিত লজ্জিত হয়।—'না মানে শীতের সন্ধ্যা। এমন অসময়। বন্ধু-বান্ধবের কথা মনে হয় নি। ভাবলাম আপিস ফেরত কেউ। এ দিককার লোকদের তো চিনি না ভাল।'

বঙ্কিমবাবু বললেন, 'মিঃ বাসু আমার ঠিক বন্ধু নন, সামান্য পরিচিত বলতে পারেন।'

'ও তাহলে নিশ্চয় জরুরী কাজ ছিল। তাই অমন সময়ে। খুব পাক্সা সাহেব।'

'হুঁ, তা বটে। ভদ্রলোক আমায় বড্ড জ্বালাচ্ছেন।'

'কেন?'

'আমাকে বিজনেস পার্টনার করতে চান। তাই নিয়ে ঝোলাঝুলি। যত বলছি ও সব ছাঙ্গামা আমার পোষাবে না। কালকেও অনেকক্ষণ বকবক করে গেলেন।'

'ভদ্রলোক থাকেন কোথায়?'

‘কলকাতায়।’

‘কিসের ব্যবসা? সুন্দ জানতে চায়।’

‘তু-তিন রকম প্ল্যান আছে ভদ্রলোকের। আপাতত গেঞ্জির কল করতে চান? কিন্তু ধরনটা ঠিক বুঝি না।’

‘ওনার ঠিকানাটা দিতে পারেন?’ বলল সুন্দ।

‘কেন?’ হাজরাবাবু ভুরু কুঁচকোলেন।

‘মানে আমার এক বন্ধুর খুব ব্যবসার ঝাঁক। ছোটখাটো কিছু ফাঁদতে চায়। পার্টনার খুঁজছে। মিঃ বাসুর খবরটা শুকে দেওয়া যেতে পারে, সুন্দ উৎসাহিত হয়ে বলল।’

বঙ্কিমবাবু মাথা নাড়লেন। ‘সরি। ওঁর ঠিকানা তো জানি না। শ্যামবাজারে কোথাও। দিয়েছিলেন অ্যাড্ৰেস, হারিয়ে ফেলেছি।’

‘আবার যদি আসেন অ্যাড্ৰেসটা নিয়ে রাখবেন দয়া করে।’

‘বেশ নেব। তবে আর আসবে বলে মনে হয় না। সাফ ‘না’ করে দিয়েছি এবার। আপনার বন্ধুর নাম-ঠিকানা?’

সুন্দ তৎক্ষণাৎ যে নাম-ঠিকানাটা জানাল তা কুনালের নয়— অশোক নামে তাদের এক বন্ধুর। অশোক ইঞ্জিনিয়ার। সম্প্রতি বাড়ি বানাবার কনট্রাকটারি করছে।

বঙ্কিমবাবু বললেন, ‘চলুন একটু চা-টা খাবেন। আমার অবশু এখানে লোকজন নেই। একটি বুড়ো মালী ভরসা।’

ভিতরে যেতে যেতে সুন্দ লক্ষ্য করল বাগানে যত্নের বড় অভাব। ভাল ভাল ফল-ফুলের গাছের পাশে আগাছা জন্মেছে।

বাড়ির কোলেই গঙ্গা। চওড়া বাঁধানো ঘাট নেমেছে ধাপে ধাপে।

নিচের তলায় একটা মস্ত হল ঘরে সুন্দরী বসল। ঘরে পুরনো আমলের কিছু টেবিল চেয়ার।

চা আর অমলেট খাওয়ালেন বঙ্কিমবাবু।

সুনন্দ অসিত একটু লজ্জিত হল ভদ্রলোককে বিব্রত করার জন্য ।
উনি কিন্তু ভারি খুশি । প্রোফেসর ঘোষের ভাগনে, অতএব তারা
খাতিরের লোক । খানিক পরে শুরু করলেন পাখির কথা ।—‘উঃ
ব্যাপারটা কিন্তু সাংঘাতিক ইন্টারেস্টিং, মশাই । নতুন একখানা বই
কিনেছি পাখি সম্বন্ধে—দাঁড়ান দেখাচ্ছি—’

অমনি অসিত তড়াক করে লাফিয়ে উঠল । ‘হেঁ হেঁ, আজ থাক ।
একটু কাজ আছে । আর এক দিন আসব ।’

বঙ্কিমবাবু নিরাশ ভাবে বললেন, ‘কিন্তু আমি যে আজই চলে
যাচ্ছি ছুপুরে ।’

‘কোথায় ?’

‘কলকাতা হয়ে রাজগীর, বুদ্ধগয়া, পাটনা, বেনারস লম্বা ট্যার ।
বায়নাকুলার সঙ্গে নেব—বার্ড ওয়াচিং করা যাবে সুযোগ মতো ।’

‘আপনি খুব বেড়ান ?’

‘হ্যাঁ, ওই আমার নেশা । বেশি দিন এক জায়গায় টিকতে পারি
না । দূরে যেতে না পারলে, অন্তত ধারে কাছেই ঘুরে আসি ।’

বিকেলে সুনন্দ অসিত ফিরল কলকাতায় ।

বাসে যেতে যেতে অসিত বলল, ‘দেখ সুনন্দ, আমার মনে হচ্ছে
বঙ্কিমবাবু মিঃ বাসু সম্বন্ধে সত্যি কথা বলেন নি ।’

‘কেন ?’

যথেষ্ট পরিচয় আছে অথচ তাঁর ঠিকানাটা অবধি রাখেন নি । এ
ঠিক বিশ্বাস হচ্ছে না ।’

‘চেপে যাওয়ার কারণ ?’

‘তুই ফট করে বাসুর ঠিকানা চাইতে বোধ হয় ঘাবড়ে গেলেন ।’

‘কেন ?’

‘বাইরে স্বীকার না করলেও হয়তো ওঁর মনে মনে বাসুর সঙ্গে
ব্যবসা করার ইচ্ছে আছে । শুনেছি উনি ব্যবসাদার বাড়ির ছেলে ।
বাবার লোহা-লকড়ের দোকান ছিল । আপাতত বাজিয়ে দেখছেন

বাস্থকে। চট করে কথা দিচ্ছেন না। এদিকে তুই বাস্থর জন্তে নতুন পার্টনার জোগাড় করতে চাস্ শুনে ঠিকানাটা চেপে গেলেন।

‘তা হতে পারে’—বলল সুন্দ। ‘আবার আর একটা কারণও থাকতে পারে। ওষুধের ফরমুলা চুরির ব্যাপারে ওনার সঙ্গে বাস্থর যোগাযোগ আছে। তাই’—

‘ধুৎ। বন্ধিমবাবু সে টাইপের নয়। কাছাখোলা লোক। তাছাড়া, তাহলে তো উনি নিজেই পেটেন্ট নিয়ে বিজনেস্ ফাঁদতে পারতেন। অথকে ফরমুলা বিক্রি করতে যাবেন কোন্ ছুখে। ওর কি টাকার অভাব?’

‘তা বটে।’ সুন্দ সায় দিল।

কুনাল অধীর আগ্রহে অপেক্ষা করছিল সুন্দদের অভিযানের ফলাফল জানার আশায়। খবর শুনে সে মুষড়ে পড়ল। বলল, ‘আমি মিঃ বাস্থর সঙ্গে ফরমুলার জন্ত দরাদরি করেছিলাম। যদি তের-চোদ্দ হাজারে নামত, নিয়ে নিতাম। কে আসল বৈজ্ঞানিক তা নিয়ে আর মাথা ঘামাতাম না। এক পয়সাও কমাতে রাজি হইল না। যাক্গে, তকে তকে থাকি যদি ফের খোঁজ পাই বাস্থর। বলেছি ওনাকে ভবিষ্যতে আবার এমনি কোনো ফরমুলা বিক্রি করতে চাইলে দয়া করে আমায় একটা চান্স দেবেন। হ্যাঁ, একবার কথাচ্ছলে জিজ্ঞেস করেছিলাম, আপনার ল্যাবরেটরিটা কোথায়? অমনি বাস্থ কঠোর স্বরে উত্তর দিলেন—‘তা জেনে আপনার দরকার নেই।’ আমি ঘাবড়ে গিয়ে আর ও প্রসঙ্গ তুলি নি।’

দুই

পুরো একটা বছর কেটে গেছে। মিঃ বাসুর দেওয়া ফরমুলার প্রকৃত আবিষ্কারক কে এ রহস্যের সমাধান আজও হয় নি। কিন্তু ফরমুলাটির ভাগ্যে কি ঘটেছিল সে খবর যোগাড় করেছিল কুনাল।

মিঃ বাসুর পিছনে ধাওয়া করে পানিহাটি যাওয়ার মাস দুই পরে একদিন সে অসিতকে ফোন করে প্রশ্ন করে—‘অসিত, মনে আছে মিঃ বাসুর ফরমুলা?’

‘হ্যাঁ হ্যাঁ, কি হল সেটার?’

‘সেটা কে কিনেছে জানিস? ভারত কেমিক্যালস্ লিমিটেড, পাক্সা কুড়ি হাজার টাকায়। বড় ফার্ম তো, তাই টাকার জোর বেশি। সেই ফরমুলায় তৈরি ওষুধই এখন এক ফোরটিন নামে বাজারে বেরিয়েছে। দারুণ কাটতি হয়েছে। আচ্ছা, হাজরাবাবুর কাছে কোনো খোঁজ পেলি মিঃ বাসুর?’

বঙ্কিম হাজরা মামাবাবুর কাছে আসেন বটে কিন্তু সুন্দর বা অসিতকে একটু এড়িয়ে চলেন।

তবু একদিন তিনি এলে সুন্দর তাঁকে ধরেছিল। ‘এই যে বঙ্কিমবাবু, কেমন আছেন?’

বঙ্কিমবাবু বিগলিত হেসে বললেন, ‘এই কাটছে কোনো রকমে ঠাকুরের কুপায়। প্রফেসর ঘোষ বাড়ি আছেন?’

‘হ্যাঁ আছেন। ওপরে যান। আচ্ছা, সেই মিঃ বাসু আর এসেছিলেন আপনার কাছে?’

‘নাঃ। আর আসেনি। কেন বলুন তো?’

‘মানে ওনার ঠিকানাটা, আমার সেই বন্ধুর জগ্জে...’

‘ওহো, মনে পড়েছে। দেখা হলে নিশ্চয় চাইব।’

বক্ষিমবাবু এ বিষয়ে আর কোনো উচ্চবাচ্য করেন না। হয়তো আর দেখা হয়নি মিঃ বাসুর সঙ্গে।

জানুয়ারীর শেষে মামাবাবু রাজস্থান গেলেন। ভারতপুরে কেওলাদেওথানা নামে এক পক্ষিনিবাস দেখতে। বক্ষিমবাবুও মামাবাবুর সঙ্গ নিলেন। রাজস্থান থেকে পঞ্জাব, হরিয়ানা, দিল্লি বেড়িয়ে কুড়ি-পঁচিশ দিন পরে ফিরলেন ছুঁজনে। বক্ষিমবাবুর উৎসাহেই এই বাড়তি বেড়ানটুকু। মামাবাবু ফিরতেই আবার পক্ষিবিদদের আনাগোনা শুরু হল। মামাবাবুরা কি কি পাখি দেখেছেন তাই নিয়ে মহা উৎসাহে আলোচনা চলল।

মামাবাবু পক্ষিবিদদের আলোচনা সভায় সুন্দর অসিতকে ডাকতেন না। মানে যোগ দেবার জন্তে জোর করতেন না। তবে একদিন সুন্দরকে ডেকে বললেন, 'কাল সন্ধ্যাবেলা থেকে বাড়িতে। বিখ্যাত এক্সপ্লোরার স্মার ডেভিড ডাঙ্কান আসছেন। ওনার ভ্রমণ অভিজ্ঞতা শোনা যাবে। উনি ভোরে হং-কং থেকে কলকাতা আসবেন আর পরদিনই চলে যাবেন আফ্রিকা। অসিতকেও আসতে বোলো।'

স্মার ডেভিডের নামে সুন্দর নেচে উঠল। এই দুর্ধর্ষ পর্যটক কত দেশ যে ঘুরেছেন তার ইয়ত্তা নেই। ছুঁগম পাহাড়, বন, মরু, প্রান্তর চষে বেড়ানোই ওঁর নেশা। পক্ষিবিদ হিসেবে বেশি নামডাক থাকলেও নানান দেশের জীবজন্তু ফলফুল সম্বন্ধে ওঁর জ্ঞান অসাধারণ। স্মার ডেভিড নিউজিল্যান্ডের। নাইজার নদীর অববাহিকায় অনেক অজ্ঞাত অঞ্চল আবিষ্কারের সম্মান স্বরূপ তিনি স্মার উপাধি পেয়েছেন। স্মার ডেভিড নাকি অদ্ভুত ভাল গল্প বলেন। তাঁর গল্পের বর্ণনায় অজানা দেশের ছবি চোখের সামনে জীবন্ত হয়ে ফুটে ওঠে। পাঁচ বছর আগে সুইডেনের স্টকহোমে প্রকৃতি বিজ্ঞানীদের সম্মেলনে ডাঙ্কানের সঙ্গে মামাবাবুর বন্ধুত্ব হয়। সেদিনই ছুঁপুরে কুনালের টেলিফোন এল।

'আজ বিকেলে অসিতের বাড়ি চলে আসি, আমিও আসব। দরকারী কথা আছে।'

‘কি ব্যাপার ? সেই বাসু নাকি ?’

‘হ্যাঁ। আয় বিকেলে, বলব সব।’

‘বিকেল নয়। সন্ধ্যা ছ’টা নাগাদ কর।’

‘কেন ?’

‘বিকেলে স্মার ডেভিডের লেকচার আছে আমাদের বাড়িতে ; বিখ্যাত এক্সপ্লোরার। অসিতও আসবে শুনতে, তারপর যাব।’

‘অল রাইট।’

সুনন্দ উদগ্রীব হয়ে উঠল। কি ব্যাপার ? মিঃ বাসুর কি খোঁজ পেয়েছে কুনাল ? ফরমুলার প্রকৃত আবিষ্কারককে জানার সূত্র কি পেল কিছু ? ডেভিডের লেকচার না থাকলে সে এখুনি ছুটে যেত কুনালের কাছে।

স্মার ডেভিড হাজির হলেন বিকেল চারটেয়। লম্বা পাতলা গড়নের মানুষটি। বয়স প্রায় ষাট ছুঁয়েছে, কিন্তু ইস্পাতের মতো দৃঢ়। যুবকের মতো চটপটে। হালকা লালচে দাড়ি, কপালে গালে অজস্র ভাঁজ—বহু কষ্টকর দিন যাপনের সাক্ষ্য। ভীষণ আমুদে। হেঁড়ে গলায় যখন তখন হো হো হাসিতে ফেটে পড়েন। লোকটির একটি বদভ্যাস—উচ্ছ্বাসের মাত্রা প্রবল হলে ফুঁতির চোটে কাছের লোকের পিঠ চাপড়ে দেন সজোরে। একবার সেই কড়া পড়া কঠিন হাতের চাপড় খেয়ে সুনন্দর কাঁধ ঝানঝান করে উঠল। সে সভয়ে সরে বসল।

স্মার ডেভিড কথা বলছিলেন ইংরেজিতে।

গত দু’বছর তিনি দক্ষিণ পূর্ব এশিয়ায় বোর্নিও, জাভা, সুমাত্রা প্রভৃতি অঞ্চলে অরণ্যময় দ্বীপগুলিতে ঘুরেছেন। সেই সব অভিযানের গল্প শুরু করলেন—

ঘরে বন্ধিমবাবুর মতো কয়েকজন পক্ষিরিদ উপস্থিত ছিলেন। তাঁরা জানতে চাইলেন—ওইসব দেশে নতুন কোনো পাখি দেখেছেন কিনা স্মার ডেভিড।

‘হুঁ দেখেছি বৈকি! তাদের বর্ণনা নোট করা আছে।’ তারপর ডেভিড হাসতে হাসিতে বললেন, ‘গত বছর বোর্নিওর এক দুর্গম অঞ্চলে মাইগ্রেটারি বার্ড পর্যবেক্ষণ করতে গিয়ে যা বিপদে পড়েছিলাম!’

‘কি রকম শুনি?’ সবাই উৎসুক আবেদন জানাল।

স্ট্রার ডেভিড পাইপে লম্বা টান দিয়ে বলতে শুরু করলেন।

‘—খবরটা আমায় দেয় চিয়াং। সিঙ্গাপুরে চিয়াংয়ের সঙ্গে দেখা হয়ে গেল। চিয়াং একজন পক্ষিবিদ। বিশেষতঃ যাযাবর পাখি নিয়েই তার স্টাডি। চিয়াং বলল, উত্তর বোর্নিওর সারওয়াক অঞ্চলে কাপুয়াস শৈলশ্রেণীর কোলে বনের মধ্যে এক গ্রামে যাচ্ছে সে। ছোট্ট নিঃসঙ্গ গ্রাম। কেলাবিট উপজাতির বাস। কাছাকাছি লোকালয় নেই। গ্রামে আধুনিক সভ্যতার কোনো স্পর্শই লাগে নি। আদিম প্রথায় চাষবাস আর শিকার করে জীবন ধারণ করে। কেউ লেখাপড়া জানে না, গুণতে পারে না, মাস বা বছরের হিসেবও জানে না। আবার জায়গাটা বিষুব রেখার খুব কাছাকাছি বলে সারা বছর আবহাওয়া গরম থাকে এবং বৃষ্টিপাত হয়। ফলে বিভিন্ন ঋতুর পার্থক্য বোঝা যায় না।

‘কেলাবিটদের প্রধান খাওয়া চাল। বন কেটে, বোপ-ঝাড় আগুনে পুড়িয়ে তারা ধান চাষের জমি তৈরি করে। কিন্তু ধান যখন তখন পোঁতা চলবে না। বছরের শেষের দিকে, অন্ততঃ ডিসেম্বরের আগে পুঁততেই হবে। এই চাষের সময় ঠিক করতে তাদের প্রধান ভরসা কিছু যাযাবর পাখি। ওরাই তাদের ক্যালেন্ডার।’

‘সেনসুলিট অর্থাৎ হলদে খঞ্জনের আবির্ভাব দিয়ে কেলাবিটদের বছর শুরু হয়। এই পাখিরা উত্তর চীন এবং সাইবেরিয়া থেকে বোর্নিও ইন্দোনেশিয়ায় শীত কাটাতে আসে। গ্রামের কেলাবিটরা তখন চাষের জন্ম যোগাড় আরম্ভ করে।’

‘এরপর আসে ব্রাউন শ্রাইক। মধ্য এশিয়া থেকে। গ্রামের লোক তখন ধান পোঁতা শুরু করে।’

‘তারপর এক জাতের ছোট বাজপাখি জাপানী স্প্যারো হকদের পালা। এবং আরও কিছুদিন পরে ডিসেম্বর জানুয়ারী নাগাদ ছাই রঙা খ্রাশদের আগমন হয়। ব্যস্, গ্রামের লোক ইতিমধ্যে ধান পোঁতা শেষ করে ফেলে।’

‘ক্রমে ধানগাছ বড় হয়। ফসল কেটে নেওয়া হলে কেলাবিটরা ফের সেনসুলিটদের অপেক্ষায় থাকে।’

‘আমি চিয়াংয়ের কাছে জানতে চাইলাম, ডিসেম্বরের মধ্যে ধান পুঁততে ওরা ব্যস্ত হয় কেন? বৃষ্টিপাতের যখন তেমন হেরফের নেই। একটু দেরি হলেই বা ক্ষতি কি?’

‘চিয়াং বলল, তারও কারণ এক জাতের যাযাবর পাখি—লম্বা লেজ মুনিয়া। ঠিক মার্চ মাসের গোড়ায় ঝাঁকে ঝাঁকে মুনিয়া এসে ঝাঁপিয়ে পড়ে ক্ষেতে। তার আগে ধান ঘরে তুলতে না পারলে একটি দানাও আর রক্ষা পাবে না।’

‘চিয়াং বলল, আমি গত বছর গিয়েছিলাম ওই গ্রামে। খঞ্জনাদের অবির্ভাব দেখার পর চলে আসি। এবার অণু পাখিগুলো দেখতে যাচ্ছি।’

‘আমি তক্ষুনি চিয়াংয়ের সঙ্গে জুটে গেলাম।’

‘দক্ষিণ চীন সমুদ্রতীরে কুচিং শহর থেকে রওনা হয়ে কিছুটা মোটরে চড়ে তারপর রাজং নদী বেয়ে শ’খানেক মাইল গেলাম সাম্পানে। এরপর নৌকো ছেড়ে পায়ে হেঁটে। তিন দিন হাঁটলাম গভীর জঙ্গলের মধ্য দিয়ে। ঠাসা ট্রপিকাল অরণ্য। বিরাট বিরাট আকাশ-ছোঁয়া গাছ আর বাঁশ ঝাড়। দিনের বেলাও মাথার ওপর ঘন পাতার আচ্ছাদন ভেদ করে সামান্য আলো ঢোকে। প্যাচ-প্যাচে কাদা ও জলাভূমি। বিষাক্ত সরীসৃপ, পোকামাকড়, বুনো শুয়োরের উৎপাত। আর এক ভয়, কখন হঠাৎ ওরাং ওটাংয়ের মুখোমুখি হব। উত্তর বোর্নিওর ঘন বনে এই বিশাল বানরদের বাস। এমনি লাজুক প্রকৃতির। কিন্তু বিরক্ত হলে ভয়ংকর হয়ে ওঠে।

ক্রমে সেই গ্রামে পৌঁছলাম। বড় অধিত্যকায় মাত্র চল্লিশটি পরিবারের বাস। তিন চারটে লম্বা লম্বা খড়ে ছাওয়া বাঁশের ঘরে তারা সবাই মিলে থাকে।

গ্রামের ধারে তাঁবু ফেললাম। চিয়াংয়ের সঙ্গে গ্রামের লোকের আগেই পরিচয় হয়েছিল। ফলে গ্রাম থেকে চাল, ডিম, তরকারি ইত্যাদি খাবার কিনতে অসুবিধা হল না। তবে একটা ভয় ছিল সাপ। সাংঘাতিক বিষাক্ত একজাতীয় ভাইপারের উপদ্রব। প্রতি বছর দু-একজন গ্রামের লোক মারা পড়ে সাপের কামড়ে।

‘দিন দশ দিব্যি কাটল।’

ব্রাউন-শ্রাইকরা আসতে আরম্ভ করেছে। প্রথমে অল্প অল্প। তারপরে দলে দলে। চডুইয়ের চেয়ে সামান্য বড় পাখি। পেট সাদা, ডানার রং খয়েরি। কোপে ঝাড়ে, জলের ধারে ধারে তারা পোকামাকড় খেয়ে বেড়াচ্ছে। গ্রামের লোকও ধান পুঁততে শুরু করেছে। হঠাৎ এক কাণ্ড!

‘ভোরে তাঁবুর বাইরে বসে কফি খাচ্ছি। চার-পাঁচজন কেলাবিট পুরুষ আমাদের সামনে এসে দাঁড়াল। গ্রামের মোড়লও রয়েছে তাদের মধ্যে। লোকগুলোর হাব-ভাব মোটেই সুবিধের ঠেকল না। কয়েকজনের হাতে ছুরি ও বর্শা।’

‘মোড়ল কড়া সুরে কি জানি বলল চিয়াংকে। চিয়াং কেলাবিট ভাষা জানত। দু’জনে কথা শুরু হল। দু’জনেই বেশ গরম হয়ে উঠল। অন্য লোকগুলোও, কটমট করে চাইতে লাগল। আমি হতভম্ব। এ যাবৎ গ্রামবাসীদের তো বেশ ঠাণ্ডা বলে মনে হয়েছিল, কি আবার ঘটল?’

‘চিয়াং একবার আমার দিকে ফিরে বলল,—‘এক ফ্যামাদি বেধেছে। আমরা আসার পর গ্রামে এক রোগ দেখা দিয়েছে। দু’জন লোক মরেছে। এরা আমাদের দায়ী করছে এই দুর্ঘটনার জন্য।’

‘আমাদের কেন!’ আমি অবাক।

‘চিয়াং বলল, এদের দারুণ কুসংস্কার। ওদের ধারণা বিদেশীদের আগমনের ফলে গ্রামের অধিষ্ঠাত্রী দেবী চটে গেছেন, অভিশাপ দিয়েছেন, বিশেষত লাল দাড়িওয়ালা বিদেশীর আগমন দেবীর কোপের কারণ। অর্থাৎ তুমি। আমি এত বোঝাচ্ছি, কান দিচ্ছেই না। বলছে, এখুনি আমাদের চলে যেতে হবে গ্রাম ছেড়ে।’

‘চিয়াং বেজায় গৌয়ার। এত কষ্ট করে এসে তাড়াতাড়ি ফিরতে কিছুতেই রাজী নয়। মোড়লের সঙ্গে অনেক তর্ক করল। বলল, চল দেখি কোথায় তোমাদের রুগী। আমি ওষুধ দিয়ে সারিয়ে দেব।’

‘গ্রামে গিয়ে একজন রুগী দেখলাম। লক্ষণ দেখে বিশেষ কিছু বুঝলাম না। মনে হল ঘোরাল ধরনের ফ্লু। এ জ্বর নাকি এখানে কখনো হয়নি আগে। আমাদের সঙ্গে কিছু জ্বর-জ্বালার ওষুধ ছিল। তাই একটা ঠুকে দিলাম আন্দাজে কিন্তু ফল হল মারাত্মক।’

‘দু’দিন পরে ছপুরে ক্যাম্পে গুয়ে বিশ্রাম নিচ্ছি। হঠাৎ কুড়ি পাঁচিশ জন কেলাবিট এসে বাঁপিয়ে পড়ল আমাদের ঘাড়ে। এবং তৎক্ষণাৎ আমাদের হাত-পা বেঁধে ফেলল।’

‘শুনলাম আমাদের দাওয়াই খাটেনি। সেই রুগীটি পটল তুলেছে। সুতরাং গ্রামের লোক খান্না। তারা আপাতত আমাদের বিচার করবে, ওই দেবীর সামনে শাস্তি দেবে। নইলে নাকী গোটা গ্রাম উজাড় হয়ে যাবে দেবীর রোষে। আমাদের সঙ্গে বন্দুক ছিল। কিন্তু সেগুলো নাগালের বাইরে। অসহায় অবস্থায় মরতে হবে নাকি?’

‘সেই দূর অরণ্যভূমিতে সভ্য জগতের আইন কানুন খাটে না। বিচারের নামে এরা আমাদের ওপর যে কি অত্যাচার চালাবে কে জানে? হয় তো হত্যা করবে।’

‘চিয়াং মোড়লকে বোঝাল, আমরা এখুনি চলে যাচ্ছি। মোড়ল একটু নরম হল। কিন্তু ছোকরাগুলো রাজি হয় না। চিয়াংকে

রেহাই দিলেও আমাকে তারা ছাড়বে না। শেষে চিয়াং এক প্যাঁচে ফেলল। মোড়লকে কাছে ডেকে ফিসফিস করে ঘুষের লোভ দেখাল। গ্রামের লোক আমাদের মালপত্র বাজেয়াপ্ত করলে মোড়লের বিশেষ লাভ নেই। কারণ তা ভাগাভাগি হয়ে যাবে। কিন্তু ঘুষ সবটাই পারে স্রেফ মোড়ল এক। ওতেই কাজ হল।

‘মোড়ল অনেক বুঝিয়ে শুবিয়ে অশ্বদের রাজি করল আমাদের ছেড়ে দিতে। মোড়লের পায়ে সর্বস্ব সমর্পণ করে প্রায় এক বস্ত্রে গ্রাম ছেড়ে পালালাম।’

‘তারুপুর তিন-চার দিন কাটল অসহ্য কষ্টে। খাণ্ড বলতে জংলী কলা বা আনারস। আর ঝলসান মাছ। খোলা আকাশের নিচে শয়ন। কেবল বৃষ্টিতে ভিজছি।

হতভাগারা রাইফেল কেড়ে নিয়েছিল। দুটো ছোট ছুরি ছাড়া আত্মরক্ষার আর অশ্ব ব্যবস্থা ছিল না। ভাগ্যিস নদীতে দেশী মাঝির কথামতো আমাদের অপেক্ষায় ছিল, তাই রক্ষে। উঃ, খুব শিক্ষা হয়েছে সেবার বার্ড-ওয়াচিং করতে গিয়ে।’

স্মার ডেভিড এক চোট অট্টহাসির সঙ্গে গল্প শেষ করলেন। শ্রোতারাও চমৎকৃত।

স্মার ডেভিড বললেন, ‘সেই গ্রামে রহস্যময় জ্বরের কারণ কিন্তু আবিষ্কার করেছিলাম পরে। ব্যাপারটা অদ্ভুত।’

‘কি? কি?’ সবাই জানতে চাইল।

‘কুচিংয়ে চেনা এক ডাক্তারের কাছে দিলাম ওই জ্বরের বর্ণনা। ডাক্তার অনেক ভেবে, বই-টাই উলটিয়ে জানালেন আশ্চর্য। এই রোগ তো মধ্য এশিয়ায় হয়। এ দেশে শোনা যায় নি। কি করে ছড়াল ওই গ্রামে?’

‘ঝট করে মনে পড়ে গেল একটা কথা। চিয়াং ফিরে আসার সময় এক জোড়া খয়েরি শ্রাইক এনেছিল। গ্রামের কাছে ফাঁদ পেতে ধরেছিল পাখি দুটো। ইচ্ছে ছিল চিহ্ন দেওয়া রিং পরিয়ে এই

যাযাবর পাখিদের ছেড়ে দেবে। হঠাৎ পালাতে হল। তবু সে ছাড়ে নি পাখি। বয়ে বয়ে এনেছিল পাখি ছুটো।’

‘ছুটে গেলি মি চিয়াংয়ের হোটেলে। তার খুব জ্বর হয়েছে। তাই পাখিকে এখনও রিং পরানো হয় নি। খাঁচায় রয়েছে। পাখি ছুটো নিয়ে গেলাম এক প্যাথোলজিস্টের কাছে। তিনি পরীক্ষা করে বললেন, একটা পাখির ডানার পালকে ওই জ্বরের জীবাণু রয়েছে। অর্থাৎ মধ্য এশিয়া থেকে ওই পাখিগুলির কোনো কোনোটা বহন করে এনেছিল রোগের জীবাণু। চিয়াংয়ের জ্বরও সেই মধ্য-এশিয়ার মারাত্মক ব্যাধি। জ্বরের প্রকৃতি বুঝতে পেরে ঠিক মতো চিকিৎসা হতে সে সেযাত্রা বেঁচে গেল।’

গল্প শুনতে শুনতে হুঁস ছিল না। হঠাৎ ঘড়ির দিকে নজর পড়তে সুনন্দ চমকে উঠল—সাড়ে ছ’টা। কুনাল এসে অপেক্ষা করবে অসিতের বাড়ি। অসিতেরও খেয়াল নেই ছ’জনে তড়িঘড়ি বেরিয়ে পড়ে।

কুনাল অসিতের বাড়ি অপেক্ষা করছিল।

কুনাল জানাল, ‘শোন মিঃ বাসু টেলিফোন করেছিলেন আজ সকালে। তিনি নাকি গমের নেতানো রোগের একটা ওষুধ বের করেছেন। একটা সলিউশন। ফরমুলাটা বিক্রি করতে চান। পেটেন্ট-রাইট সুদ্ধ। আগের বারের মতোই। তোরা বোধহয় জানিস না, গম গাছে একটা অদ্ভুত রোগ দেখা দিয়েছে আগের বছর থেকে। ব্যাকটিরিয়া অর্থাৎ জীবাণু-ঘটিত রোগ! এই রোগ পশ্চিম বাংলা এবং উত্তর ভারতের নানা জায়গায় খুব তাড়াতাড়ি ছড়িয়ে পড়ছে। এর ফলে তাজা গম গাছ শীঘ্র সমেত শুকিয়ে যায়। চাষীর এঁর নাম দিয়েছে নেতানো রোগ। জানাশোনা কোনো জীবাণুনাশক ওষুধেই এ রোগ আটকানো যাচ্ছে না। আমি বলছি ফরমুলা কিনতে চেষ্টা করব। কাল সকাল দশটায় অ্যাপয়ন্টমেন্ট। হোটেল কুতুবে সতেরো নম্বর ঘর। এখন বল কি কর্তব্য?’

সুনন্দ বলল, 'কি আবার। বাসুকে ফের ফলো করতে হবে! ফরমুলা তুই কিনবি কি না, সে তোর মাথা-ব্যথা। কিন্তু ওর আস্তানা জানতেই হবে।' জানতে হবে ওর প্রকৃত পরিচয়। এমন সুযোগ ছাড়া যায়নি।'

'কে ফলো করবে? আমরা?' অসিত জিজ্ঞেস করল।
'না। আগের ব্যাচের কেউ নয়। মিঃ বাসু আগেরবার আমাদের খেয়াল করেছিলেন কি না জানি না। তবু সাবধানের মার নেই। ফের সেই এক লোক পিছু ধরেছে দেখলে সতর্ক হয়ে যাবে। তাই এবার ওকে অনুসরণ করবে নতুন লোক—বাচ্চু।'

'মানে তোদের পাড়ায় শেষ লাল বাড়িটায় থাকে? কলেজ স্ট্রীটে বইয়ের দোকান আছে?'

'হ্যাঁ। ও আগে প্রাইভেট ইনভেস্টিগেটরের কাজ করত। এ সব কাজে খুব পোক্ত। পেশা পালটেছে কিন্তু ডিটেকটিভগিরির শখটা যায় নি। এক কথায় রাজি হয়ে যাবে। বাসু প্রথমে হোটেল থেকে গিয়ে কোথায় ওঠে সেটা বের করুক। তারপর আমরা আছি।'

পরদিন সকাল দশটা নাগাদ বাচ্চু সুনন্দর কাছে হাজির হয়ে রিপোর্ট দিল।

হোটেল থেকে বেরিয়ে মিঃ বাসু ট্যাক্সি চেপে যান হাওড়া স্টেশন। সেখান থেকে লোকাল ট্রেন ধরে সপ্তগ্রাম। মেন লাইনে ব্যাণ্ডেলের পরেই ছোট এক স্টেশন। সপ্তগ্রামের কিছুদূর দিয়ে গ্রাণ্ডট্রাঙ্ক রোড গেছে। স্টেশন থেকে রিকশা নিয়ে বাসু যান জি. টি. রোডের ধারে এক বাড়িতে। নিরলা জায়গায় মস্ত বাগানঘেরা ছোট দোতলা কোঠা বাড়ি। নাম—সুরভি নার্সারি। সারাদিন বাসুর আর দেখা পাওয়া যায় নি। বাড়িতে কে কে থাকে, স্থানীয় লোকজনের কাছে খোঁজ-খবর নিয়েছিল বাচ্চু। থাকেন তপন দত্ত বলে এক ভদ্রলোক। ইয়ংম্যান। তিন বছর হল বাড়িটায়

নার্সারি করেছেন। নানা রকম ফল, ফুল ও বীজ তৈরি করে কলকাতার বাজারে বিক্রি করেন। অতি অমিশুক। বাইরে বেরোন কদাচিৎ।

একই থাকেন তপনবাবু। আর থাকে দু'জন মালী এবং একটি বুড়িঝি। সবাই বাইরের আমদানী। কেউ স্থানীয় লোক নয়। মিঃ বাসুর সঙ্গে ওখানকার কারো আলাপ হয়নি। তবে মুখ চেনে। আসা যাওয়া করতে দেখেছে।

বাচ্চু বেশ রাত অবধি পাহারা দিয়েছিল বাড়িটা। অবশেষে শীতে কাবু হয়ে একটা জঘন্য নোংরা দোকানের বেষ্টিতে শুয়ে কোনো রকমে রাত কাটায়। একজন উটকে লোককে ঘোরাকেরা করতে দেখে স্থানীয় লোকদের একটু সন্দেহের উদ্বেক হচ্ছিল বৈ কি। তবে বাচ্চু বলেছে সে ইটের ব্যবসা করতে চায়, তাই জমি খুঁজছে। পরদিন সকালে সে খোঁজ করে শোনে যে বাসু খুব ভোরের ট্রেনে কলকাতার দিকে চলে গেছেন।

তপন দত্তকে দূর থেকে দেখেছে বাচ্চু। ময়লা রং। খুব রোগা ছোটখাটো চেহারা। নার্সারির এক বুড়ো মালীর সঙ্গে ভাব জমিয়েছিল বাচ্চু। মালীটি জিনিস কিনতে এসেছিল বাইরের দোকানে। মালী নিজের দেশ এবং স্ত্রী-পুত্রর সম্বন্ধে গাদাগুচ্ছের গল্প শোনালেও মিঃ বাসু বা তপন দত্ত সম্পর্কে রহস্যজনকভাবে নীরব থেকেছে। ও বিষয়ে কোনো আলোচনাই যেন করতে চায় না।

হ্যাঁ, একটা কথা মালী বেফাঁস বলে ফেলেছে, বাড়িতে ল্যাম্পেরেটরি জাতীয় কিছু একটা আছে। ল্যাম্প জ্বলে কি সব ওষুধ-টক্সিন বানায় তপনবাবু।

‘কন্‌গ্র্যাচুলেশনস্, বাচ্চু।’ সুন্দর অসিত চোঁচিয়ে উঠল। ‘জব্বর খবর এনেছো ভাই। ওই তপন দত্তই নির্ধাৎ আসল বৈজ্ঞানিক।’ পেট পুরে খাইয়ে দেওয়া হল বাচ্চুকে।

ঠিক হল আসছে কাল সুন্দ ও অসিত সপ্তগ্রাম যাত্রা করবে তপন দত্তর উদ্দেশ্যে। কুনালের ইচ্ছে ছিল সঙ্গে যায়। কিন্তু দুর্ভাগ্যবশত সে আটকে গেল ব্যবসা সংক্রান্ত কাজে।

সুরভি নার্সারি।

সুন্দ অসিত রিকসা থেকে নেমেই চট করে ঢুকল না ভিতরে। চারপাশে ঘুরে দেখতে লাগল। প্রধান দোতলা বাড়িটা ছাড়া বাগানের পিছনের অংশে আর একটা ইটের দেওয়াল ও টালির ছাদওয়ালা বাড়ি নজরে পড়ল। এছাড়া রয়েছে আরো ছোট ছোট মাটির বাড়ি। একজন বুড়ো মতন লোক সামনে ফুলের বাগানে বসে কাজ করছে। ছ'জনে গেট খুলে গুটি গুটি ভেতরে ঢুকল।

তাদের দেখে মালীটি উঠে দাঁড়াল।

‘তপনবাবু আছেন?’ জিজ্ঞেস করল অসিত।

‘আপনারা কোথেকে আসছেন?’

‘কলকাতা থেকে। দরকার আছে। ফুলের বীজ কিনতে চাই।’

‘ও দাঁড়ান। দিচ্ছি ডেকে।’ লোকটি বাড়ির দিকে চলে গেল।

লোকটি তাদের না ডাকলেও সুন্দরা পায়ে পায়ে এগিয়ে একেবারে বাড়ির সামনে হাজির হল। সদর দরজা বন্ধ। মালী ঘুরে খিড়কি দিয়ে ঢুকেছে।

দরজা খোলার আওয়াজ। এবং তারপর যে যুবকটি তাদের মুখোমুখি দাঁড়াল তাকে দেখে ছুজনে থ। আগন্তুকও অবাক।

প্রায় পনেরো বোল বছর বাদে দেখা হলেও তপনকে চিনতে ভুল হল না তাদের। স্কুলে এই তপন দত্ত ছিল সুন্দ-অসিতের সহপাঠী। যথেষ্ট বন্ধুত্ব ছিল তাদের।

খুব বুদ্ধিমান ছেলে ছিল তপন। ইংরেজি আর অঙ্কে খুব পাকা। কিন্তু বড় অভাবী। সব বই কিনে পড়তে পীরত না। স্কুল থেকে বেরোবার পর ছাড়াছাড়ি হয় তাদের। আর দেখা হয় নি।

‘আরে তপন তুই?’ সুনন্দই প্রথমে সামলে উঠল।

‘এ্যা, তোর?’ তপন খতমত খেয়ে গেল।

‘তুই এই নার্সারি করেছিস?’

‘হ্যাঁ ভাই। চাকরির বাজার তো জানিস। কিছু জোটাতে পারিলাম না সুবিধে মতো। তাই—’

‘কদ্দুর পড়েছিলি? শুনেছিলাম তুই আশুতোষে ভর্তি হয়েছিলি, আই. এসসি নিয়ে।’

‘হ্যাঁ। তবে পড়া এগোল না বেশি। ওই বি. এসসি অবধি টেনেটনে। তাও ফী যোগাড় করতে পারলাম না, তাই পরীক্ষা দেওয়া হল না। হঠাৎ বাবা মারা গেলেন। এটা সেটা কয়েকটা চাকরি করলাম, টিকল না কোনটাও। তারপর নার্সারি করেছি। তা মন্দ নয়, চলে যাচ্ছে একরকম।’ তপন শ্মান হাসল।

‘তুই এ বিত্তে শিখলি কোথেকে?’

‘শিখেছি। বলতে পারিস নিজের চেষ্টায়। আয় ভেতরে।’

নিম্নের ঘরে বসল সবাই।

ঘরে কয়েকটি সস্তা কাঠের চেয়ার টেবিল বেঞ্চি। এক গাদা কাঠের প্যাকিং বাস্ক এক কোণায় গাদা করা। দেওয়াল-তাকে সুরভি নার্সারির লেবেল মারা কিছু প্যাকেট। টেবিলে কাগজপত্র ফাইল সাজানো। মনে হল এটা অফিস ঘর।

‘তোরা আমার ঠিকানা পেলি কি করে?’ তপন জানতে চাইল।

‘পাইনি তো, আবিষ্কার করলাম এই মাত্র।’ বলল সুনন্দ—
‘এসেছিলাম এইদিকে। নার্সারি দেখে ঘুরে দেখতে ইচ্ছে হল। তাই বীজ কেনার নাম করে ঢুকলাম। তা আমরা কি জানি তোর নার্সারি! খাসা জায়গাটা কিন্তু।’

চা-বিস্কুট খাওয়াল তপন।

সুনন্দরা লক্ষ্য করছিল, তপন কথা বলতে বলতে কেমন অশ্রমনস্ক হয়ে যাচ্ছে। পুরনো বন্ধুদের দেখে খুশি হয়েছে বোঝা যায়, তবে

নিজের সম্বন্ধে কিছু বলতে তার যেন উৎসাহ নেই। হয়তো নিজের দারিদ্র্য ও ভাগ্যহীনতা প্রকাশ করতে লজ্জা পাচ্ছে।

এক ফাঁকে অসিত বলল, 'তপন তুই নাকি একটা ল্যাবরেটরি করেছিস?'

'কে বলল?' তপন ভুরু কঁচকাল।

'মালী।' সাফ মিথ্যে চালিয়ে দিল অসিত।

একটু হেসে তপন বলল, 'হ্যাঁ আছে। বীজগুলো শোধন করে নিই। সংক্রামক রোগের হাত থেকে বাঁচাতে। সে অতি সামান্য আয়োজন। পুরোদস্তুর ল্যাবরেটরির মর্যাদা পাওয়ার যোগ্য নয়। আয় দেখবি।'

অসিতদের পাশের ঘরে নিয়ে গেল তপন। ছোটো টেবিলের ওপর একটা স্পিরিট ল্যাম্প ও একটা বার্নার। কিছু কাঁচের বাটি প্লেট টেস্ট টেউব। পাশে আলমারিতে কিছু শিশি—তাতে রাসায়নিক চূর্ণ ও তরল পদার্থ। দেখে বোঝা গেল তপনের কথা ঠিকই।

অনেকক্ষণ ধরে বলি বলি করে যে প্রশ্নটা করতে চাইছিল হুঁজনে, সুনন্দ এবার সেই প্রশ্ন তুলল—

'হ্যারে, তোর কাছে মিস্টার বাসু নামে কেউ আসেন। গোর্ফ আছে। সাহেবী পোশাক পরেন।'

তপন কেমন চমকে উঠল।—'কেন?'

'মানে একটু দরকার ছিল।'

তপন জিজ্ঞাসু চোখে চেয়ে রইল। উত্তর দিল না।

সুনন্দ বলল, 'আসল ব্যাপারটা খুলে বলি। ওই ভদ্রলোক এক মেডিক্যাল ফার্মকে একটা ওষুধের ফরমুলা বিক্রি করেছেন আগের বছর। ধানগাছের শত্রু রান্ফুসে পোকা দমন করার কীটনাশক। আশ্চর্য ফল দিয়েছে ওষুধটায়। আমাদের এক পরিচিত লোকের কেমিক্যালস্ ফ্যাক্টরি আছে। তিনি মিঃ বাসুর সঙ্গে দেখা করতে খুব আগ্রহী। কারণ নানা শস্ত্র রোগের কিছু ভাল প্রতিরোধক যদি

বাসু আবিষ্কার করে থাকেন, মিঃ-পাকড়াশি তা কিনতে চান। আসলে সেবার মিঃ বাসু পাকড়াশিকেই প্রথমে অফারটা দিয়েছিলেন। কিন্তু অচেনা লোককে বিশ্বাস না হওয়ায় পাকড়াশি পিছিয়ে যান। তখন বাসু অগ্র কোম্পানিকে ফরমুলাটা বিক্রি করে দেন। এখনও পাকড়াশি সে কথা ভেবে হা-হতাশ করেন। ইদানীং গমে নাকি একরকম নতুন রোগ ধরেছে। নেতানো রোগ। মিঃ বাসু যদি এই রোগের কোনো প্রতিরোধক বের করতে পারেন—তাই মিঃ পাকড়াশি তাঁর খোঁজ করছেন।

‘কিন্তু মুশকিল হল মিঃ বাসুর ঠিকানা কেউ জানে না। কি ভাবে তাঁর সঙ্গে যোগাযোগ করা যায়? পাকড়াশি আমাকেও বলেছিলেন মিঃ বাসুর কথা—যদি তাঁর ঠিকানা যোগাড় করে দিতে পারি। অ্যাকসিডেন্টলি গত পরশু হঠাৎ মিঃ বাসুর দেখা পেয়ে গেলাম। বাসুকে আমি দেখেছি হোটেল কুতুবে। সেবার পাকড়াশি আমায় সঙ্গে করে নিয়ে বাসুর সঙ্গে দেখা করতে গিয়েছিলেন। অবশ্য তাদের কথাবার্তার সময় আমি উপস্থিত ছিলাম না।

‘যা হোক, গত পরশু এই পথ দিয়ে ব্যাণ্ডেলে যাচ্ছিলাম মোটরে। হঠাৎ দেখি মিঃ বাসু সাইকেল রিকশা থেকে নেমে এই নার্সারিতে ঢুকলেন। তখন সময় ছিল না হাতে, অগ্নের গাড়ি তাই। জায়গাটা চিনে রেখেছিলাম। তারপর আজ চলে এলাম।’

তখন গম্ভীর ভাবে শুনছিল। বাঁকা হেসে বলল—‘বুঝেছি, এই জগ্নেই তোদের আগমন। কিন্তু ভাই আমিও মিঃ বাসুর ঠিকানা জানি না।’

‘বাসু এখানে আসেন?’

‘আসেন মাঝে মাঝে। আসলে এই নার্সারির জমি আর বাড়ির মালিক হচ্ছেন মিস্টার বাসু। উনি কখনো এখানে আসেন। ভাড়া নিয়ে চলে যান। দু-একদিন বাসও করেন—ওই টালির ঘরটায়।’

‘মনি অর্ডার বা চিঠি পাঠাননি কখনো?’

‘না, সে ব্যবস্থা নেই।’

‘মিঃ বাসু বোধহয় বায়ো-কেমিস্ট্রীর লোক?’

‘হুঁ, সায়েন্সের লোক।’

‘আবিষ্কারটা ওর নিজের হলে বলতে হয়, আশ্চর্য প্রতিভা। অথচ অবাক ব্যাপার—সায়েন্টিস্ট মহলে কেউ ওঁর নাম জানে না। তোর সঙ্গে এ বিষয়ে আলোচনা করেন নি কখনো?’

‘না।’

তপনের মুখ ক্রমে থমথমে হয়ে উঠছিল। হয়তো বাসু প্রসঙ্গ তার মনঃপুত হচ্ছিল না। অসিত তাই কথা ঘোরাল—‘বাদ দে তোর মিঃ বাসু। চল তোর বাগান দেখি।’

বাগানে ঘুরল তিনজনে।

পরিচ্ছন্ন নার্সারি। গাছপালার মধ্য দিয়ে সরু সরু কাঁকর বিছানো পথ। তপন বন্ধুদের চিনিয়ে দিল নানা ফুলফলের গাছ। তবু আড়ার সুর যেন আর তেমন জমল না। কেমন ভাসা ভাসা দায়সারা ভঙ্গতা দেখাচ্ছিল তপন। বোধহয় মিঃ বাসুর প্রসঙ্গই তার মেজাজ বিগড়ে দিয়েছিল। সত্যি বলতে কি, এতদিন পরে তপনের খোঁজ পেয়ে সুন্দর অসিত খুব খুশি হলেও মিঃ বাসুর হৃদয় ফের হারিয়ে যেতে তারা বেশ দমে গিয়েছিল।

একবার তপন জিজ্ঞাসা করল—‘আচ্ছা ধানের রাঙ্কুসে পোকা আর গমের নেতানো রোগ সম্বন্ধে কি বলছিলি যেন? আমার অবশ্য লাইন আলাদা—এ ব্যাপারে বিশেষ ধারণা নেই।’

কুনালের মুখে এ বিষয়ে যা যা শুনেছিল তাই বলল অসিত। তপন ছুপুরে খেয়ে যেতে বলেছিল। কিন্তু সুন্দর রাজি হল না। সেখানে ঘণ্টা দুই কাটিয়ে ফিরল কলকাতা।

পথে অসিত বলল, ‘দেখ সুন্দর, আমার কিন্তু মনে হচ্ছে তপন অনেক কথা চেপে গেল।’

‘হুঁ কিন্তু তাতে ওর স্বার্থ?’

‘সেটাই তো ধরতে পারছি না। আচ্ছা তপন স্বয়ং সেই রহস্যময় বৈজ্ঞানিক নয়তো?’

‘খ্যেৎ ? তপনের বিঘ্নেতে এমন আবিষ্কার সম্ভব নয়।’

কুনাল শুনে রেগে বলল—‘অদ্ভুত ব্যাপার! লোকটা বারবার যেন পিছলে যাচ্ছে। কেন বাস্তু কাউকে তাঁর ঠিকানা জানান না! এত লুকোচুরি কিসের?’

সুনন্দ হেসে বলল, ‘হয়তো তাদের মতো ফরমুলা চোরদের হাত এড়াতে। বৈজ্ঞানিকের সাধনা গাপ মেরে দেবার মতো সৎলোকের তো অভাব নেই দেশে। তাই ত এত সাবধানতা।’

‘কিন্তু বৈজ্ঞানিকটি যে বাস্তু, এইখানেই আমার ঘোর সন্দেহ। কারণ ফরমুলা সংক্রান্ত কাগজ পরীক্ষা করে এবারও আমি একটা ক্যাকড়া তুলেছিলাম। ওষুধটা ‘সিস্টেমিক’ অর্থাৎ প্রয়োগ করলে সলিউশনের রাসায়নিক বস্তু উদ্ভিদের শরীরে প্রবেশ করে। এবং তাকে আক্রমণকারী জীবাণুর পক্ষে বিষাক্ত করে তোলে। বললাম—সলিউশন ক্ষেতে স্প্রে করার পর তার প্রভাব দূর হতে কতদিন লাগবে সেটা তো লেখা নেই পরিষ্কারভাবে। পাকা গম কাটার অন্তত কতদিন আগে এ ওষুধ ব্যবহার করা উচিত? নইলে যে ফসল বিষাক্ত হয়ে থাকলে মানুষের ক্ষতি করবে।’

‘বাস্তু বললেন—সে সব ডিটেলস্ পরে দেব। সমস্ত নোট করা আছে। এখন ঠিক মনে পড়ছে না।’

‘যে লোক হাতে কলমে এই ওষুধ নিয়ে একস্‌পেরিমেন্ট করেছে তার পক্ষে এই তুচ্ছ প্রশ্নের জবাব দেবার জন্ম নোট কনসাল্ট করতে চাওয়া হাস্যকর। পরিষ্কার মনে থাকার কথা। তাই বাস্তু সন্দেহে আমার সন্দেহটা আরও বেড়েছে।’

দিন চারেক পরে এক ছুপুরে উদ্ভ্রান্ত কুনাল অসিতের বাসায় এসে হাজির হল।

—‘কি ব্যাপার?’

কুনাল বলল, 'হরিধনকে পাওয়া যাচ্ছে না।'

'কে হরিধন?'

—'মিঃ কেমিক্যালস্-এর একজন সেলসম্যান। ঘুরে ঘুরে ওষুধ বিক্রি করে। খুব চলাক চতুর ছেলে। ওকে গতকাল হোটেল কুতুবের সামনে পাহারায় বসিয়েছিলাম।'

—'কেন?'

'ছ'দিন আগে কুতুবের ম্যানেজারের কাছে গিয়েছিলাম মিঃ বাসুর খোঁজে। বললাম—ওঁর সঙ্গে আমার বিশেষ দরকার। প্রথমে স্রেফ এড়িয়ে গেল ম্যানেজার। শেষে অনেক পেড়াপীড়িতে মুখ খুলল। বাসুর সঙ্গে আমার ছ'বার অ্যাপয়েন্টমেন্ট হয়েছে, তা তো সে দেখেছে। বলল, মিঃ বাসু নাকি শিগগিরি আসতে পারেন হোটেলে। কয়েকখানা চিঠি এসেছে ওঁর নামে সেগুলো নিয়ে যাবেন। বাসু ফোনে তাই জানিয়েছেন। ম্যানেজারকে অনুরোধ জানালাম— মিঃ বাসুকে বলবেন, আমি ওঁর সঙ্গে একটা অ্যাপয়েন্টমেন্ট চাই। কোথায় কখন দেখা হবে যেন চিঠিতে জানান।

'ফিরে গিয়ে হরিধনকে বললাম যদি বাসুর ঠিকানা বের করে দিতে পার তোমার প্রমোশন হবে। হরিধন তক্ষুণি রাজি হয়ে গেল। গত রাতে হরিধন বাসায় ফেরে নি। আজ সারা সকাল থানা হাসপাতাল চষে বেড়িয়েছি। হরিধনের পান্ডা নেই। ওর বাড়ির লোক কান্নাকাটি করছে। হয়তো আমার জন্মেই বিপদে পড়ল ছেলেটা।'

'কাল বাসু এসেছিলেন কুতুবে?'

—'হ্যাঁ, বিকেল পাঁচটায় আসেন, খানিক পরে চলে যান।'

কুনালের সঙ্গে বেরল ছ'জনে। অনেক খোঁজাখুঁজি করল বিকেল অবধি। হরিধনের খোঁজ পাওয়া গেল না। সন্ধ্যাবেলা মামাবাবুর বাসায় ফিরতে বাধ্য হল সুন্দর অসিত। কারণ স্ত্রীর ডেভিড ডাঙ্কান আসবেন আজ। সেই উপলক্ষ্যে আরও কয়েকজন অতিথি আসবেন বাড়িতে। তাদের যত্নের ভার সুন্দরদের ওপর।

আবার আগামীকাল এক প্রোগ্রাম ঠিক হয়ে আছে। মামাবাবু ডাক্তানকে নিয়ে কলকাতার বাইরে যাবেন বেড়াতে। সুন্দর অসিত যাবে সঙ্গে।

সুন্দরদের ইচ্ছে ছিল না কুনালকে ফেলে রেখে যায়। কুনালই জোর করল—‘তোরা আর থেকে কি করবি। মাঝ থেকে প্রফেসর ঘোষের অস্থবিধে হবে। তোরা যা—’

ভাগ্যিস গিয়েছিল তারা। নইলে এক অতি জটিল রহস্যের জাল হয়তো কোনোদিনই ভেদকরা সম্ভব হোত না।

রাতে সুন্দর একবার ফোন করল কুনালকে—‘হরিধনের খোঁজ পেলি?’

উত্তর এল—‘না।’

তিন

আফ্রিকা সফর সেরে হৈ হৈ করে উপস্থিত হলেন স্মার ডেভিড ডাঙ্কান। ডাঙ্কান গিয়েছিলেন মধ্য আফ্রিকার কঙ্গোনদীর অববাহিকায় অতি দুর্গম অরণ্য অঞ্চলে—ওকাপি নামে এক দুর্লভ প্রাণী দর্শনের আশায়। ওকাপি জিরাকের জ্ঞাতি। ১৯০০ সালে এই জন্তুটি প্রথম আবিষ্কার হয়। বন্য ওকাপির স্বভাবের বৈচিত্র্য আজও জানা যায় নি। তার কারণ শুধু গভীর জঙ্গল, অল্প সংখ্যা বা তাদের লাজুক স্বভাব নয়—ওই একই জঙ্গলে বাস করে বর্বর পিগমি বা বামন জাতি। তাদের বিষাক্ত তীরকে সবাই ডরায়।

স্মার ডেভিড লুকিয়ে ওকাপির ছবি তুলেছেন, পিগমিদের সঙ্গে ভাব জমিয়ে তাদের সাথে নাচ-গান করেছেন এবং নিতান্ত উপস্থিত-বুদ্ধির জোরে চিতা বাঘের কবল থেকে প্রাণে বেঁচে গেছেন। গোটা সন্ধ্যা সবাই মুগ্ধ হয়ে শুনল তাঁর গল্প।

পরদিন খুব ভোরে হাওড়া স্টেশন থেকে ট্রেনে চেপে রওনা হল পাঁচজন—মামাবাবু, ডাঙ্কান, সুনন্দ, অসিত এবং বঙ্কিম হাজরা। তিনি ঠিক ম্যানেজ করে ঢুকে পড়েছেন দলে। বীরভূমে যে ঝিল দেখতে যাওয়া হচ্ছে, শীতকালে সেখানে প্রচুর যাযাবর হাঁস নামে। ডাঙ্কানের ইচ্ছে পশ্চিম বাংলার প্রাকৃতিক দৃশ্য উপভোগ করবেন, সঙ্গে খানিক বার্ডওয়্যাচিং হলে তো সোনায়ে সোহাগা।

এই ঝিলে আগে কয়েকবার গেছেন মামাবাবু। উন্মুক্ত প্রান্তরের মধ্যে জলাভূমি। কিছু দূর দিয়ে বইছে সরু পাহাড়ী নদী কোপাই। ঝিলের কাছে একটি মাত্র গ্রাম বৈকুণ্ঠপুর। গ্রামের লোকরা বৈষ্ণব, তারা ঝিলের পাখি মারে না, বাইরের কাউকেও মারতে দেয় না। অতএব ঝিলের জলে এবং আশেপাশে পাখিরা নির্ভয়ে চরে।

বোলপুর স্টেশনে সকাল এগারোটা নাগাদ ট্রেন থেকে নামল পাঁচজনে।

বৈকুণ্ঠপুরে শ্রীমন্ত বৈরাগী মামাবাবুদের অভ্যর্থনা জানাতে এসেছিল স্টেশনে। শ্রীমন্ত মামাবাবুর পুরনো পরিচিত। বছর চল্লিশ বয়স। ভারি বিনয়ী। সর্বদা মুখে মিষ্টি হাসি লেগে রয়েছে। মামাবাবুর সঙ্গে ঘুরে বার্ডওয়াচিং সম্বন্ধে কিঞ্চিৎ অভিজ্ঞতা আছে শ্রীমন্তুর।

তিনটে সাইকেল রিক্সা ভাড়া করা হল। শ্রীমন্ত চলল বাইসাইকেলে। মাইল দুই যাবার পর রাস্তা খারাপ হয়ে উঠল। এই মেঠো রাস্তায় রিক্সা চলে না—গরুর গাড়ি চলে। শুধু মালপত্র নিয়ে রিক্সা চালকরা চলল গাড়ি ঠেলে ঠেলে।

শীতের রোদ্দুরে হাঁটতে কষ্ট নেই। গল্প করতে করতে এগোল সবাই। দু-পাশে বিস্তীর্ণ ক্ষেতি জমি। বর্ষাকালে সারা মাঠে ধান চাষ হয়। শীতে অবশ্য অনেক জমি খালি পড়ে আছে। তবে যে জায়গায় জলসেচের সুবিধে আছে সেখানে টুকরো টুকরো জমিতে চাষ হয়েছে। কোথাও ধান কোথাও বা গম।

পথের ধারে এক ছোট্ট গ্রাম পড়ল। বট অশ্বখ আম জাম তেঁতুল গাছে ছায়াচ্ছন্ন। বুপড়ি চায়ের দোকানও রয়েছে একটা। একটু বিশ্রাম নেওয়া যাক। চায়ের অর্ডার দিয়ে দোকানের বাইরে বেঞ্চে বসল সবাই। রিক্সাওলারাও রিক্সা রেখে এসে দোকানের পাশে ঘাসে বসে পড়ল।

দেখতে দেখতে ছোটখাটো এক ভিড় জমে গেল মামাবাবুর পার্টিকে ঘিরে। ছোট ছেলেমেয়ে, অকর্মা লোক তো আছেই,—যারা কাজে যাচ্ছিল তারাও হাঁ করে দাঁড়িয়ে গেল। রিক্সাওলা ও শ্রীমন্তকে হাজারো প্রশ্ন করতে লাগল আগন্তুকদের সম্বন্ধে। ডাঙ্কান সাহেবই তাদের প্রধান আকর্ষণ। সাহেব নিজে কিন্তু বিন্দুমাত্র অস্বস্তি বোধ করলেন না। বললেন—‘এ আমার অভ্যেস আছে। অচেনা জায়গায়

এমনও হয়েছে যে কয়েক শো লোক গা ঘেঁষে বসে আমায় ঘণ্টার পর ঘণ্টা লক্ষ্য করেছে। শোওয়ার সময় অবধি রেহাই দেয় নি। আবার গিয়ে আঙ্গুল ঘষে যাচাই করে দেখেছে রংটা আসল না নকল। একবার হয়েছিল কি জান ? ইস্টার্ন তুর্কীস্থানে গোবি মরুভূমির শ্রীমন্তে মঙ্গোলিয়ানদের এক গ্রামে সন্ধ্যার ঠিক আগে পৌঁছলাম আমি আর তেহেরান ইউনিভার্সিটির আর্কিওলজির প্রফেসর ডঃ বেন গাজি'—

‘গেল গেল, নিয়ে গেল। ধর ধর। হেট হেট’—ইত্যাদি বলকণ্ঠের উত্তেজনাময় বাক্যশ্রোতে ডাঙ্কানের গল্লে অকালে ছেদ পড়ল।

সচকিত হয়ে দেখল সবাই একপাল ছোট ছেলে তারস্বরে চৈঁচাতে চৈঁচাতে একদিকে ছুটে গেল। তারা ঘাড় তুলে কাছে এক বিরাট তেঁতুল গাছের ডালে তাকিয়ে দেখছে, উত্তেজিতভাবে অঙ্গভঙ্গি করছে এবং টিল ছুঁড়ে ওপরে।

তাদের উত্তেজনার কারণ প্রথমে ধরা গেল না।

তারপরই শ্রীমন্ত লাক দিয়ে উঠে ছুটল গাছের দিকে—‘হেই বাবা, সবনাশ হয়ে গেল।’

মামাবাবুরাও হাজির হলেন গাছের নিচে। ব্যাপার বুঝে সবার চক্ষুস্থির।

এক মস্ত লালমুখো বাঁদর গাছের উঁচু ডালে গ্যাঁট হয়ে বসে আছে। তার হাতে একটা ক্যানিসের ব্যাগ। ব্যাগের মালিক— বঙ্কিমবাবু।

বাঁদরটা ব্যাগের স্ট্র্যাপ ছিঁড়ে ফেলেছে। এবং হাটকে হাটকে ব্যাগের ভিতরকার জিনিস বের করে প্রত্যেকটি চৌখের সামনে একবার ঘুরিয়ে দেখে ছুঁড়ে ফেলে দিচ্ছে। বোকা গেল খাওদব্যা ভিন্ন অন্য কিছুতে তার রুচি নেই।

বঙ্কিমবাবু তো এই দৃশ্য দেখে বিকট আর্তনাদ করে নৃত্য জুড়ে দিলেন।

গ্রামের একজন বলল, 'ভারি শয়তান বাঁদর, বাবু। কি উৎপাত
যে করছে। একিজন এনেছিল পুষবে বলে। বাগ মানে নি। বুনো
হয়ে গেছে।'

এবার ব্যাগটা পড়ল মাটিতে। বাঁদরটা কি জানি
চিঁবুচ্ছে। বন্ধিমবাবু জানালেন—'নিশ্চয় পিপারমেন্ট। ছিল এক
বাক্স।'

বন্ধিমবাবু পাগলের মতো ঘুরে ঘুরে তাঁর ফেলে দেওয়া জিনিস
উদ্ধার করতে লাগলেন। সুন্দর, অসিত, মামাবাবু, ডাক্তান সাহেব—
আর গ্রামস্থল লোক তাঁকে সাহায্য করতে লেগে গেল। যাহোক
আধঘণ্টার মধ্যে হারানো জিনিস প্রায় সবই উদ্ধার হল। অবশেষে ফের
রওনা দিল তারা।

বৈকুণ্ঠপুরের বিল সত্যি অপূর্ব।

অন্তত আধ মাইল লম্বা, হাত পঞ্চাশ চওড়া জলাশয়। চারিধারে
উঁচু পারে তালগাছের সারি এবং শর ঝোপ। তীরের কাছে অগভীর
জলে কিছু নলখাগড়া ও আঁগাছা জন্মেছে। বিলের তিন পাশে
চাষের ক্ষেত। এক পাশে উঁচু-নিচু লালচে রুক্ষ খোয়াই।
খোয়াইয়ের পথে মাইল দেড় গেলে কোপাই নদী। বিলের পশ্চিম
দিকে প্রায় দুশো গজ দূরে গ্রাম বৈকুণ্ঠপুর।

শীতের ছপুর্বে গাঢ় নীল জলে ছোট ছোট ঢেউ উঠছে। আর
জলের বুকে মনের আনন্দে সাঁতার কেটে বেড়াচ্ছে অসংখ্য হাঁস।
শুধু হাঁস নয়, আরও অনেক রকম পাখি—কেউ ভাসছে জলে, কেউ
চরছে পারের কাছে ডাঙায়, কেউ ডানা মেলে উড়ছে আকাশে।
এতগুলো মানুষের আগমনে তারা বিন্দুমাত্র বিচলিত হল না।
বোঝা গেল এরা মানুষকে ভয় করে না।

ডাক্তান তো দৃশ্য দেখে মুগ্ধ।

মামাবাবু, ডাক্তান এবং বন্ধিম হাজর চোখে দূরবীন লাগালেন
পাখি দেখতে।

সুন্দর, অসিত, শ্রীমন্ত ও আরও কয়েকজন বৈকুণ্ঠপুর বাসীর সহায়তায় তিনটে তীব্র খাটিয়ে ফেলল বিলের কাছে। গ্রামের লোক তাদের রাতে থাকার জায়গা দিতে চেয়েছিল কিন্তু মামাবাবু ও ডাক্তান এমন খাসা জায়গাটি ছেড়ে বন্ধ ঘরে ঘুমোতে রাজী হলেন না। ডাক্তান হেসে বললেন, 'বুঝলে ব্রাদার, সত্যি বলতে কি ক্যাম্পে শুতে আমি নিজের বেডরুমের চেয়েও আরাম পাই। অভ্যেস!'

বৈকুণ্ঠপুরের বিলে সব চেয়ে বেশি সংখ্যায় রয়েছে পিন্টেল বা সূচ্যাগ্রপুচ্ছ হাঁস। জলের মধ্যস্থানটা তাদের দখলে। এরা যাযাবর। উত্তর এশিয়া ও ইউরোপ থেকে শীতকালে এদেশে আসে। বেশ বড় হাঁস।

বিলে আর এক জাতের হাঁস ছিল—নাক্টা। আকারে পিন্টেলের চেয়েও বড়। নাক্টা যাযাবর নয়। এখানে স্থায়ী ভাবে বাস করে।

হাঁস ছাড়াও জলে সাঁতার কাটছিল কিছু পানকৌড়ি। তীরে গাছের ডালে বা মাটিতে বসেছিল কয়েকটি ধ্যানমগ্ন বক। থেকে থেকে জলে ছোঁ মারছিল মাছরাঙা। দূরে খোলা মাঠের আকাশে প্রকাণ্ড ডানা মেলে উড়ছিল শামুকখোল।

ছপুরের খাওয়া-দাওয়ার পাট চুকিয়ে আসা হয়েছিল স্টেশনে। এক রাউণ্ড কফি খেয়ে সবাই চলল নদী দেখতে।

অগভীর ক্ষীণকায়া স্রোতস্বিনী। টলমলে জলে হাঁটু অবধি ডোবে না। তবে বর্ষায় নাকি এই নদীতেই বান ডাকে—কুল ছাপিয়ে যায় জল। নদী তটে ঝোপ-ঝাড়, হালকা জঙ্গল। ভারি নির্জন। এই জায়গা নানা জাতের পাখির আদর্শ বিহারভূমি।

মামাবাবু উত্তেজিতভাবে ডাক্তানকে খোঁচা মারলেন 'ওই দেখুন এক জোড়া ব্রাহ্মণী হাঁস।'

'এঁয়, হাঁসেরও 'বামুন কায়েত' আছে' আশ্চর্য হয়ে বললেন বঙ্কিমবাবু।

‘না না, সে ব্রাহ্মণী নয় হাঁসের নাম। চলতি বাংলায় যাদের বলি চকাচকী’ বললেন মামাবাবু। ‘এরাও যাযাবর হাঁস। তুর্কিস্থান সিকিম তিব্বত ইত্যাদি দেশ থেকে আসে। সর্বদা জোড়ায় জোড়ায় ঘোরে।’

মামাবাবু গ্রামের লোকের সাহায্যে বিল ও নদীর তীরে কয়েকটা পাখি ধরার ফাঁদ পাতলেন। পাখি ধরে তাদের পায়ে রিং পরানো হবে। রিং বের করে দেখালেন তিনি। ছোট ছোট অ্যালুমিনিয়ামের বলয়। তাতে পাঞ্চ করে খুদে খুদে অক্ষরে ছেপে দেওয়া হয়—রিং পরানোর তারিখ, কে পরাচ্ছে, কোথায়, পাখির ওজন কত ইত্যাদি তথ্য। বিশেষ করে যাযাবর পাখিদের জানতে এই রিং পরানোর প্রয়োজন খুব বেশি।

শীতের শেষে যাযাবর পাখির দল আবার নিজের দেশে ফিরে যাবে। হয়তো দূর দেশে এখানের রিং পরানো কোনো পাখিকে জীবিত বা মৃত অবস্থায় পাওয়া যাবে। পক্ষিবিদগণ তখন ওর পায়ের রিং দেখে জানতে পারবেন পাখিটা কতদূরে গিয়েছিল, কবে, ইত্যাদি খবর।

দিনান্তের অস্পষ্ট আলো যখন যাই যাই করছে, আকাশের পশ্চিমপ্রান্তে অস্তগামী সূর্যকিরণের আভায় রাজা হয়ে উঠেছে, তখন দেখা গেল এক আশ্চর্য দৃশ্য। পিন্টেলরা ঝাঁকে ঝাঁকে উড়তে আরম্ভ করল জল ছেড়ে। ছোট ছোট দলে ভাগ হয়ে প্রথমে বিলের ওপরে কয়েক পাক ঘুরে তারা উঠে গেল বহু উঁচুতে। তারপর তীর বেগে অদৃশ্য হল দৃষ্টির সীমানা ছাড়িয়ে। তাদের ডানায় শব্দ শব্দ আওয়াজ হচ্ছিল যেন ঝড়ের বাতাস। নিরাপদ আশ্রয় ছেড়ে তারা এখন চরতে চলল—দূরে খাল-বিল-শস্যক্ষেতে। কারণ রাতের আঁধারে শিকারীর দৌরাণ্য নেই। আবার ওরা বৈকুণ্ঠপুরের বিলে ফিরবে খুব ভোরে। সূর্যের আলো ফোঁটার সঙ্গে সঙ্গে। এই ওদের দৈনিক রুটিন।

সকালে আবিষ্কার হল ঝিলের পাশে ফাঁদে পাঁচটি পাখি বন্দী হয়েছে। তাদের মধ্যে তিনটি যাযাবর পিন্টেল। সাবধানে বের করা হল পাখিগুলোকে। যাযাবর পাখিগুলোর পায়ে রিং পরিয়ে দিলেন মামাবাবু, সুন্দর অসিত বন্ধিমবাবু ছাড়াও গ্রামের অনেক লোক গভীর আগ্রহে দেখল তাঁর কাজ। ডাক্তান তখন নিজের মনে ফটো তুলতে ব্যস্ত।

ঘণ্টাখানেক পরে এক ব্যাপার দেখে সুন্দর হেসে অস্থির।—গ্রামের একটি লোক ছুটো পায়রা এনে দিল বন্ধিমবাবুকে। স্রেফ গোলা পায়রা। যারা গেরস্ত-বাড়ির ঘুলঘুলিতে বাস করে, কাছাকাছি মাঠে ময়দানে চরে বেড়ায়। বন্ধিমবাবু লোকটির হাতে একখানা নোট গুঁজে দিলেন। তারপর চুপিচুপি পায়রা ছুটো থলিতে ভরলেন।

অসিত হেঁকে বলল, ‘কি হাজারা মশাই, রোস্ট খাবেন নাকি?’

বন্ধিমবাবু জিভ কাটলেন। ‘আরে ছি ছি। বৈকুণ্ঠপুরে পক্ষিবধ! গ্রামের লোক মনে করবে কি? এই পায়রা ছুটোকে আমি রিং পরাব। মানে প্র্যাকটিস করব।’

মামাবাবু হেসে বললেন, ‘আপনার রিং পরানোর ইচ্ছে আছে বলেন নি কেন? ছুটো হাঁস তো এমনি ছেড়ে দিলাম। সেগুলোকে পরাতে পারতেন।’

লাজুক হেসে বন্ধিমবাবু বললেন, ‘ঠিক আছে। আগে একটু প্র্যাকটিস করে নিই; নিজের হাতে পরিয়ে দেখাব আপনাকে।’ পায়রা ছুটো নিয়ে বন্ধিমবাবু খোয়াইয়ের ঢালে নেমে অদৃশ্য হলেন।

প্রথম পায়রাটির পায়ে পরানো অ্যালুমিনিয়াম বলয় পরীক্ষা করে মামাবাবু বন্ধিমবাবুকে সার্টিফিকেট দিলেন—‘গুড। কেবল আর একটু টাইট হবে। হ্যাঁ, পয়সা দিয়ে পায়রা কেনার দরকার নেই। আপনি বরং নদীর তীরে চলে যান। শ্রীমন্ত বলেছে এক

জোড়া বালি-তিতিল পড়েছে ফাঁদে। ওরা অবশ্য যাযাবর নয়, তবু
ওদের ওপর হাত পাকাতে পারেন। রিং পরিয়ে ছেড়ে দেবেন।
বন্ধিমবাবু বেজায় খুশি হয়ে চলে গেলেন।

সুনন্দ ছুপুরের খাওয়ার আয়োজন শুরু করল। সে রান্নায়
ভারি পটু। অসিতকে বলল, 'ডাক্তান বাঙালী রান্না খাবে। খিচুড়ি,
ডিম ভাজা, আলুর দম বানাচ্ছি।'

সুনন্দকে ব্যস্ত দেখে অসিত বলল, 'একটু ঘুরে আসি।'

মামাবাবু তখন ঝিলের ধারে চোখে দূরবীন লাগিয়ে বসে আছেন।
ডাক্তান গ্রামে গেছেন একটা প্রাচীন মন্দির দেখতে।

অসিত যখন ফিরে এল, সুনন্দর রন্ধনপর্ব সমাপ্ত।

সুনন্দকে ফিসফিস করে বলল অসিত—'হ্যারে ভক্ত বন্ধিমের
মাথার গোলমাল নেই তো?'

সুনন্দ অবাক।—'কৈ, মনে তো হয় না। কেন?'

অসিত একটু চুপ করে থেকে বলল—'আমার মনে হয় আছে।'

'হঠাৎ?'

'একটা উদ্ভট ব্যাপার দেখলাম, তাই।'

—'কী?'

'নদী পেরিয়ে ওপারে গেসলাম। খানিক ঘুরে বাইনোকুলার
দিয়ে দেখলাম চারধার। তারপর গাছের ছায়ায় শুয়ে পড়লাম
চিৎপটাং হয়ে। একটু বাদে পাশ ফিরেছি, চোখে পড়ল নদীর উপ্তো
তীরে ঝোপের আড়ালে বসে বন্ধিমবাবু। তিনি—

'হ্যালো দেয়ার!' ডাক্তানের গমগমে গলা শুনে ছ'জনে চমকে
উঠল! ডাক্তান সাহেব পিছনে এসে দাঁড়িয়েছেন হাসি মুখে। 'এক
কাপ কফি খাওয়াবে?'

'নিশ্চয়ই, নিশ্চয়ই'—সুনন্দ তৎপর হয়ে ওঠে। ডাক্তান জুং করে
বসলেন সামনের মোটা গাছের শিকড়ের ওপর। বোঝা গেল শুধু
কফির তেষ্ঠা নয়, তাঁর কিঞ্চিৎ আড্ডা দেওয়ারও বাসনা জেগেছে।

‘জান, খাবার-দাবার নিয়ে আমার কোনো বাহুবিচার নেই। শুধু এই কফির ওপর একটু যা দুর্বলতা। এই যে ইচ্ছে করলেই কফি খেতে পাচ্ছি, এ যে কত বড় সৌভাগ্য সে তোমরা বুঝবে না। আমিও বুঝি নি আগে। প্রথম টের পেলাম উত্তর-পশ্চিম আফ্রিকার জঙ্গলে পথ হারিয়ে ঘুরতে ঘুরতে। তখন কেবল গরম কফিতে চুমুক দেওয়ার স্বপ্ন দেখতাম। নৌকাডুবি হয়ে আমার কফির প্যাকেট গেল ভেসে। তারপর পাক্কা চল্লিশ দিন কফি খেতে পাইনি।’

‘ওখানে গিয়েছিলেন কেন?’ প্রশ্নটা ছ’জনের।

‘নাইজার নদীর গতিপথ আবিষ্কারের উদ্দেশ্যে। বড় ভুগিয়েছিল সেবার।’

—‘কি—কি রকম?’

স্যার ডেভিড কফিতে চুমুক দিতে দিতে তাঁর অ্যাডভেঞ্চারের কাহিনী আরম্ভ করলেন। রুদ্ধশ্বাসে শোনে ছই বন্ধু। বঙ্কিমবাবুর অদ্ভুত আচরণের কথা আপাতত মুছে গেল তাদের মন থেকে। কথাটা অবশ্য সুন্দর মনে পড়েছিল—তবে অনেক—অনেক পরে।

সেই রাতে কলকাতার বাসায় ফিরে, শুতে যাওয়ার আগে সুন্দর মনে পড়ল—তাই তো, হরিধনের খবর পাওয়া গেছে কি? আর বঙ্কিমবাবু সন্দেহে কি একটা রহস্যময় ঘটনা বলতে যাচ্ছিল অসিত? কিন্তু রাত সাড়ে এগারোটার সময় কাউকে বিরক্ত করা উচিত নয়। পরদিন সুন্দর কুনাল ও অসিতকে টেলিফোন করল।

কুনাল জানাল—‘হ্যাঁ, ফিরেছে হরিধন। খুব বেঁচে গেছে। আমি এখন আসছি তোমার কাছে।’

অসিত বলল—‘সত্যি, বঙ্কিমবাবুর ব্যাপারটা ভুলেই গেললাম। অদ্ভুত লোক। আমি তো কিছু মাথা মুগ্ধ বুঝলাম না। ফোনে বলা যাবে না সব গুছিয়ে। আমি যাচ্ছি। তবে একটু দেরী হবে। কাজ আছে বাড়িতে।’

চার

মিত্র কেমিক্যালস-এর সেলস্‌ রিপ্রেজেন্টেটিভ হরিধনের রহস্যময় অন্তর্ধান সম্পর্কে কুনাল যা বলল তার সারমর্ম এই—

হোটেল কুতুবের সামনে এক পার্কের বেঞ্চে বসে হোটেলের ওপর নজর রাখছিল হরিধন। বিকেল পাঁচটা নাগাদ মিঃ বাসু এলেন ট্যাক্সিতে। আধ ঘণ্টার মধ্যে তিনি বেরিয়ে আসেন। ট্যাক্সি ডাকলেন না। পাইপ ধরিয়ে ধীরে স্লুস্লে হাঁটতে শুরু করলেন চৌরঙ্গীর দিকে।

সুবিধেই হল হরিধনের। অফিস ফেরতা জনশ্রোতে গা ঢাকা দিয়ে সে হাত কুড়ি পিছনে থেকে বাসুকে অনুসরণ করল।

চৌরঙ্গী ছাড়িয়ে অনেক রাস্তা ঘুরে বাসু ঢোকেন চীনে পট্টীতে। পথে একবার মাত্র থেমেছিলেন—দেশলাই কিনতে।

একটা সরু গলি। দু-পাশে পুরনো আমলের বড় বড় বাড়ি। পথচারী কম। মিঃ বাসু টপ করে এক বাড়ির দরজা দিয়ে ঢুকে গেলেন। মিনিট পনেরো গলির মোড়ে অপেক্ষা করে হরিধনও ঢুকল সেই বাড়িতে।

সরু প্যাসেজ—দু-ধারে সার সার ঘর। নোনা ধরা ইট বের করা দেওয়াল। প্যাসেজে মিটমিট করছে বৈজ্ঞানিক আলো। কোনো ঘর তালাবন্ধ। কোনোটা খোলা—মানুষ জনের কথার আওয়াজ শোনা যাচ্ছে ভিতরে। দু-চার জন লোক চুকেছে বা বেরুচ্ছে। ঘরগুলোয় লোক বাস করে না। গুদাম বা অফিস হিসেবে ব্যবহার হয়। খোলা দরজা পেলেই ভিতরে উঁকি দেয় হরিধন।

প্যাসেজের শেষ প্রান্তে একটা লোক দাঁড়িয়েছিল। হরিধনকে

দেখছিল তীক্ষ্ণ দৃষ্টিতে। হরিধন জিজ্ঞেস করল তাকে—‘একজনকে দেখেছেন যেতে ? কোর্ট প্যাণ্ট পরা।’

লোকটি আঙ্গুল তুলে দেখাল—‘হাঁ, ওই দিকে।’

বাড়ির এ অংশ একেবারে নির্জন। হঠাৎ থামের আড়াল থেকে যেন মন্ত্রবলে আবিভূত হল এক ব্যক্তি—দীর্ঘকায়, বলিষ্ঠ, পরনে রঙচঙে লুঙ্গি ও শার্ট। চোখের নিচে হতে মুখের বাকি অংশ রুমাল বেঁধে ঢাকা।

মুহূর্তে সে হরিধনের বুকের ওপর উঁচিয়ে ধরল একখানা লম্বা ঝকঝকে ছোরা। চাপা কর্কশ স্বরে বলল—‘খবরদার চেঁচালেই মরবি।’

আর তখন কিংকর্তব্যবিমূঢ় হরিধনের ঘাড় পেছন থেকে দৃঢ়-মুষ্টিতে আঁকড়ে ধরল কেউ। এবং আর একখানা হাত ভিজে কাপড়ের টুকরো সমেত তার মুখ চাপা দিল। ঝাঁঝাল মিষ্টি গন্ধ ঢুকল নাকে। হরিধনের মাথা বিমবিম করে উঠল এবং সে জ্ঞান হারাল।

হরিধন যখন চেতনা পেল তখন বুঝতে পারল যে একটা দরজা-জানলা বন্ধ অন্ধকার ঘরে সে হাত-পা বাঁধা অবস্থায় মেঝেতে শুয়ে রয়েছে। মুখও বাঁধা, গালের ভিতর কাপড় ঠাসা। চেঁচাবার উপায় নেই। ঘুলঘুলি দিয়ে সামান্য আলো ঢুকছে।

দারুণ তেষ্ঠায় ছাতি ফেটে যাচ্ছিল। মাথায় অসহ্য যন্ত্রণা। গড়িয়ে গড়িয়ে দরজার কাছে গেল হরিধন। ছম্ ছম্ করে জোড়া পায়ে লাথি মারতে লাগাল কবাটে। বাইরে তালা খোলার আওয়াজ। সেই মুখ ঢাকা লোকটা ঢুকল ঘরে। হিংস্র ভাবে দাবড়ানি দিল—‘টু শব্দ করলে গলা কেটে পুঁতে ফেলব।’

হরিধন ইঙ্গিতে বোঝাল—জল।

লোকটা এক মগ জল এনে হরিধনের বাঁধন খুলল। হরিধন হাঁ করতে ঢেলে দিল জলটুকু। তারপর বেরিয়ে গিয়ে দরজায় তালা

দিল। দরজার বাইরে আলো। দেখে হরিধনের মনে হয়েছিল তখন সকাল বেলা।

খানিকক্ষণ পরে তার কানে এল দরজার বাইরে ছ'জন লোকের কথাবার্তা।

‘ফেউটাকে নিয়ে কি করব স্মার?’

‘দেখি ভেবে।’

‘খতম করে পাচার করে দিই। বামেলা চুকে যায়।’

‘উছ ব্যস্ত হয়ো না। আমি আসছি ঘুরে।’

একজনের গলা চিনেছিল হরিধন—মুখ ঢাকা গুণ্ডাটা। দ্বিতীয় জনকে চিনতে পারে নি।

ভয়ে কাঠ হয়ে গিয়েছিল হরিধন। আর কোনো শব্দ করতে সাহস পায় নি। ঘণ্টার পর ঘণ্টা ঠায় এক ভাবে পড়ে থেকে তার সর্বান্ন অসাড় হয়ে গিয়েছিল।

আবার দরজা খুলল সেই গুণ্ডাটা। তখন নিশুতি রাত। হরিধনের মুখ খুলে দিয়ে এক গ্রাস ছুধ দিল তাকে খেতে। প্রচণ্ড খিদে পেয়েছিল। তাই বিনা আপত্তিতে ছুধটুকু খেয়ে ফেলল হরিধন। একটুক্ষণ পরেই তার চোখ ঘুমে জড়িয়ে আসে। অবশ অচেতন হয়ে পড়ল তন্দ্রায়।

কুনাল বলল, ‘ভোরবেলা হরিধনের দেহ আবিষ্কার হল। ওই বাড়িরই এক নোংরা উঠানে। প্রথমে লোকে ভেবেছিল মৃত। তারপর বুঝল অজ্ঞান। তখন ওকে হাসপাতালে পাঠাল। ছুপুরে ওর জ্ঞান হল। ডাক্তার বলেছে কড়া ঘুমের ওষুধ খাওয়ানো হয়েছিল।’

‘কিছু খোয়া গেছে হরিধনের?’ জিজ্ঞেস করল সুনন্দ।

‘হুঁ। ওর মনিব্যাগ এবং রিস্টওয়াচ।’ পুলিশ ওই বাড়ি সার্চ করেছে। কিন্তু হরিধনের আততায়ীর সন্ধান পায়নি। এমন কি কোন্ ঘরে বন্দী ছিল তাও ঠিক করে বলতে পারে নি হরিধন।

কয়েকজনকে জেরা করে আপাতত হাল ছেড়ে দিয়েছে। কি করতে হরিধন ওই বাড়িতে ঢুকেছিল তার আসল কারণ অবশ্য পুলিশের কাছে চেপে গেছি। কে জানে, তাহলে হয়তো আমাদেরই অযথা হয়রানি করত পুলিশ।’

অল্পক্ষণ নীরব থেকে কুনাল বলল, ‘আমার কিন্তু মনে হয় এ অর্ডিনারি ছিনতাই কেস নয়। মিঃ বাসুই গুণ্ডা লাগিয়েছিল।’

‘তোর ধারণার কারণ?’

‘কারণ হরিধনের প্যাণ্টের পকেটে একটা চিঠি ছিল, সেটা উধাও হয়েছে। এমনি অফিস চিঠি। অফিসিয়াল প্যাণ্টে আমি লিখেছিলাম হরিধনকে কিছু কাজ সংক্রান্ত বিষয়ে। আমার সই ছিল তাতে। এ চিঠি সাধারণ গুণ্ডা নেবে কি করতে? তাছাড়া ওকে ফেউ বলছিল কেন?’

‘হতে পারে। বাসু সন্দেহ করেছিল ওকে ফলো করা হচ্ছে, তাই। লোকটা তাহলে ডেনজারাস—’

সদর দরজার কলিং বেল বাজল।

দরজা খুলে সুনন্দ দেখে বঙ্কিমবাবু।

বঙ্কিমবাবু বললেন, ‘নমস্কার। প্রফেসর ঘোষ আছেন?’

‘না, বেরিয়েছেন। আপনি বসুন। ফিরবেন এবার।’

‘ডাক্তান সাহেব কি চলে গেছেন?’

‘হ্যাঁ।’

‘ও: দুর্দান্ত লোক মশাই। এই প্রথম স্বচক্ষে একজন পর্যটককে দেখলাম। বইয়ে পড়েছি কত।’

সুনন্দ জবাব দিতে যাচ্ছিল—কেন, মামাবাবু। কিন্তু তার নজরে পড়ল বঙ্কিমবাবু হাঁ করে চেয়ে আছেন বৈঠকখানার খোলা দরজা দিয়ে কুনালের দিকে।

সুনন্দ বলল, ‘আমার বন্ধু কুনাল মিত্র।’

‘ও, ইনিই বুঝি মিঃ বাসুর খোঁজ করছিলেন?’ চাপা গলায় বললেন বঙ্কিমবাবু।

‘না না, সে অশ্রু লোক।’

‘ওঃ সরি। আচ্ছা আমি এখন চলি। পরে আসবখ’ন।
নমস্কার।’

দরজা বন্ধ করে এসে সুন্দ বলল, ‘কুনাল, ভদ্রলোক কি
বলছিলেন জানিস?’

‘কি?’

‘ইনিই কি মিঃ বাসুর খোঁজ করছেন?’

‘এঁয়।’ কুনাল আঁতকে ওঠে।

‘ভয় নেই। আমি বলেছি সে অশ্রু লোক।’ সুন্দ আশ্বাস
দিল।

‘কে ভদ্রলোক?’

‘বাবু বঙ্কিম হাজরা। মামাবাবুর চেলা। লোক খারাপ নয়
তবে মগজ কিঞ্চিৎ নিরেট।’

‘সত্যি, বোকা লোকগুলো এক এক সময় এমন বেফাঁস কথা
বলে ফেলে।’

কুনাল বিদায় নেবার ঘণ্টাখানেক পরে এল অসিত।

সুন্দ অসিতকে সংক্ষেপে জানাল হরিধনের অন্তর্ধান কাহিনী।
তারপর বলল, ‘বল শুনি, বঙ্কিমবাবুর রহস্যময় আচরণ সম্বন্ধে কি
জানি বলছিলি?’

অসিত বলতে শুরু করে—

‘কোপাই নদীর তীরে গাছতলায় শুয়ে আছি। খানিক পরে
কাৎ হয়ে দেখি, অশ্রু পারে ‘ঝোপের আড়ালে বঙ্কিমবাবু আমার
দিকে একটু পাশ ফিরে বসেছেন। তাঁর হাতে একটা পাখি,—
তিতির। আমি ভাবলাম পাখিটাকে রিং পরাবেন, তাই কৌতূহল
নিয়ে তাকিয়ে রইলাম।’

‘উনি কিন্তু কি করলেন জানিস?’ ব্যাগ থেকে ছোট একটা

শিশি বের করলেন। তারপর আঙুল শিশির মধ্যে ঢুকিয়ে কি জানি তুলে পাখিটার ঠোঁটে, মুখে, ডানায়, পায়ে ঘষে দিতে লাগলেন। বারবার এমন করলেন। এমন কি সেটা খাওয়ানোর চেষ্টাও করলেন।

‘আমি তো হাঁ। করছেন কি? এরপর তিনি তিতিরটা উড়িয়ে দিলেন।’

‘রিং পরালেন না?’ প্রশ্ন করল সুনন্দ।

‘না। আমি দূর্বীন ফোকাস করে লক্ষ্য করেছি। রিং দেখতে পাইনি পাখির পায়ে। বঙ্কিমবাবু এরপর আর একটা তিতির নিলেন হাতে। এবং আগের মতোই উদ্ভট কাণ্ড করে সেটাকেও ছেড়ে দিলেন।’

‘রিং?’

‘উঁহু, তার পায়েও রিং ছিল না। বঙ্কিমবাবু এরপর চলে গেলেন উঠে। শিশিটা ফেলে দিয়ে গেলেন একটা গর্তে। আমি পরে গিয়ে শিশিটা তুলে নিলাম। কিন্তু শিশিতে যে কি ছিল ধরতে পারছি না।’

‘কৈ দেখি শিশিটা?’

অসিত পকেট থেকে একটা ছোট কাচের শিশি বের করল। চেপ্টা ক্রিমের শিশির মতো সাইজ। স্বচ্ছ কাচের তৈরি। প্লাস্টিকের ঢাকনা—তাতে সূক্ষ্ম কয়েকটি ছিদ্র। শিশির ভিতরে কাচের গায়ে পাতলা সরের মতো কি জানি লেগে রয়েছে জায়গায় জায়গায়।

সুনন্দ শিশিতে নাক লাগিয়ে শুঁকল। কেমন বোটকা গন্ধ। চোখের কাছে এনে পরীক্ষা করল। কিন্তু ভিতরে যে কি বস্তু ছিল আন্দাজ করতে পারল না। অবাক হয়ে বলল, ‘কী ছিল এতে? আশ্চর্য! এটা কী লেগে আছে?’

‘জানিস, এই শিশিটা আমি আগেও একবার দেখেছিলাম।’ বলল অসিত।

‘কখন ?’

‘সেই যখন বীদরে বঙ্কিমবাবুর জিনিস ছুঁড়ে ছুঁড়ে ফেলল। আমি তার জিনিস খুঁজতে খুঁজতে এই শিশিটা পাই। গুটা হাতে পেয়ে একটুক্ষণ লক্ষ্য করেছিলাম। ঢাকনা খুলি নি। তখনও কিন্তু মনে হয়েছিল শিশিটা প্রায় খালি শুধু অল্প ক্রিম জাতীয় কি বস্তু রয়েছে ভিতরে।’

তুই বন্ধু হতভম্ব হয়ে বসে থাকে শিশিটার দিকে তাকিয়ে।

সুনন্দ বলল, ‘আমি তো ভাই কিছু কুল পাচ্ছি না।’

‘আমিও না।’

‘একটা কাজ করব ?’

‘কি ?’

‘মামাবাবুকে বলি ব্যাপারটা। উনি যদি কোনো ক্লু—’

‘হুঁ, আমিও তাই ভাবছিলাম। তুই রাখ শিশিটা। মামাবাবুকে দেখাস।’

‘তবে মামাবাবু পাখি নিয়ে যা মেতে আছেন। হয়তো কানেই তুলবেন না। দেখা যাক।’

বিকেলে মামাবাবুর স্টাডিতে ঢুকল সুনন্দ। সামান্য ইতস্ততঃ করে বলে ফেলল বঙ্কিমবাবুর শিশি রহস্য।

মামাবাবু শিশিটা দেখলেন ঘুরিয়ে-ফিরিয়ে। বললেন—‘বেশ, দেখব পরীক্ষা করে। তবে তোমাদের বোধ হয় নিরাশ হতে হবে। হয়তো গুনবে নেহাত ছেলেমানুষী ব্যাপার।’

মামাবাবুর হাতে ওই শিশি তুলে দেওয়ার তিন দিন পরের ঘটনা।

সবে ব্রেকফাস্ট সেরে পড়ার টেবিলে এসে বসেছেন প্রফেসর ঘোষ অর্থাৎ মামাবাবু। সামনে মুখোমুখি বসে সুনন্দ ও আসিত। টেবিলের ওপরে রাখা বঙ্কিমবাবুর সেই রহস্যময় শিশি।

‘এই শিশিতে কি ছিল জান ?’ বললেন মামাবাবু।

—‘কি ?’

‘এক রকম ব্যাকটেরিয়া। জীবাণু।’

‘সে কি !!’ মহা বিস্ময়ে অসিত ও সুন্দ হতভম্ব। ‘কিসের ?’
প্রশ্ন করল তারা।

‘একে একে বলছি।’ মামাবাবু শিশিটা হাতে নিয়ে নাড়াচাড়া
করতে করতে বললেন, ‘প্রথমে আমি শিশির ভিতরে কাঁচের গায়ে
লাগা আঠাল বস্তু একটু নিয়ে স্লাইডস্বে লাগিয়ে মাইক্রোসকোপের
তলায় পরীক্ষা করি, এবং একরকম ব্যাকটেরিয়ার অস্তিত্ব আবিষ্কার
করি। ওই বস্তু বারবার বিশ্লেষণ করলাম নতুন করে নিয়ে। প্রত্যেক
বারই পেলাম সেই একই জাতের ব্যাকটেরিয়া—প্রচুর পরিমাণে।
অবাক হলাম। বুঝলাম, ওই সরের মতো আঠাল বস্তু কোনো
কালচার মিডিয়া। এবং তার মধ্যে এই ব্যাকটেরিয়ার বংশ বৃদ্ধি
ঘটানো হয়েছে। কিন্তু এ জীবাণু যে কি জাতীয় বুঝে উঠতে
পারলাম না।’

‘কালচার মিডিয়া কি ?’ প্রশ্ন করল অসিত।

মামাবাবু জবাব দিলেন, ‘একরকম রাসায়নিক পদার্থ।
ল্যাবরেটরিতে যার মধ্যে জীবাণুকে কালচার অর্থাৎ পালন করা হয়।’

হ্যাঁ, তখন গেলাম মাইক্রোবায়োলজিস্ট ডঃ আয়ারের কাছে।
জীবাণু নিয়েই তাঁর গবেষণা। ডঃ আয়ারও ধরতে পারলেন না।
তিনি আমায় নিয়ে গেলেন আর একজন বিশেষজ্ঞের কাছে—কৃষি
বিজ্ঞানী ডঃ সাহা।

‘ডঃ সাহারও বেশ সময় লাগল জিনিসটা কি সেটা বুঝতে।
তারপর যা রিপোর্ট দিলেন সেটা অদ্ভুত, অবিশ্বাস্য।’

‘ডঃ সাহা বলেছেন—এই ব্যাকটেরিয়া হচ্ছে গমের নেতানো
রোগের কারণ। গমের পাতা ও শীষের নরম অংশের কোষ থেকে
এই জীবাণু খাওয়া আহারণ করে। ফলে পুষ্ট গাছ ষায় শুকিয়ে। সাহা
বলেছেন—এই গমের রোগ ভারতবর্ষে একেবারে নতুন। কৃষি

বিজ্ঞানীরা এ রোগ নিয়ে খুব মাথা ঘামাচ্ছেন। কিন্তু এখনো এর প্রতিরোধের কোনো উপায় বের হয় নি।

‘ডঃ সাহা ভেবেছিলেন, কেউ বুঝি এই ব্যাকটেরিয়া নিয়ে রিসার্চ করছে। তিনি তার নাম জানতে চাইছিলেন।’

‘গমের নেতানো রোগ!’ সুন্দর নাফিয়ে ওঠে।

‘ঠিক এই রোগের ওষুধের ফরমুলা তো বিক্রি করতে চাইছেন মিঃ বাসু।’

‘কে মিঃ বাসু?’ মামাবাবু প্রশ্ন করলেন।

সুন্দর ও অসিত পালা করে বলে গেল মিঃ বাসুর কাহিনী— একেবারে শুরু থেকে। কুনালের কাছে গত বছর রহস্যময় মিঃ বাসুর চিঠি—ফরমুলা বিক্রির প্রস্তাব—কুনালের সন্দেহ—প্রকৃত বৈজ্ঞানিকের খোঁজে তাদের বার বার অভিযান এবং ব্যর্থতা—সমস্ত খুঁটিনাটি।

মামাবাবু ভুরু কুঁচকে শুনে গেলেন আগা-গোড়া। সুন্দরের বর্ণনা শেষ হলে উত্তেজিতভাবে বলে উঠলেন, ‘বটে বটে। শোন আমি কুনালের সঙ্গে কথা বলতে চাই। ওকে আসতে বল। যত তাড়াতাড়ি সম্ভব।’

আধ ঘণ্টার মধ্যেই কুনাল হাজির হল।

মামাবাবু কুনালকে মিঃ বাসুর ধরন-ধারন ও তাঁর ফরমুলাগুলি সম্পর্কে অনেক জিজ্ঞাসাবাদ করলেন। ধানের রান্ধুসে পোকা বা গমের নেতানো রোগের ইতিহাসও জেনে নিলেন। সব শুনে গুম মেরে বসে রইলেন অনেকক্ষণ। অতঃপর সুন্দরকে হুকুম দিলেন ‘বন্ধিমবাবুর বাড়ি যাও। ওনাকে ডেকে আন আমার কাছে। তবে এ ব্যাপারে কিছু ফাঁস কর না। বলবে, আমি বার্ড-ওয়ার্টিংয়ে বেরোচ্ছি। তাই ওঁর সঙ্গে প্রোগ্রাম করতে চাই।’

বন্ধিম হাজারার এন্টালির বাসায় আগে যায় নি সুন্দর। ঠিকানা খুঁজে বের করল। মস্ত পাঁচতলা বাড়িতে তিন কামরার এক ক্ল্যাট নিয়ে বাস করেন বন্ধিমবাবু। নিজের বাড়ি নয়, ভাড়া।

ছঃখের বিষয় ফ্ল্যাটের দরজায় তালা ঝুলছে।

দারোয়ানকে জিজ্ঞেস করে সুন্দর জানল, বন্ধিমবাবু কলকাতার বাইরে গেছেন। কবে ফিরবেন ঠিক নেই।

সুন্দর রিপোর্ট পেয়ে মামাবাবু আরও গম্ভীর হয়ে গেলেন। পরের দিন তিনি কোথায় কোথায় জানি ঘুরলেন। সন্ধ্যাবেলা বাড়ি ফিরেই সুন্দরকে ডেকে বললেন, 'কাল ভোরে তোমাদের বন্ধু তপন দত্তর সঙ্গে দেখা করতে যাব। অসিতকেও নিয়ে চল।'

'মানে সুরভি নার্সারি?'

'হুঁ। এই তপন দত্তর পরিচয় জান? জান ওর ইতিহাস?'

'কেন, তপন কি করেছে?'

'ঠিক কি করেছে সেটাই জানতে চাই। যেটুকু জানতে পেরেছি তপন দত্ত ছিল প্রফেসর তালুকদারের রিসার্চ অ্যাসিস্টেন্ট। বহু দিন কাজ করেছে ডঃ তালুকদারের ল্যাবরেটরিতে। তালুকদার একবার তপন সম্বন্ধে ডঃ সাহার কাছে খুব প্রশংসাও করেছিলেন।'

'ডঃ তালুকদার মানে বিখ্যাত উদ্ভিদ বিজ্ঞানী। বছর চারেক আগে আমেরিকায় ভিজিটিং প্রফেসর হয়ে গিয়ে হঠাৎ মারা যান হার্ট অ্যাটাকে?'

'হ্যাঁ। ওঁর অকালমৃত্যুতে দেশের মস্ত ক্ষতি হয়েছে। ডঃ তালুকদারের সাবজেক্ট ছিল মানুষের খাওয়াশস্য ও ফলমূলের নানান ক্ষতিকারক রোগের কারণ অনুসন্ধান এবং তাদের প্রতিরোধ করার উপায় আবিষ্কার। এই মানুষের কাছে যে অনেক দিন কাজ করেছে সে এ সব রোগ সম্বন্ধে অনেক কিছু জানে বলেই আমার ধারণা।'

সুরভি নার্সারির রূপ এর মধ্যে বিশেষ পালটায় নি। শুধু দেখা গেল প্রধান বাড়িটার দরজা-জানালা সব বন্ধ।

মামাবাবুর সঙ্গে সুন্দর ও অসিত নার্সারির গেট খুলে ঢুকতে চেনা সেই মালীটি এগিয়ে এল।

‘তপনবাবু আছে?’ জিজ্ঞেস করল সুনন্দ।

‘আজ্ঞে না। বাইরে গেছেন।’

‘কোথায়?’

‘আজ্ঞে জানি না।’

খমকে গেল তিনজনে। এ সম্ভাবনা কারো মনে জাগেনি।

অসিত প্রশ্ন করল—‘কবে ফিরবেন?’

‘তা জানি না হুজুর।’

মামাবাবুর মুখের দিকে তাকাল ওরা, এবার কি করা?

মামাবাবু মালীকে প্রশ্ন করলেন, ‘তোমার কাছে চাবি আছে বাড়ির?’

মালী একটু ইতস্তত করে বলল—‘আছে।’

‘শোন আমরা এই বাড়ির ভিতরটা দেখতে চাই।’

ভয়মাখা চোখে মালী বলল, ‘আজ্ঞে, হুকুম নেই। বাবু বকবেন।’

‘কোন বাবু?’

‘বাসু সাহেব।’

‘ও, বাসু সাহেবের সঙ্গে বুঝি গেছে তপনবাবু?’

‘আজ্ঞে হাঁ।’

‘তোমার নাম কি?’

‘আজ্ঞে বলরাম।’

‘কদিন আছ এখানে?’

‘আজ্ঞে তিন বছর। নার্সারি খোলার গোড়া থেকে।’

‘বাড়িতে আর কেউ আছে?’

‘না। রাঁধুনী আর ফ্রব মালী বাড়ি গেছে।’

মামাবাবু বেশ অন্তরঙ্গ সুরে বললেন, ‘শোন বলরাম, আমি খবর পেয়েছি এই নার্সারি বিক্রি করে দেওয়া হবে। আমি নার্সারিটা কিনব ভাবছি। ঘরগুলো একটু দেখতে চাই। নইলে বুঝব কি

করে কত দরে পোষাবে। অনেক দূর থেকে এসেছি। এ জন্তে
 বারবার আসা অস্ববিধে। তুমি একটু ইচ্ছে করলেই কাজটা আজ
 চুকে যায়। ভয় নেই বাসু সাহেব বা কেউ জানতে পারবে না এ
 কথা। এই নাও রাখ এটা, ছেলেদের মিষ্টি কিনে দিও।' মামাবাবু
 মানিব্যাগ থেকে একখানা পাঁচ টাকার নোট বের করে বলরামের
 নাকের সামনে ধরলেন।

বলরামের সসেমিরা অবস্থা। তক্ষুণি হাত বাড়াল না বটে কিন্তু
 লোভী জুলজুল চোখে দেখতে লাগল।

মামাবাবু উৎসাহ দিলেন, 'আরে কোনো ভয় নেই। তুমি
 আমাদের সঙ্গে সঙ্গে থাকবে। একটিবার ঘুরে দেখে নেব। কোনো
 জিনিস নেব না। হ্যাঁ, নার্সারি যদি কিনি তোমাকে আমার চাই।
 তোমার মতো পাকা লোককে ছাড়ছি না। মাইনে এখন যা পাও
 তাতেই হবে তো? ঠিক আছে, তখন দেখা যাবে।'

বাসু, ওতেই কেবল ফতে। বলরাম একগাল হেসে ঘাড় নাড়ল
 এবং নোটটি টেনে নিয়ে ট্যাকে গুঁজে বলল, 'আসুন বাবু।'

বাড়িতে নিচের তলা সুনন্দরা আগে যেমন দেখে গিয়েছিল
 তেমনি রয়েছে—গুদাম, অফিস, বীজ পরীক্ষার সামান্য আয়োজন।

দোতলার সিঁড়ির মুখে তপনের শোওয়ার ঘর। তক্তপোষ খালি।
 কোনো বাক্স-প্যাটার বা বিছানার চিহ্ন নেই। কেবল বুক শেলফে
 কতকগুলো ইংরেজি বাংলা বই ও পত্রিকা। প্রায় সবই কৃষি বা
 রসায়ন বিজ্ঞান।

দ্বিতীয় ঘরে ঢুকে তিন জনে থা।

এ যে পুরোদস্তুর ল্যাবরেটরি।

বেশ বড় ঘর। ছু-খারে লম্বা টেবিল—লাগোয়া র্যাক। টেবিলে
 গ্যাস বার্ণার। টেবিল ও র্যাকে রকমারি মাপের শিশি বোতল,
 টেস্ট-টিউব, বিকার, বকযন্ত্র প্রভৃতি গবেষণার প্রয়োজনীয় সরঞ্জাম।
 কাচ বা প্লাস্টিকের পাত্রে নানা রঙের চূর্ণ তরল পদার্থ, শস্যদানা,

শুকনো পাতা ইত্যাদি। কোনোটা বা খালি। তবে বোঝা যায় এই গবেষণাগার গত কিছুদিন যাবৎ ব্যবহার করা হয় নি। কেমন এলোমেলো ভাবে ছড়ানো জিনিসগুলো। ধুলো জমেছে। কয়েকখানী কাচের স্লাইড রয়েছে টেবিলে, কিন্তু মাইক্রোস্কোপ নেই। বড় আলমারি রয়েছে দেওয়ালের গায়ে। তাতে নিচের তাকে কয়েকটা খালি শিশি। ওপরের তাক সব ফাঁকা।

মামাবাবু টেবিল থেকে একটা শিশি তুলে নিলেন। বঙ্কিমবাবুর কাছে যে শিশিটা পাওয়া গিয়েছিল অবিকল সে রকম। আরও চার-পাঁচটা শিশি রয়েছে। অসিত তাকাল সুন্দর পানে। চোখের ভাষায় বুঝিয়ে দিল—যে বৈজ্ঞানিকের খোঁজে তাদের অ্যাডভেঞ্চার শুরু, এতদিনে বুঝি তার হৃদয় মিলল। কিন্তু এতো লুকোচুরির কারণ কি?

স্মরণি নার্সারির বাড়ি ঘর বাগান ইত্যাদি ঘুরে দেখে ঘণ্টাখানেক পরে সকলে বিদায় নিলেন।

ট্রেনে মামাবাবু প্রায় কথাই বললেন না। কপালে চিন্তার রেখা। সুন্দর তাঁকে কোনো প্রশ্ন করতে সাহস পেল না। এ রকম মুডে থাকলে মামাবাবু কথাবার্তা পছন্দ করেন না। হাওড়া স্টেশনে যখন পৌঁছাল তখন বিকেল প্রায় তিনটে।

ট্রেন থেকে নেমেই মামাবাবু বললেন, ‘পানিহাটি চল। বঙ্কিমবাবুর সেই বাগানবাড়ি।’

‘এখনই?’

‘হুঁ। সময় নষ্ট করা চলবে না। অলরেডি লেট।’

মামাবাবুর স্বভাব এমনি। একবার ঝাঁক চাপলে নাওয়া-খাওয়া চুলোয় যায়। সুন্দর অসিতও উত্তেজিত। টুকরো টুকরো ঘটনাগুলি ক্রমে যেন একটি সূত্রে বাঁধা পড়ছে। ঘটনাপ্রবাহ ছুটে চলেছে কোন রহস্যময় পরিণতির দিকে, কে জানে?

পানিহাটির বাগান বাড়ি আগের মতোই নিস্তন্ধ। গেট খুলে

ভিতরে ঢুকল তিনজনে। সুন্দর অসিত লক্ষ্য করল গেট থেকে বাড়ি
অবধি পথ চেষ্টে পরিষ্কার করা হয়েছে। বাগানও আগের তুলনায়
ছিমছাম। বঙ্কিম হাজরা কি বাড়ি আছেন? থাকার কথা নয়।
কলকাতার বাইরে গেছেন। তাহলে, এখানে কি করতে এসেছেন
মামাবাবু ?

সদর দরজার কাছাকাছি পৌঁছে এদিক-সেদিক তাকাচ্ছে কারো
দেখা পাবার আশায়। গেট খোলার শব্দ হল। এক ভদ্রলোক
ঢুকলেন বাড়িতে। সন্দিক্ধ চোখে দেখতে লাগলেন তাদের। লম্বা
শুঁটকো, টাক মাথা, নাকের ডগায় চশমা বোলা এক বৃদ্ধ। পরনে
ধুতি পাঞ্জাবী। হাতে সৌখীন লাঠি।

‘কি চাই?’ তীক্ষ্ণ স্বরে প্রশ্ন করলেন তিনি।

‘নমস্কার। বঙ্কিমবাবু আছেন? মানে শ্রী বঙ্কিম হাজরা।’
বললেন মামাবাবু।

‘এখানে কোনো হাজরা-ফাজরা থাকে না। আমি থাকি।
আমার নাম শ্রী দোলগোবিন্দ ঢোল।’

‘ও। কিন্তু তিনি ছিলেন আগে। আমরা এসেছি একবার’,
বলল সুন্দর।

‘হতে পারে। কত লোকই তো ছিল এখানে। একশো বছরের
বাড়ি। আমি ছ’মাস হল ভাড়া নিইচি।’

‘বঙ্কিমবাবু কোথায় থাকেন জানেন?’ জিজ্ঞেস করলেন
মামাবাবু।

‘আজ্ঞে না।’

‘আচ্ছা সেই পুরনো মালী আছে? সে হয়তো বলতে পারে।’

‘ও, সেই আপিংখোর বুড়ো। তাকে ছাড়িয়ে দিইচি। বলল,
পুরনো লোক তাই রেখেছিলাম গোড়ায়। দেখি, বেটা অকস্মাৎ
ঢেকি। কেবল বসে বসে ঝিমোয়। ওকে কি কত্তে যে পুষেছিল
মাইনে দিয়ে?’

অগত্যা তিনজনে ফিরে চলল।

দোলগোবিন্দ অতি অভদ্র। গেট অবধি পৌঁছে তো দিলই না, বরং পেছন থেকে খনখনে গলায় হেঁকে বলল, 'ও মশাই, গেটটা বন্ধ করে যাবেন। নইলে গরু ছাগল চুকবে।'

চ্যাক্লিতে মামাবাবু চোখ বুজে চুপচাপ বসে রইলেন। একবার কেবল বলে উঠলেন, 'বুঝলে হে, তিনটে শয়তান ক্রিমিনাল। এক সঙ্গে চক্রান্ত করেছে। অথচ বাইরে থেকে তাদের প্রায় যোগাযোগই নেই। কাউকে ধরা ছোঁয়া যাবে না। চমৎকার প্ল্যান।'

মামাবাবু দাঁতে দাঁত চেপে উচ্চারণ করলেন, 'বেশ দেখা যাক, কদর দৌড়।' যেন তিনি চ্যালেঞ্জ ছুঁড়ে দিলেন ওই তিন-জনের উদ্দেশ্যে।

পাঁচ

দিনান্তে সন্ধ্যার আগমনে কলকাতা শহরের চৌরঙ্গী অঞ্চলের পথ-ঘাট দোকান-পাট বলমল করে উঠল নানা রঙের বৈচিত্র্যিক আলোর বন্যায়।

এই চৌরঙ্গীর বিলাসবহুল প্রিন্স হোটেলের সামনে একটা ট্যাক্সি এসে থামল। গাড়ি থেকে নামলেন এক ব্যক্তি—নিখুঁত সাহেবী পোশাকে সজ্জিত, একটু সামনে বোঁকা কুঁজো ধরন, দাঁতে কামড়ান পাইপ, হাতে একটি ব্রীফকেস। এই ভদ্রলোকের সাক্ষাৎ পাঠক আগেও কয়েকবার পেয়েছেন। ইনি মিস্টার বাসু।

মিঃ বাসু গটগট করে ঢুকলেন হোটেলে। রিসেপসনিস্টের কাছে গিয়ে বললেন, ‘মিঃ কার্পেটারের সঙ্গে দেখা করতে চাই। কুড়ি নম্বর সুইট।’

‘আপনার নাম?’ জানতে চাইল রিসেপসনিস্ট মেয়েটি।

‘মিস্টার বি বাসু।’

‘আঃ, মিঃ বাসু! ইউ আর ওয়েলকাম। আপনি সোজা চলে যান কুড়ি নম্বরে। মিঃ কার্পেটারের নির্দেশ আছে আপনি এলেই পাঠিয়ে দিতে। আমি ফোনে ওনাকে আপনার খবর দিচ্ছি।’

কুড়ি নম্বর ঘরের বেল টিপলেন মিঃ বাসু।

‘আপনি কি মিঃ বাসু?’ দরজা খুলে ইংরেজিতে প্রশ্ন করলেন এক লম্বা ফর্সা সুদর্শন প্রৌঢ়।

‘ইয়েস।’

‘গুড ইভনিং। আমি কার্পেটার।’ তিনি সাদরে করমর্দন করলেন বাসুর সঙ্গে। আহ্বান জানালেন, ‘দয়া করে ভিতরে আসুন।’

চেয়ারে বসলেন বাসু। লক্ষ্য করে দেখলেন মিঃ কার্পেন্টারকে।
ভদ্রলোকের চোখে-মুখে প্রখর বুদ্ধির ছাপ। তবে কথা বা ভাবভঙ্গি
বেশ সহজ। ভারত কেমিক্যালস্ অ্যাণ্ড ফারমাসিউটিক্যালস্
লিমিটেডের মতো বড় ওষুধ কোম্পানির ম্যানেজিং ডিরেকটর আরও
ভারি কি জাদুরেল-দর্শন হবেন বলে তিনি আশা করেছিলেন।

‘আপনার ফরমুলার কাগজ-পত্র এনেছেন? আর সলিউশনের
সাম্প্ল?’ মিঃ কার্পেন্টার কথা বলছিলেন চোস্ত ইংরেজিতে।

‘হ্যাঁ।’—মিঃ বাসু ব্রীফকেস খুললেন। এক তাড়া টাইপ করা
কাগজ বের করলেন এবং ছোট একটি শিশি। শিশি ভর্তি কোন
তরল পদার্থ। কাগজ ও শিশি রাখলেন সামনের টেবিলে।

‘এবার আপনার দর বলুন মিঃ বাসু।’

সামান্য ইতস্ততঃ করলেন বাসু। বললেন, ‘আগে পেপারস্
পরীক্ষা করুন। সলিউশন টেস্ট করুন। তারপর না হয় দর-দাম
নিয়ে কথা হবে।’

‘পরীক্ষা করা হবে বৈ কি। কিন্তু ওসব হচ্ছে শ্রেফ ফরম্যালিটি।
আমি জানি আপনার ফরমুলা খাঁটি। কাজেই আসল কথাবার্তা যত
তাড়াতাড়ি এগোয় ততই ভাল।’

একটুক্ষণ চুপ করে, ভেবে বাসু বললেন, ‘মাই প্রাইস ইজ টুয়েন্টি-
ফাইভ থাউজেণ্ড। রয়ালটি চাই না। পেটেন্ট রাইট আপানাদের
দিয়ে দেব।’

‘টাইট্‌স্ অল রাইট। কোম্পানির একস্পার্টকে পেপারস্ এবং
সলিউশন পরীক্ষা করিয়ে আশা করছি ছু-সপ্তাহের মধ্যে আমরা
ফাইনাল এগ্রিমেন্ট করে ফেলতে পারব।’

মিঃ বাসুর ভাব দেখে মনে হল এত সহজে রাজি হয়ে যাবে
তিনি ভাবেন নি।

‘লেটআস সেলিব্রেট। ড্রিংক্‌স্? অথবা চা-কফি?’

‘থ্যাংক-য্যু। কফি।’

মিঃ কার্পেণ্টার বেয়ারাকে ডেকে কফির অর্ডার দিলেন।

কফি খেতে খেতে কার্পেণ্টার বললেন, 'আচ্ছা মিঃ বাসু রিসার্চের খরচ নিশ্চয় অনেক?'

হ্যাঁ

আপনার বোধহয় অনেক টাকা?'

'মোটাই না।'

'একটা কথা বলি, যদি আপনাকে আমাদের কোম্পানির রিসার্চ ডিপার্টমেন্টের ভার নিতে অনুরোধ করি, রাজি আছেন? আপনি কত মাইনে চান বলুন, হোয়াটস ইওর প্রাইস?'

'সরি। আপনার অফার আমি গ্রহণ করতে পারলাম না,' জানালেন মিঃ বাসু।

মিঃ বাসু বুঝলেন এই কারণেই জোনাল ম্যানেজারের বদলে ম্যানেজিং ডিরেকটর স্বয়ং আজ তাঁর সঙ্গে দেখা করেছেন। ভারত কেমিক্যালসকেই তিনি গত বছর ধানের রান্ধুসে পোকা মারার ঔষুধের ফরমুলা বিক্রি করেছিলেন। কিন্তু সেবার তাঁর সঙ্গে ব্যবসায়িক কথা বলেন জোনাল ম্যানেজার মিঃ গুরদেব সিং। এবার এই কোম্পানিকে গমের নেতানো রোগের জীবাণুনাশক ঔষুধের ফরমুলা বিক্রির প্রস্তাব দিতে জোনাল ম্যানেজারের উত্তর আসে স্বয়ং ম্যানেজিং ডিরেকটর তাঁর সঙ্গে কথা বলবেন এ বিষয়ে। তিনি যেন মিঃ কার্পেণ্টারের সঙ্গে এই হোটেলে দেখা করেন। সাক্ষাতের সময় নির্দেশ করা ছিল চিঠিতে।

চিঠি পেয়ে বেশ অবাক হয়েছিলেন বাসু। এবার বৌঝা গেল হেতু।

মিঃ কার্পেণ্টার হাসলেন, 'আমি জানতাম আপনি রাজি হবেন না। বৈজ্ঞানিকরা কারো অধীনে কাজ করতে চান না বড়। অবশ্য এতে আপনার লোকসান হোত না। বরং উভয় পক্ষের লাভ। আপনাকে গবেষণার পূর্ণ স্বাধীনতা এবং সুযোগ দিত কোম্পানি।

‘নো। ভেরি মরি।’ ঘাড় নাড়লেন বাসু।

‘ঠিক আছে। আপনার সংকোচের কোনো কারণ নেই। আমার প্রস্তাব দিলেই। এখন আপনার অভিরূচি। যদি মত পরিবর্তন করেন, আমায় জানাবেন।’

কফি খেতে খেতে স্লাম্পলের শিশিটা নাড়াচাড়া করতে করতে অনমনস্ক হয়ে যান কার্পেন্টার। মিঃ বাসু কৌতূহলী দৃষ্টিতে তাঁকে লক্ষ্য করেন। মিঃ কার্পেন্টার বুঝতে পারেন। অপ্রস্তুত ভাবে হেসে বললেন, ‘আমি একটা স্বপ্ন দেখছিলাম। এক বিরাট আশাভরা স্বপ্ন।’

‘কি স্বপ্ন শুনতে পারি?’

‘আমি ব্যবসায়ি মানুষ। আমার স্বপ্ন আর আপনার মতো বৈজ্ঞানিকের স্বপ্নের প্রকৃতি আলাদা। আমার স্বপ্ন, আমার উচ্চাকাঙ্ক্ষা, আমার ব্যবসাকে ঘিরে।’

মিঃ বাসু জিজ্ঞাসু নেত্রে তাকিয়ে থাকেন।

কার্পেন্টার বলে চলেন, ‘আমি ভাবছিলাম এই সলিউশন আমাদের কোম্পানিকে নিশ্চয় লাভ এনে দেবে। কিন্তু তা আর কতটুকু? এমনি আরও কয়েকটা আশ্চর্য প্রোডাক্ট যদি বাজারে ছাড়তে পারতাম। তাহলে—ওঃ, কি বিপুল লাভ! ভারত কেমিক্যালসের চেহারা পালটে যেত। সারা ছনিয়ায় তার নাম ছড়িয়ে পড়ত।’

মিঃ বাসু হেসে বললেন, ‘অর্থাৎ প্রথমে ঘটা চাই ফসলের মহামারী। তারপর চাই তাদের প্রতিরোধক ঔষধ। তবে আপনার স্বপ্ন সার্থক হবে। তাই না?’

‘তা বটে।’ হতাশ ভাবে মাথা নাড়েন কার্পেন্টার। ‘আমার স্বপ্ন একটু অবাস্তব মানছি। তবু ভাবি যদি তা সম্ভব হোত’—তিনি কেমন যেন উৎসুক ভাবে তাকিয়ে থাকেন। মিঃ বাসুর চোখে।

মিঃ বাসু চোখ সরিয়ে নিলেন। মাথা নিচু করে চিন্তা করলেন

কি জানি। তারপর ধীরে ধীরে বললেন, 'মিঃ কার্পেন্টার, বৈজ্ঞানিক যেমন রোগ দমন করার উপায় আবিষ্কার করে, তেমনি সে ইচ্ছে করলে রোগের বীজও তৈরি করতে পারে।'

কার্পেন্টার তীব্র কণ্ঠে বলে উঠেন, 'মিঃ বাসু, আমি জানি বিজ্ঞানের ক্ষমতা সীমাহীন। আমি জানি, আপনি ইচ্ছা করলে মনুষ্যের খাদ্য ফসল ধ্বংসের জীবাণু আবিষ্কার করতে পারেন এবং সেই জীবাণুকে রোধ করার ঔষধ। কি, পারেন না? সত্যি করে বলুন?'

'হয়তো পারি।' মুছ কণ্ঠে জবাব আসে।

'তাহলে দিন আমাদের। অন্তত একটা কোনো জুংসই শস্য রোগের জীবাণু। আর তাকে প্রতিরোধ করার ঔষধ। ভারত কেমিক্যালস আপনার বৈজ্ঞানিক প্রতিভার যথাযোগ্য মূল্য দিতে প্রস্তুত।'

'বুঝলাম। কিন্তু আমি নিঃসঙ্গ বৈজ্ঞানিক। আপনি যে বিরাট এলাকা জুড়ে ব্যবসার কথা ভাবছেন, এই সব জায়গায় মাঝে মাঝে চাষের ক্ষেতে ওই রোগের বীজকে ছড়িয়ে দিতে হবে। কিন্তু সে ক্ষমতা আমার নেই।'

'লোকবল আপনার না থাক আমার আছে।' কার্পেন্টার উত্তেজিত হয়ে উঠলেন, 'ভারত কেমিক্যালসের টাকা বা অনুগত বিশ্বাসী কর্মচারীর অভাব নেই। আপনি শুধু অস্ত্রটি আমার হাতে তুলে দিন।' বিকট উল্লাসে উৎফুল্ল হয়ে ওঠেন তিনি।

'আচ্ছা, রোগটা কোন্ শস্য নষ্ট করবে?' জিজ্ঞেস করলেন কার্পেন্টার।

'ধান।'

'রোগ সৃষ্টির কারণ কি হবে? পোকা না জীবাণু?'

'পোকা বা জীবাণু নয়। এক রকম ছত্রাক।'

'ভেরি গুড। কবে পাওয়া যাবে?'

মিঃ বাসু ভুরু কুঁচকে ভেবে উত্তর দিলেন, 'আমার রিসার্চ এখনো সামান্য বাকি। সাত-আট দিন বাদে আমি জানাব এই ছত্রাক এবং তার উপযুক্ত ঔষধের ফরমুলা কবে নাগাদ আপনাদের দিতে পারব।'

মিঃ কার্পেণ্টার বললেন, 'বেশ। আমি আপনার খবরের প্রতীক্ষায় থাকব। আর চিঠিটা দেবেন আমার নামে—কোম্পানির বোম্বাই হেড অফিসের ঠিকানায়। খামের ওপর লিখে দেবেন—পার্সোনাল।'

ম্যানেজিং ডিরেকটর কার্পেণ্টার চুরুট ধরিয়েছেন। মিঃ বাসু গম্ভীরভাবে টানছেন পাইপ। অল্প উসখুস করে কার্পেণ্টার বললেন, 'আর একটি অনুরোধ।'

'বলুন।'

'আমার এক বন্ধু। বিদেশী। ওদের ফল-মূলের বিরাট কারবার। দেশে বিদেশে চালান দেয়—বিশেষত আলু। গত দু বছর ধরে ওদের কারবার মন্দা যাচ্ছে। কারণ প্রধানতঃ যে দেশে ওরা আলু চালান দিত তারা অনেক কম কিনছে। ওই দেশে নাকি আলুর উৎপাদন বেড়েছে। ফলে বন্ধুর ফার্মের গুদামে প্রচুর আলু জমে গেছে। সে আলু বাজারে বিক্রি করতে হলে অনেক কম দামে ছাড়তে হবে। বেজায় লোকসান। বন্ধু বলছিল, যদি কোনো উপায়ে অন্তত এক বছর ওই দেশে আলুর ফলন মার খেয়ে যায় তাহলে ওই দেশ ফের তার ফার্ম থেকে বেশি করে আলু কিনতে বাধ্য হবে। তাদের বাড়তি আলুর স্টকের সদগতি হয়ে যাবে। আমার বন্ধু ভাবছিল, দৈবের ওপর নির্ভর না করে, কোনো কৃত্রিম উপায়ে যদি খদ্দের দেশটির আলুর ফলন নষ্ট করা যায়? আপনি কি এ ব্যাপারে তাকে সাহায্য করতে পারেন না? এ জন্ম সে যথেষ্ট খরচ করতেও রাজি।'

'কত?' প্রশ্ন করলেন বাসু।

‘যদি মোটামুটি ত্রিশ ভাগ আলুর ফলন নষ্ট করার ব্যবস্থা করতে পারে কেউ—লাখ ছই দিতে আটকাবে না।’

ছ-লাখ টাকা! লোভে জ্বলজ্বল করে ওঠে মিঃ বাসুর চোখ। কোনো রকমে নিজেকে সামলে নিয়ে বাঁকা হেসে ‘শান্ত কণ্ঠে বললেন, ‘হয়তো এ রকম ব্যবস্থাও আমি পারি। এক রকম ভাইরাস আমার নজরে এসেছে—যা আলুর পক্ষে মারাত্মক। এবং অতি দ্রুত তার বংশবৃদ্ধি ঘটে।’

‘ও ভাইরাস? আচ্ছা ভাইরাস তো একরকম জীবাণু?’ গম্ভীর ভাবে বললেন কার্পেন্টার।’

মনে মনে হাসলেন বাসু। বুঝলেন, মিঃ কার্পেন্টার জাঁদরেল পরিচালক হতে পারেন কিন্তু ভদ্রলোকের প্রাণবিজ্ঞানের জ্ঞান কম। মিঃ বাসু বললেন, ‘ভাইরাসকে জীবাণু বলতে পারেন, আবার নাও বলতে পারেন। এদের কেউ বলে জড়। কেউ বলে জীব। বরং বলা যায় এই ছইয়ের মাঝামাঝি। এমনিতে এরা জড় অবস্থায় থাকে। কিন্তু কোনো সজীব প্রাণী বা উদ্ভিদ কোষের আশ্রয় পেলেই এরা বংশ বৃদ্ধি করে। অর্থাৎ জীবন্ত হয়। আকারে অতি ক্ষুদ্র। খুব জোরালো মাইক্রোস্কোপ ছাড়া দেখা যায় না। এরা জীবন্ত প্রাণী ও উদ্ভিদের মধ্যে নানা ধরনের রোগ ছড়ায়। এ যাবৎ অনেক রকম ভাইরাস আবিষ্কৃত হয়েছে। আমি যে ভাইরাসের খোঁজ পেয়েছি তা আলুর ক্ষেতে ছড়ালে শতকরা ত্রিশ কেন চল্লিশ ভাগ ফসল ধ্বংস হতে বাধ্য।’

‘সুপ্লেনডিড!’ টেবিল চাপড়ালেন কার্পেন্টার। ‘আমার বন্ধুর এজেন্টের হাতে ওই ভাইরাস তুলে দেওয়া মাত্র অর্ধেক পেমেন্ট পেয়ে যাবেন। বাকি অর্ধেক পাবেন কার্যসিদ্ধির পর।’

‘আমার কিন্তু সময় চাই—অন্তত কয়েক মাস। ল্যাবরেটরিতে কালচার করে প্রচুর ভাইরাস তৈরি করতে হবে—এ তাড়াছড়োর ব্যাপার নয়।’

‘বেশ। বেশ। নিন সময়। আমি আমার বন্ধুকে সুসংবাদটি

জানিয়ে দিচ্ছি। তবে হ্যাঁ, আমার কোম্পানির ইনটারেস্ট কিন্তু প্রথম। আগে অস্ত্রীর অর্ডারটা সাপ্লাই করে তারপর আমার বন্ধুর ব্যবস্থা।

‘নিশ্চয়’ সম্মতি জানালেন মিঃ বাসু।

বাইরে নির্বিকার দেখালেও মিঃ বাসুর হৃদয়ে আনন্দের জোয়ার।
আঃ, আজ বড় শুভ দিন! কি বিরাট উপার্জনের সুযোগ এসে গেল—
কত সহজে!

এবার মিঃ বাসু বিদায় নিলেন।

প্রিন্স হোটেলের ঠিক উল্টো দিকে এসপ্লানেড। এলাকাটা তখন গমগম করছে। ফুটপাথ ঘেঁষে লাগানো সারি সারি অপেক্ষমান মোটর গাড়ির পিছনে তিন ব্যক্তি স্থির হয়ে দাঁড়িয়ে—সুনন্দ, অসিত এবং মামাবাবু। তাদের দৃষ্টি ওই হোটেলের গেটে নিবদ্ধ। মিঃ বাসুকে হোটেলে ঢুকতে দেখেছিল তারা। দেড় ঘণ্টা বাদে তাঁকে বেরিয়ে আসতে দেখা গেল।

সুনন্দ অসিতকে নিয়ে মামাবাবু যখন এইখানে লুকিয়ে অপেক্ষা করতে লাগলেন তখন অবাক হয়ে গিয়েছিল ছুই বন্ধু। তারপর সামনের হোটেলে হঠাৎ মিঃ বাসুকে ঢুকতে দেখে আঁচ করল ব্যাপার। তাকে দেখে মামাবাবু একবার জিজ্ঞেস করেছিলেন, ‘মিঃ বাসু না?’—‘হ্যাঁ’—তারা ঘাড় নেড়েছিল। কিন্তু মামাবাবু কি করে এখানে এই সময়ে বাসুর আগমন হবে টের পেলেন সে রহস্য তাদের কাছে পরিষ্কার হয় নি। বাসু ট্যাক্সি ধরার সঙ্গে সঙ্গে তাদের কাছে দাঁড়ানো এক ট্যাক্সির চালক ঘাড় ফিরিয়ে মামাবাবুর দিকে চাইল। মামাবাবু কি জানি ইঙ্গিত করলেন তাকে। অমনি তার গাড়ির ইঞ্জিন সচল হয়ে উঠল। এবং সুনন্দরা লক্ষ্য করল যে বাসুর ট্যাক্সির পিছন ধরল এই ট্যাক্সিটা। ছুটো গাড়িই মিলিয়ে গেল রাজপথে।

‘চল ফিরি!’ বললেন মামাবাবু।

ঘণ্টাখানেক পরে টেলিফোন বাজলেই মামাবাবু ঝাঁপিয়ে পড়ে

তুলে নিলেন রিসিভার। মিনিট পাঁচ কথা হল কারো সঙ্গে। রিসিভার নামিয়ে তিনি ডেকে বললেন, 'স্বনন্দ রেডিও। এখুনি বেরোতে হবে। মিঃ পিল্লাই গাড়ি নিয়ে আসছেন আমাদের তুলে নিতে।'

শুধু স্বনন্দ নয়। মামাবাবুর সঙ্গে আরও দু-জন যাবার জন্ত প্রস্তুত। অসিত এবং কুনাল। বাড়ি ফিরেই স্বনন্দ কুনালকে ফোনে ডেকে বলেছিল, 'মিঃ বাসুর দেখা পাওয়া গেছে। একটা সিরিয়াস কিছু ঘটতে যাচ্ছে। চলে আয় এখানে। কুইক্‌।'

রাত প্রায় আটটা।

ব্যারাকপুর ট্রাংক রোড ধরে তীব্র গতিতে ছুটে চলেছে এক ধূসররঙা ফিয়াট গাড়ি।

গাড়ির সামনের সিটে ড্রাইভারের পাশে বসে আছেন মামাবাবু এবং মিঃ পিল্লাই। পিছনের সিটে—স্বনন্দ, অসিত ও কুনাল।

মিঃ পিল্লাই মাঝবয়সী, শক্ত সমর্থ মানুষ। মাঝে মাঝে তিনি ও মামাবাবু নিচু স্বরে কি সব পরামর্শ করছেন, কখনো ইংরেজিতে কখনো বা বাংলায়। পিল্লাইয়ের বাংলা ঝরঝরে। যদিও সামান্য অবাঙ্গালী টান আছে। পিছনের তিন আরোহী বাক্যহারা। টানটান হয়ে একাগ্র চিত্তে লক্ষ্য রাখছে সামনের দুজনের হাব-ভাব।

হু হু করে এগোয় মোটর। পেরিয়ে যায় সোদপুর, খড়দা, টিটাগড়—ক্রমে পৌঁছয় পথের শেষ প্রান্তে। ব্যারাকপুর।

গঙ্গার ধারে চওড়া পিচ ঢাকা নির্জন রাস্তা। দু পাশে বড় বড় কমপাউণ্ডলা বাড়ি। বেশির ভাগ খুব পুরনো। এক রাস্তার মোড়ে গাড়ি থেমে পড়ল। গাছের ছায়া থেকে বেরিয়ে একজন কাছে এল। সেই ট্যাক্সি ড্রাইভার। চৌরঙ্গীর প্রিন্স হোটেল থেকে মিঃ বাসুর ট্যাক্সিকে অনুসরণ করেছিল যে।

মামাবাবু ও মিঃ পিল্লাইয়ের সঙ্গে লোকটির কি জানি কথা হল। মামাবাবু স্বনন্দদের ডাকলেন, 'নেমে এস।'

পিল্লাইয়ের গাড়ি সহ ডাইভার রইল সেখানে। বাকি ছয়জন হেঁটে চলল। পথ দেখিয়ে চলেছে সেই ট্যাক্সিচালক। একটা গেটের সামনে থামল ওরা। লোহার প্রকাণ্ড গেট। উঁচু পাঁচিল ঘেরা বাড়ি। দোতলা। বিশাল বিশাল গাছে অন্ধকার হয়ে আছে মস্ত বাগান। আবছা চাঁদের আলোয় ভুতুড়ে লাগছে বাড়িখানা।

গেট ঠেললেন পিল্লাই। ক্যাচ—শব্দ হল।

হঠাৎ কোথেকে সামনে এসে দাঁড়াল একটা লোক।

রাস্তার ল্যাম্পপোস্টের আলোতে দেখা গেল—লোকটা রীতিমত গাঁট্রাগোঁট্রা। গায়ে স্পোর্টস গেঞ্জি ও ফুল প্যান্ট। রুক্ষ মুখ।

‘মিঃ বাসুর সঙ্গে দেখা করতে চাই।’ জবাব দিলেন মামাবাবু।

‘এখানে মিঃ বাসু বলে কেউ থাকে না।’ কড়া সুরে বলল লোকটা।

মামাবাবু অর্থপূর্ণ দৃষ্টিতে চাইলেন তাদের গাইডের দিকে। নিঃশব্দে মাথা হেলাল লোকটি। এবার মামাবাবু দৃঢ় স্বরে বললেন, ‘মিঃ বাসু এখানে থাকেন কিনা জানি না। তবে আপাতত তিনি এবাড়িতে আছেন। আমরা তাঁর সঙ্গে দেখা করব।’

‘না, বাড়িতে ঢোকা চলবে না।’ লোকটি ক্রুদ্ধ ভঙ্গিতে পথ আগলে দাঁড়াল। বোঝা গেল সে সহজে কাউকে ঢুকতে দেবে না। দরকার হলে হাঙ্গামা বাঁধাতেও প্রস্তুত।

মিঃ পিল্লাই এবার পকেট থেকে একখানি কার্ড বের করে লোকটির চোখের ওপর তুলে ধরলেন। ‘পুলিস’—তাঁর মূহু স্পষ্ট উচ্চারণ কারোরই কান এড়াল না।

লোকটা চমকে পিছিয়ে গেল কয় পা।

‘খবরদার পালাবার চেষ্টা কর না।’ পিল্লাইয়ের ডান হাতে আবিভূত হল এক চকচকে রিভলভার। তিনি ডাকলেন, ‘ফাগুলাল।’

‘ইয়েস স্যার।’ গাইড এসে লোকটির হাত চেপে ধরল। ‘যাও

এর সঙ্গে', কঠিন স্বরে আদেশ দিলেন পিল্লাই। লোকটা হুড়হুড় করে ফাগুলালের সঙ্গে চলে গেল যেদিকে পিল্লাই গাড়ি রেখে এসেছেন। সুন্দদের বুঝতে অসুবিধে হল না যে পিল্লাই এবং ফাগুলাল পুলিশের লোক।

পাঁচজনে এবার এগিয়ে চলল দোতলা বাড়িখানা লক্ষ্য করে।

বাড়ির বাইরে মিটমিট করে জ্বলছে একটা বৈদ্যুতিক বাতি। নিচের তলা ঘুটঘুট করছে। মাথার ওপর বুল বারান্দা। দোতলায় একটি মাত্র জানলায় আলোর রেখা। সদর দরজা বন্ধ।

বাড়ির চারপাশে ঘুরতে থাকে দলটা। পকেট থেকে টর্চ বের করেছেন পিল্লাই। আলো ফেলে দেখছেন এক তলার প্রত্যেকটি জানলা। জানলাগুলো প্রকাণ্ড। খড়খড়ি লাগানো পাল্লাগুলো বন্ধ। তার পেছনে কাচের শার্শি আঁটা। গরাদ নেই। প্রত্যেক জানলার খড়খড়ি তুলে ভিতরে হাত ঢুকিয়ে পরীক্ষা করছিলেন পিল্লাই। হঠাৎ তিনি সামান্য খুটখাট করে একটা জানলার পাল্লা খুলে ফেললেন। দেখা গেল সেই শার্শির এক জায়গায় ভাঙা। পিল্লাই বললেন, 'একজন নিচে থাকুন পাহারায়। অগ্ররা ভিতরে ঢুকবে। কে থাকবেন? আপনি?' তিনি কুনালকে জিজ্ঞেস করলেন।

'বেশ।' কুনাল সম্মতি জানাল।

হাতে ভর দিয়ে জানলার আলসেয় উঠে ঘরের মধ্যে নেমে পড়ল একে একে চারজন। ভাগ্য ভাল, ঘরের দরজা ভেজানো। ঠেলতে খুলে গেল। মনে হল সেটা রান্নাঘর!

ঘর থেকে বেরিয়ে চণ্ডা প্যাসেজ। ছুপাশে ঘর। বেশির ভাগ দরজা হাট করে খোলা বা ভেজানো। ক্রমে সিঁড়ির মুখে হাজির হল তারা। দোতলায় কাদের কথা শোনা যাচ্ছে। পা টিপে টিপে চারজন উপরে উঠল।

দোতলায় মুখোমুখি দুই দুই চারখানা ঘর। একটা ঘর থেকে

ভেসে আসছিল মানুষের গলার আওয়াজ। অগ্নি ঘরগুলোয় জনপ্রাণীর চিহ্ন নেই। সবাই গিয়ে দাঁড়াল ওই ঘরের সামনে। দরজার কবাট বন্ধ কবাটের ফাঁক দিয়ে দেখা যাচ্ছে ভিতরের আলোর ক্ষীণ রেখা। মামাবাবুর দল দরজার গায়ে কান পাতল।

‘আর একবার ভাল করে ভেবে দেখ, তপন।’ কর্কশ ত্রুন্ধকণ্ঠে কথা বলল কেউ।

‘আমি ভেবে দেখেছি মিস্টার বাবু।’ এ গলা তপনের। চিনতে ভুল করেনি সুন্দর বা অসিত।

‘অর্থাৎ আমার প্রস্তাব তুমি মানবে না?’

সুন্দর মনে হল এ গলাও যেন তার চেনা। কোথায় শুনেছে।

‘মূর্থ। নিজের পায়ে কুড়ুল মারতে চাও? আমি এই শেষ বারের মতো জিজ্ঞেস করছি। বল রাজি কি না?’

‘না না।’ তপন আতঁষরে বলে উঠল।

মিঃ বাবু ধমকে উঠলেন, ‘বোকামি কর না। বেশ! তোমায় আরও ছু-হাজার বেশি দিচ্ছি। মোট সাত হাজার টাকা। আর পুরনো ধার সব ছেড়ে দেব। এবং ভবিষ্যতে তোমার কাছে এ ধরনের কিছু আর কখনো চাইব না।’

‘আমায় মাপ করুন। আমার গুরু ডক্টর তালুকদার বলতেন, মানুষের মঙ্গলের জন্য বিজ্ঞান। এ কাজ করলে তিনি স্বর্গ থেকে আমার অভিশাপ দেবেন।’

‘স্যাট-আপ! আবার লেকচার। বটে সোজা আঙুলে ঘি উঠবে না। তোমার মতো একগুঁয়েকে চিট্ করার রাস্তা আমি জানি। শোন, তোমার ছোট ভাই বিমান, আপাতত তাকে গায়েব করে এনে লুকিয়ে রেখেছি এক গুপ্তার আড্ডায়। যদি আমার কথা মতো না চল, তাকে আর কোন দিন ফিরে পারে না।’

‘মিঃ বাবু, প্লীজ!’ তপন কাতর অনুনয় জমািল। ‘আপনি আমার অনেক উপকার করেছেন, আমি কৃতজ্ঞ। আমায় দয়া করুন।’

‘দয়া?’ অটুহাসিতে ফেটে পড়লেন বাসু।

‘দয়া-দাক্ষিণ্য বিতরণ আমার ব্যবসা নয়। আমি যা করেছি তার প্রতিদান চাই।’

‘বলুন কি ভাবে আপনার ঋণ শোধ করব। শুধু জেনেশুনে মানুষের ক্ষতি করতে পারব না। এইটুকু ভিক্ষা চাই। তাছাড়া যা আদেশ করেন। আচ্ছা আপনার তো টাকা চাই? আমায় একটু সময় দিন। এখনো আমাদের দেশে ফসলের কত রোগ দমন করার কোনো ভাল ব্যবস্থা নেই। আমি ওই সব রোগ প্রতিরোধের ঔষধ আবিষ্কার করব। তার সমস্ত সত্ত্ব দিয়ে দেব আপনাকে। তাই থেকে প্রচুর রোজগার করতে পারবেন।’

‘নো। অত অপেক্ষা করার সময় আমার নেই। আমি এখুনি টাকা চাই। অনেক—অনেক টাকা। এবং তার উপায় তোমায় বলেছি। কি রাজি?’

‘না।’

‘অল রাইট। তোমার জেদের ফল কি হবে জান।’

‘কি?’

‘তোমার ভাইয়ের সর্বনাশ। ওকে জোর করে মরফিয়া ইনজেকসন দিয়ে নেশা ধরাব। নেশার জিনিসের লোভ দেখিয়ে তখন ওকে দিয়ে যে কোনো কুকর্ম করানো যাবে। ভেবেছি, ওকে বানাব—ফার্স্ট ক্লাস খুনে গুণ্ডা। অবশ্য মরফিয়ার অভ্যেস ভাল মতো ধরলে মানুষ বেশি দিন আর সুস্থ থাকে না। কয়েক বছরের মধ্যেই ও জড়বুদ্ধি বিকলাঙ্গ হয়ে মরবে।’

‘শয়তান!’ ধড়াম করে শব্দ হল ঘরে।

‘উঃ।’ কাৎরে উঠলেন মিঃ বাসু। বিকৃত তর্জন শোনা গেল তার কণ্ঠে, ‘কি! আমার গায়ে হাত! দাঁড়াও, চাবকে তোমার ছাল তুলে দিচ্ছি।’

সপাং সপাং । বাতাস কেটে চাবুকের হিংস্র ছোবলের শব্দ শোনা
গেল ছু ছু-বার । যন্ত্রণায় আত্ননাদ করে উঠল তপন ।

ঘরের বাইরে চারজন রুদ্ধশ্বাসে শুনছিল । সুন্দ আর স্থির
থাকতে পারল না । দরজায় ধাক্কা মারতে মারতে চিৎকার করে
উঠল—খবরদার । দরজা খুলুন মিস্টার বাবু । ভয় নেই
তপন ! আমি নন্দ ।’

মুহূর্তে ঘর নিস্তরূ হয়ে গেল । দপ্ করে নিবে গেল ঘরের
আলো ।

খুট করে শব্দ হল । যেন ছিটকিনি খুলল কেউ । তারপর
কবার্ট খোলার মূছ আওয়াজ । সুন্দ যেটা ঠেলছে সেটা কিন্তু
খুলল না । মামাবাবু চেঁচিয়ে উঠলেন, ‘ও পালাচ্ছে । বারান্দার
দরজা খুলে । নিশ্চয়ই বাইরে সিঁড়ি আছে নামার ।’

সুন্দ অসিত ছুড়াড় করে ছুটল নিচে । তাদের মনে পড়েছে—
একটা সরু ঘোরানো লোহার সিঁড়ি দেখেছিল বাড়ির পিছনে ।
বাইরে থেকে ওই সিঁড়ি বেয়ে দোতলায় ওঠা-নামা করা যায় ।

ছয়

অন্ধকার প্যাসেজ। সিঁড়ি হাতড়ে হাতড়ে এগোতে সময় নিল। নিচের সদর দরজা খুলে দুজনে ছুটল সিঁড়ির কাছে। কেউ কোথাও নেই। বিমূঢ় হয়ে এদিকে সেদিকে তাকাচ্ছে, কানে এল ভারি কিছু পড়ার শব্দ। তারপরই ধ্বস্তাধ্বস্তির আওয়াজ। ডান পাশে শব্দ লক্ষ্য করে দৌড়ে গেল তারা।

পাঁচিলের কাছে দুজন বাটাপাটি করছে। একজন মাটিতে। অন্যজন তার বকের ওপর।

সুনন্দরা পৌঁছনর আগেই ওপরের লোকটি হেঁচকা টানে নিজেকে ছাড়িয়ে নিয়ে ছুটল পাঁচিলের দিকে। চাঁদের আলোয় চেনা গেল তাকে—মিঃ বাসু।

‘ওকে ধর।’ চেষ্টা করে উঠল বাসুর বাধাদানকারী কুনাল।

মিঃ বাসু পাঁচিলের গায়ে লাফ দিয়ে ওঠার সঙ্গে সঙ্গে তার ওপর ঝাঁপিয়ে পড়ল সুনন্দ ও অসিত।

বাসুরে, বাসুর গায়ে কি প্রচণ্ড শক্তি। প্রথম বাটকায় দুজনকে প্রায় ছুঁড়ে ফেলে দিয়েছিল। কিন্তু একটু পরে তারা বাসুকে মাটিতে পেড়ে ফেলল। রুমাল দিয়ে পিছমোড়া করে বাঁধল তার হাত।

একটা টর্চের আলো ছুটে আসছে। পিল্লাই এবং মামাবাবু। বাসুকে টেনে তুলে দাঁড় করানো হল। আলো পড়ল বাসুর মুখে। এ কি!

মিঃ বাসুর নিখুঁত সাহেবী মূর্তি এখন বিপর্যস্ত। নেই তার চশমা। বোতাম ছিঁড়ে কোর্ট আলগা। টুপিহীন মাথার চুল এলোমেলো। সে জ্ঞান অবাক হয়নি কেউ। কিন্তু তার পুরু গোঁফের এক অংশ খুলে বুলে পড়েছে কেন? এ যে নকল গোঁফ। আর মুখের শ্যামলকান্তির

জায়গায় জায়গায় চুট্টা উঠে নিচের চামড়ার ফরসা রং বেরিয়ে পড়ে
অদ্ভুত দেখাচ্ছে! সবাই স্তম্ভিত নয়নে দেখল, মিঃ বাসুর ছদ্মবেশ
ভেদ করে যেন পরিচিত কারো আদল ফুটে উঠছে।

কুনাল এগিয়ে এল। তার কপাল কেটে রক্ত গড়াচ্ছে। কিন্তু
বিষমুত্র অক্ষিপ নেই।

‘মেকআপখানা খোল তো চাঁছ’—বলতে বলতে সে হাত বাড়িয়ে
এক টানে ছিঁড়ে নিল বাসু সাহেবের বাকি গৌফ। যন্ত্রণায় কুঁচকে
উঠল বাসুর মুখ।

‘একি! এ যে বন্ধিম হাজরা!!’

‘বন্ধিমবাবু আপনি! ইউ স্কাউন্ড্রেল,’ মামাবাবু গর্জন করে
ওঠেন। তিনি মিঃ বাসু ওরফে বন্ধিমবাবুর চুলে হাত দিয়ে পরীক্ষা
করে বললেন, ‘কালো রং মেখেছে। কিন্তু সামনের দাঁত ছুটো উঁচু
করল কি করে? দেখি। হুঁ, ফলস্ টুথ। প্লাস্টিকের দাঁত বসিয়েছে
আসল দাঁতের ওপর।’

অসিত হাঁ হয়ে থেকে বলল, ‘হাঁটা-চলা পালটে ফেলেছিল
কেমন! এমন কি গলার স্বর অবধি। বাসুরে!’

‘আমায় নিয়ে কি করতে চান?’ বললেন বন্ধিম হাজরা।
সাংঘাতিক নার্ভ বটে লোকটার। এখনো দমে নি। তবে ভক্ত
বন্ধিমের গদগদ বিনয়ের মুখোশ খসে পড়েছে। মারমুখি
তেরিয়া ভাব।

‘অ্যারেস্ট।’ এতক্ষণে কথা বললেন মিঃ পিল্লাই। তিনি খানিক
দূরে স্থির হয়ে দাঁড়িয়ে টর্চের আলো ফোকাস করে রেখেছিলেন
বন্ধিমবাবুর ওপর।

প্রশ্ন হল, ‘কেন?’

পিল্লাই উত্তর দিলেন, ‘এক নম্বর চার্জ তপনবাবুর ওপর
অত্যাচার। দু-নম্বর—তার ভাইকে অপহরণ। তিন নম্বর—দেশের
ক্ষতিকারক অন্তর্ঘাতমূলক কার্যকলাপ।’

‘ননসেন্স ! আপনার তৃতীয় অভিযোগের কোনো প্রমাণ নেই।’
‘আছে। তপনবাবু তার সাক্ষী। এবং দ্বিতীয় সাক্ষী আমি।
কি, চিনতে পারেন?’

পিল্লাই চর্চের আলো ঘুরিয়ে নিজের মুখে ফেললেন।

ভুত দেখার মতো আঁতকে উঠল বঙ্কিম হাজারা, ‘এঁয়া, মিস্টার
কার্পেন্টার!’

‘সরি। আমি ভারত কেমিক্যালস-এর ডিরেকটর কার্পেন্টার
নই। আমি ইন্টেলিজেন্স ব্রাঞ্চার স্পেশাল অফিসার নারায়ণ
পিল্লাই। ডিউটির খাতিরে মিঃ কার্পেন্টারের ভূমিকায় অভিনয় করতে
হয়েছিল। আপনাকে দুঃখের সঙ্গে জানাচ্ছি, প্রিন্স হোটেলের কুড়ি
নম্বর ঘরে কার্পেন্টারের সঙ্গে আপনার সমস্ত গোপন কথাবার্তা, ষড়যন্ত্র,
টেপ-রেকর্ডে ধরা আছে। রেকর্ডটা লুকনো ছিল সোফার নিচে।’

বঙ্কিম হাজারার চোখে মুখে এবার সত্যিকার ভয়ের ছাপ
দেখা গেল।

সুন্দর অসিত ছুটল তপনকে আনতে।

বঙ্কিমবাবুকে দেখে আহত শ্রান্ত তপন হতভম্ব—। ‘একি, মিঃ
বাসু ! না না, এ যে বঙ্কিমবাবু!’

মামাবাবু বললেন, ‘তুমি চেন একে?’

‘চিনি। তবে আলাপ নেই। স্মার, মানে ডঃ তালুকদারের
কাছে আসতেন মাঝে মাঝে, দেখেছি। কিন্তু উনি?’

‘হ্যাঁ, মিঃ বাসুই ছদ্মবেশী বঙ্কিম হাজারা।’ উত্তর দিলেন
মামাবাবু।

সবার মনেই উদগ্র কৌতূহল, কি করে তপন এই লোকটির
খপ্পরে পড়ল। কিন্তু তখন আর এ প্রশ্নের জবাব পাবার সুযোগ
ছিল না।

বাড়ি সার্চ করা হল। একটি উল্লেখযোগ্য জিনিস আবিষ্কার
হল—একটা ছোট ল্যাবরেটরি।

মামাবাবু কুনালের পিঠ চাপড়ে দিয়ে বললেন, 'সাবাস কুনাল। খুব সময়ে আটকেছ বাবুকে। একবার নাগালের বাইরে ফসকে গেলে বাবু সাহেব নির্ধাৎ চিরকালের মতো অদৃশ্য হতো। অর্থাৎ সে খোলস ছেড়ে বন্ধিম হাজারা বনে যেত। আর এই অপরাধে বন্ধিম হাজারার যোগ আছে সন্দেহ করলেও তাকে শাস্তি দেবার মতো প্রমাণ আমাদের হাতে ছিল না। আর ওই যে স্বয়ং মিঃ বাবু এ কার মাথায় আসবে?'

প্রফেসর নবগোপাল ঘোষ অর্থাৎ মামাবাবুর বালিগঞ্জের বাড়ির বৈঠকখানা।

একে একে সেখানে হাজির হল অনেকে—অসিত, কুনাল, সুন্দর ডানপিটে বন্ধু মিন্টু, মিত্র কেমিক্যালস-এর সেলসম্যান হরিধন এবং সব শেষে এলেন আই. বি. ইন্সপেকটর মিঃ নারায়ণ পিল্লাই, সঙ্গে তপন দত্ত। মামাবাবু ও সুন্দর তো উপস্থিত রয়েছেনই।

ব্যারাকপুরে বাগান বাড়িতে মিঃ বাবু ওরফে বন্ধিম হাজারা ধরা পড়ার দু-দিন পরে এক বিকেলে এই জমায়েত। ইতিমধ্যে তপন ছিল পিল্লাইয়ের হেফাজতে। পুলিশ তাকে জেরা করেছে, নানা জায়গায় নিয়ে ঘুরেছে। ফলে তার সঙ্গে সুন্দর অসিত ইত্যাদির সাক্ষাতের সুযোগ হয় নি। এই জটিল রহস্যের বহু প্রশ্নই তাই এখনো তাদের অজানা। শুধু একটি সুসংবাদ জানতে পেরেছে—তপনের বন্দী ছোট ভাই বিমানকে অক্ষত দেহে উদ্ধার করেছে পুলিশ।

অতিথিদের জন্ম চা এবং কিঞ্চিৎ 'টা' সরবরাহ হল।

গরম চায়ে চুমুক দিয়ে মামাবাবু বললেন, 'প্রথমে শোনা যাক তপনের কথা। কি করে সে মিঃ বাবু, মানে বন্ধিম হাজারার পাল্লায় পড়ল! বল তপন'—

তপন বলতে শুরু করল।

‘প্রায় চার বছর আগে ডঃ তালুকদার যখন হঠাৎ মারা গেলেন বিদেশে, চোখে অন্ধকার দেখলাম। আবার নিঃসহায় হয়ে পড়লাম। ডঃ তালুকদারের কাছে কাজ পেয়ে বর্তে গিয়েছিলাম। তার আগে বেশ কয়েক বছর আমার বড় করণ অবস্থায় কেটেছিল। ইউনিভার্সিটির ডিগ্রি নেই। নেই সহায় সম্বল। বাবা মারা গেছেন। সংসারের পুরো দায়িত্ব আমার কাঁধে। প্রাণপণে চাকরির চেষ্টায় ঘুরেছি। কখনো জুটেছে কিছু। কখনো বেকার। ডঃ তালুকদারের সঙ্গে আলাপ হয় শিল্প মেলায়। অতি মহৎ ব্যক্তি। আমার ছুঃখের কাহিনী শুনে সঙ্গে সঙ্গে একটা চাকরি জুটিয়ে দিলেন। কোনো প্রতিষ্ঠান বা সরকারী অফিসে নয়। তেমন কিছু তাঁর হাতে ছিল না। ওঁর নিজস্ব রিসার্চ অ্যাসিস্ট্যান্ট করে নিলেন। ওনার বাড়িতে একটা ল্যাবরেটরি ছিল—সেখানে কাজ।

‘শুধু যে খেয়ে বাঁচলাম তাই নয়। আরও বড় উপকার হল—আমি নিজেকে আবিষ্কার করলাম। কাজটা ভালবেসে ডুবে গেলাম ওই রিসার্চে।

‘কি নিয়ে রিসার্চ?’ জানতে চাইল কুনাল।

‘মানুষের প্রয়োজনীয় ফল-মূল শস্যের রোগ অর্থাৎ উৎপাদন নষ্টের কারণ যে সব পোকা-মাকড়, ব্যাকটেরিয়া, ফাংগাস, ভাইরাস তাদের নিয়ে ছিল তাঁর গবেষণা। শুধু আমাদের দেশের চেনা-শোনা ফসল-রোগ নিয়ে মাথা ঘামানো নয়, আরও সুদূরপ্রসারী ছিল তাঁর চিন্তা। যে সব ফসল-রোগ আমাদের দেশে সম্পূর্ণ অজানা বা সামান্য দেখা গেছে তাদের নিয়েও স্টাডি করতেন। উদ্দেশ্য ছিল—ভবিষ্যতে ওই সব রোগ যদি এখানে ছড়ায় তখন তাদের রোধ করা।’

‘গমের নেতানো রোগ এদেশে এল কোথেকে?’ জিজ্ঞেস করলেন মামাবাবু।

‘দক্ষিণ আমেরিকা। দেখা গেছে, ফসলের শত্রু কোনো কোনো কীট, জীবাণু, ছত্রাক ইত্যাদি এক দেশ থেকে অন্য দেশে

গিয়ে পরিবেশ বদলের ফলে ভয়ংকর রূপ নিতে পারে। গমের নেতানো রোগের জীবাণু দক্ষিণ আমেরিকায় গমের অল্পস্বল্প ক্ষতি করে কিন্তু ভারতের আবহাওয়ায় কি ভয়ংকর হয়ে উঠেছে।

‘এ জীবাণু আনল কে?’ বললেন মামাবাবু।

‘স্মার। মানে ডঃ তালুকদার! গবেষণার উদ্দেশ্যে নিয়ে আসেন।’

‘আচ্ছা, ধানের রাফুসে পোকাকার ব্যাপারটা কি?’ ফের প্রশ্ন করলেন মামাবাবু।

‘এও স্মারের এক আশ্চর্য রিসার্চের ফল। আপনারা হয়তো জানেন, ফসল-রোগ ঠেকাতে কয়েকটি রাসায়নিক বস্তু ক্রমাগত ব্যবহার করতে করতে এমন অবস্থায় পৌঁছয় যখন রোগের কারণ পোকা-মাকড় বা জীবাণু ইত্যাদি দমন করতে ওই সব ওষুধে আর কাজ দেয় না। কারণ তাদের শরীরে ওই ওষুধকে প্রতিরোধ করার ক্ষমতা গড়ে ওঠে। তখন অথ রাসায়নিক বা আর কোনো উপায় খুঁজতে হয়। ডঃ তালুকদার এই লাইনেও গবেষণা করতেন। উনি রাফুসে পোকা ল্যাবরেটরিতে কি ভাবে লালন করেছিলেন যে তাদের শরীরে গুটি কীটনাশকগুলির বিরুদ্ধে প্রতিরোধ শক্তি তৈরি হয়েছিল। তারপর ফের তাদের দমন করার জন্তু তিনি ওষুধ তৈরী করার চেষ্টা করেছিলেন। অনেকখানি এগিয়েছিল রিসার্চ। আমি তা শেষ করি।’

‘অতি বিপদজনক গবেষণা। এ সব স্পেসিমেন কোনোক্রমে বাইরে ছড়িয়ে পড়লে দেশের উৎপাদনে মহামারী ঘটতে পারে।’

—‘হ্যাঁ, তাই তিনি এই ধরনের রিসার্চ বা একস্‌পেরিমেন্ট করতেন খুব গোপনে। নিজের বাড়ির ল্যাবরেটরিতে। ডঃ তালুকদারের এই গবেষণায় আমি ছিলাম তাঁর সহকারী। ক্রমে স্বাধীন গবেষণা করার মতো খানিক বিদ্যে-বুদ্ধিও আমার হয়েছিল। স্মার আমায় উৎসাহ দিতেন। কাজ শেখাতেন। এ বিষয়ে বই দিতেন পড়তে।’

তপন চোখ বন্ধ করে অল্পক্ষণ চুপ করে রইল। বুঝি পরম শ্রদ্ধেয় সেই পরলোকগত বিজ্ঞানীর স্মৃতিচারণ করল। তারপর আবার বলল—

‘প্রায় ছ’মাস বেকার হয়ে ছিলাম। নিজের দুঃখের চেয়ে মা-ভাই-বোনের কষ্টটাই যেন পাগল করে তুলেছিল। সেই সময় মিঃ বাসুর সঙ্গে আলাপ হল। মানিকতলায় একটা বস্তির খুপরি ঘরে থাকতাম। আমার পাশে থাকত এক রাজমিস্ত্রি। বাসু সেই মিস্ত্রির খোঁজে এলেন এক ছপুরে। মিস্ত্রি নেই, কাজে বেরিয়েছে। বাসু আমাকে ডেকে অনুরোধ করলেন মিস্ত্রিকে ক’টা কথা বলে দিতে। বাসু, এই সূত্র ধরেই ভাব করে ফেললেন আমার সঙ্গে। এখন বুঝি উনি ওই মতলব নিয়েই এসেছিলেন। মিস্ত্রির খোঁজ করতে আসা শ্রেফ ছুতো।

‘যাহোক মিঃ বাসু আমাকে সাহায্য করতে চাইলেন। আমি যদি একটা নার্সারি করি তাহলে জমি ও বাড়ি দেবেন, এবং ব্যবসার প্রয়োজনীয় টাকা—ধার হিসেবে।’

‘নার্সারি সম্বন্ধে তুই কিছু জানতিস?’ সুন্দর প্রশ্ন।

‘কিছু না। কিন্তু আমি তখন মরিয়া। নার্সারির ব্যাপার, তাই সহ। আগের কোনো অভিজ্ঞতা ছিল না বটে, তবে ফুল-ফল গাছের যত্ন ও তত্ত্বাবধান শিখছিলাম স্ত্রীর কাছে। মস্ত বাগান ছিল তাঁর।’

—‘আর একটা লোভ দেখিয়েছিলেন বাসু। তাই না?’ মুচকি হেসে বললেন পিল্লাই।

—‘হ্যাঁ। অতি লোভনীয় প্রস্তাব।—বলেছিলেন ইচ্ছে হলে, নার্সারিতে ল্যাবরেটরি তৈরি করে আমি নিজে রিসার্চ করতে পারি। ডঃ তালুকদারের অসমাপ্ত গবেষণা চালিয়ে যেতে পারি। ডঃ তালুকদারের অনেকগুলি গবেষণা অর্ধসমাপ্ত বা প্রায় সমাপ্ত অবস্থায় ছিল। ল্যাবরেটরি বান্ধাবার খরচও ধার দেবেন মিঃ বাসু। তখন অবশ্য বুঝেছিলাম, ডঃ তালুকদারের গবেষণার মূল্য বাসু জানেন।’

‘কেন ডঃ তালুকদারের ল্যাবরেটরির কি হল?’ জানতে চাইলেন মামাবাবু।

‘বন্ধ হয়ে গিছিল। ওঁর একমাত্র ছেলে থাকত দিল্লিতে। বিজ্ঞানের ধার ধারে না। সে ল্যাবরেটরির দামী যন্ত্রপাতি বিক্রি করে বাকি জিনিস বিলিয়ে দিতে চাইল। আমায় বলল—যা ইচ্ছে হয় নিয়ে যাও। এমন কি বাবার গবেষণা সংক্রান্ত নোটসও দিয়ে দিল আমায়। আসলে সে যত তাড়াতাড়ি পারে বাড়িটা খালি করে ভাড়া দিতে চাইছিল। আমি মহা খুশি। আমার ভবিষ্যত গবেষণার সমস্ত উপকরণ নিয়ে এসে রেখেছিলাম সেই বস্তির কুঠুরিতে। তবে দিনে দিনে ভয় হচ্ছিল, হয়তো এগুলি আমার আর কাজে লাগবে না। ল্যাবরেটরিতে গবেষণার সুযোগ আমি আর পাব না। এক একবার ভাবতাম নষ্ট করার চেয়ে এসব বরং দিই অথ্য কোনো গবেষককে। তাই বাসুর প্রস্তাব লুফে নিলাম। তাঁর কাছে ধার নিয়ে ল্যাবরেটরি খাড়া করে ফেললাম নার্সারিতে। ফসলের ওপর পরীক্ষা-নিরীক্ষার মতো জমিও পেলাম খানিকটা।’

‘বন্ধিম হাজরা কি প্রথম থেকেই তোমার রিসার্চ সম্বন্ধে আগ্রহ দেখিয়েছিল?’ জিজ্ঞেস করলেন মামাবাবু।

‘না। প্রথম দু-তিন মাস তিনি এ-বিষয়ে কোনো ইনটারেস্টই দেখাননি। তারপর খোঁজ নেন।’

‘ক্রমে ওর কাছে আমার ধার আরও বাড়ল। আমার ছোটভাই মরণাপন্ন হল। শীগগিরি হার্ট অপারেশন করতে বললেন ডাক্তার। প্রচুর খরচ। মিঃ বাসু তৎক্ষণাৎ পাঁচ হাজার টাকা দিলেন। এরপর আমায় আরও পাঁচ হাজার ধার দিলেন একরকম গায়ে পড়ে—আমার বোনের বিয়ের খরচের জন্ত। আমি তো মুগ্ধ। বললাম—কি করে যে শোধ দেব জানি না। তিনি বলেছিলেন—কেন, তোমার গবেষণা আছে। তাঁর কথার তাৎপর্য সেদিন ধরতে পারি নি।’

‘ছ-সাত মাস পরে তিনি নিজ মূর্তি ধরলেন। অর্ডার দিলেন।

ধানের রাফুসে পোকাকীট চাই। কালচার করে প্রচুর পরিমাণে স্পেসিমেন দিতে হবে। এবং এই রোগ দমন করার কীটনাশক ওষুধের ফরমুলা—যা আমি আবিষ্কার করেছি। এ বিষয়ে সমস্ত গবেষণাগত তথ্য সুদ্ধ। উৎসাহ ও কৃতজ্ঞতাবোধে আমার রিসার্চ সম্পর্কে ইতিমধ্যে অনেক কিছু বলে ফেলেছিলাম বাস্তুকে।’

‘ওনার দাবি শুনে আশ্চর্য হয়ে জিজ্ঞেস করেছিলাম—কেন? এ নিয়ে কি করবেন আপনি? উত্তরে বললেন—আমিও এ বিষয়ে একটু কাজ করতে চাই।’

‘খুব বিশ্বাস হয়নি তাঁর কথা। কারণ মোটামুটি বিজ্ঞান জ্ঞানের বুঝলেও এত ছুরক গবেষণা করার যোগ্যতা ওঁর আছে কিনা আমার সন্দেহ ছিল। ভেবেছিলাম, হয়তো আমার রিসার্চ উনি নিজের নামে ছাপিয়ে নাম কিনতে চান। অথবা ভবিষ্যতে ভারতে এই পোকাকীট উপদ্রব বাড়লে ওই কীটনাশকের ফরমুলা গোপনে বিক্রি করে পয়সা কামাবার তালে আছেন।’

‘তবু দিলি?’ রেগে বলল অসিত।

‘কি করব? আমি তখন নিরুপায়। বাস্তুর কাছে দেনায় মাথার চুল পর্যন্ত বিকিয়ে আছে। তাই হুকুম তালিম করতে বাধ্য হলাম। মনে হল, এইভাবে যদি আমার ঋণ শোধ হয় হোক।’

‘কিছুদিন পরে তিনি গমের নেতানো রোগের জীবাণু চাইলেন। এবং তার প্রতিরোধক ওষুধের ফরমুলা। শুধু যে শস্য রোগের বীজ এবং তাদের ওষুধ তৈরির ফরমুলা নিলেন তাই নয়। কি করে ওই সব রোগ সৃষ্টিকারী পোকা জীবাণু ইত্যাদির ল্যাবরেটরিতে কালচার করে বংশ বৃদ্ধি ঘটানো হয় সে পদ্ধতিও আমার কাছে শিখে নিলেন বাস্তু। আবার মাঝে মাঝে এসে যে গবেষণাপত্র নিয়েছিলেন সে বিষয়ে অনেক প্রশ্ন করতে লাগলেন আমাকে এবং আমার রিসার্চ সম্পর্কে কাউকে কিছু বলতে একদম নিষেধ করে দিলেন।’

‘নানান প্রশ্ন দেখা দিল মনে। তবু ঠিক বুঝে উঠতে পারলাম

না ওঁর আসল উদ্দেশ্য কি ? বাইরের খবরাখবর তো প্রায় রাখতামই না। মাসান্তে একবার বাড়ি যেতাম। দু-একদিন থাকতাম বড় জোর। এদেশের কৃষি পত্রিকাগুলো আসত বাস্তু মারফৎ। আমার সন্দেহ জাগতে পারে এমন খবর থাকলে নিশ্চয় উনি সে সব সংখ্যা চেপে গিয়েছেন।’

‘তুমি প্রথম হাজারা আই মিন বাস্তুকে সন্দেহ করলে কখন ?’
মামাবাবু জিজ্ঞেস করলেন।

‘যখন সুন্দর আর অসিত এল নার্সারিতে। ওদের কথা শুনে আমার চোখ ফুটল। বুঝতে পারলাম, কি জঘন্য ষড়যন্ত্র করছেন মিঃ বাস্তু, আমারই আবিষ্কারকে হাতিয়ার বানিয়ে। কারণ বাস্তু আমার কাছ থেকে রান্নাসে পোকা নিয়ে যাওয়ার পরই এর উপজব দেখা দেয়। তাছাড়া গমের নেতানো রোগ এ দেশে এল কি করে ?’

‘বুঝতে পারলাম, আমারই কালচার করা ফসলের শত্রু, কীট জীবাণু বাস্তু ছড়িয়ে দিচ্ছেন ক্ষেতে। ফসল নষ্ট হতে শুরু করলে তখন বিক্রি করছেন প্রতিরোধের ওষুধ। কিন্তু রোগ আটকাবার আগেই যে প্রচুর ফসল নষ্ট হয়। দেশের কত বড় ক্ষতি। ঠিক করলাম, এই সব ভয়ংকর ধ্বংসের বীজ আমি আর কিছুতেই বাস্তুর হাতে তুলে দেব না।’

—‘বাকিটুকু আমি বলি। আপনি রেস্ট নিন তপনবাবু।’
বললেন মিঃ পিল্লাই। ‘বাস্তু আবার চাইতে এলেন ধানের ক্ষতিকারক একজাতের ছত্রাক এবং আলুর পক্ষে মারাত্মক একরকম ভাইরাস। তপনবাবু দিতে অস্বীকার করলেন। তখন ভীষণ চাপ দিতে লাগলেন। প্রথমে দেখালেন লোভ। কাজ না হতে আরম্ভ হল অত্যাচার। তাইতো ?’

ক্লান্ত ভাবে মাথা নাড়ে তপন।

‘ইস, সেদিন আমি থাকলে—লোকটাকে এমন উত্তম-মধ্যম—তোরা কিস্তি কাজের নস!’ মিস্ট্রু দীর্ঘশ্বাস ফেলল আফসোসে। ‘কি

করব ? মামাবাবুরা এসে পড়লেন যে । তা নইলে—সাক্ষী গাইল
সুনন্দ ।

‘তোমাকে বাগান বাড়িতে নিয়ে গিয়েছিল কেন ?’ কুনাল
জিজ্ঞেস করল তপনকে ।

‘হুজন পুরনো বন্ধুর সঙ্গে হঠাৎ আমার দেখা হয়েছে জানতে
পেরে । নিশ্চয় মালীদের কাছে শুনেছিলেন । তখন আমায় নার্সারি
থেকে সরিয়ে আনেন । তবে বন্ধুদের সঠিক পরিচয় আমি বলিনি ।’

‘আমি কিন্তু সত্যি সত্যি গুঁর ঋণ শোধ করতে চেয়েছিলাম ।
কিন্তু এই উপায়ে ? নাঃ অসম্ভব ।’

‘তোর ঋণ শোধ হয়ে গেছে ।’ বলে উঠল সুনন্দ ।

‘কি করে ?’ তপন অবাক ।

‘তোর তৈরি ফরমুলা বেচে উনি পাক্সা বিশ হাজার টাকা
কামিয়েছেন ।’

‘তাই নাকি ?’ তপন যেন স্বস্তির নিঃশ্বাস ফেলল ।

‘আচ্ছা পুলিশ, মানে মিঃ পিল্লাই ব্যাপারটা জানলেন কি করে ?’
প্রশ্ন করল অসিত ।

‘আমি জানিয়েছি,’ বললেন মামাবাবু । ‘যখন তিন-তিনটে
সাসপেক্ট বেপাভা হয়ে গেল তখন আমার পরিচিত এক পুলিশ
কমিশনারকে বললাম সমস্ত ঘটনা । তিনি মিঃ পিল্লাইকে কেসটা
তদন্ত করার ভার দিলেন । আমরা পরামর্শ করে কলকাতা
বোমবাইয়ের যত নামকরা ওষুধ কোম্পানিকে জানিয়ে রাখি, কেউ
গমের নেতানো রোগ দমনের ওষুধের ফরমুলা বিক্রি করতে চাইলে
যেন তৎক্ষণাৎ পিল্লাইকে খবর দেওয়া হয় । কয়েক দিনের মধ্যেই
বাসুর প্রস্তাব এল ভারত কেমিক্যালস-এর কাছে । মিঃ পিল্লাই ওই
কোম্পানির ম্যানেজিং ডিরেকটর সঙ্গে বাসুর সঙ্গে দেখা করলেন ।
আচ্ছা মিঃ পিল্লাই বন্ধি হাজার অতীত ইতিহাস কিছু জানতে
পারলেন ?’

‘পেরেছি কিছু কিছু।’ বললেন পিল্লাই। ‘লোকটা শিক্ষিত।
 সায়াস গ্র্যাজুয়েট। এক কালে শখের থিয়েটারে অ্যাকটিং করে
 বেশ নাম করেছিল। নানা রকম ব্যবসা করত। বছর দশ আগে
 এক নামকরা কোম্পানির ফাউন্টেন পেনের কালি জাল করার
 ব্যাপারে সন্দেহ করে পুলিশ ওকে ধরেছিল। কিন্তু প্রমাণের অভাবে
 খালাস পেয়ে যায়। বছর পাঁচেক আগে বোম্বেতে স্বাগলিং শুরু
 করে। ছদ্মবেশে এবং ছদ্মনামে। তারপর একটা খুনের কেসে পুলিশ
 ওর পিছু নিতেই বেমানুম উবে যায়। আর তার পাত্তাই পাওয়া
 যায় নি। তবে পুলিশ রেকর্ডে স্বাগলার শাহাজাদার ফিংগার প্রিন্ট
 আছে। বন্ধিম হাজারার আঙ্গুলের ছাপের সঙ্গে তা মিলে গেছে।
 সে মামলাও এবার ওর ঘাড়ে চাপবে।’

‘লোকটা অসাধারণ চতুর।’ বললেন মামাবাবু। ‘আমার ধারণা
 ও প্রথম দিকে নিজে হাতেই লুকিয়ে লুকিয়ে ধান আর গমের রোগের
 বিষ ছড়িয়েছে ক্ষেতে। কিন্তু স্মার ডেভিডের বোর্নিও অ্যাডভেঞ্চার
 শোনার পরে যাযাবর পাখির মাধ্যমে ব্যাকটেরিয়া ছড়ানোর আইডিয়া
 ওর মাথায় আসে। কারণ তারপরেই ও আমার কাছ থেকে
 মাইগ্রিটরি বার্ড সম্বন্ধে কয়েকটা বই নিয়েছিল। আর আমাদের
 সঙ্গে ধরার হেতু, নিরীহ পক্ষিবিদদের দলে ঘুরলে কেউ ওর মতলব
 টের পাবে না।’

‘রাইট।’ সায় দিলেন মিঃ পিল্লাই। তিনি উঠে দাঁড়িয়ে
 বললেন, এমন এক ধূর্ত ক্রিমিনালকে গ্রেকতার করতে সাহায্য করার
 জন্য পুলিশ ডিপার্টমেন্টের পক্ষ থেকে আমি আপনাদের আন্তরিক
 ধন্যবাদ জানাচ্ছি।

সবাই খুশিতে ভরপুর। সবার মুখে হাসি। শুধু তপন
 কেমন বিমর্ষ।

সুনন্দ অসিত কুনালের চোখেচোখে কি জানি ইশারা
 খেলে গেল।

সুনন্দ বলল, 'তপন এবার কি করবি? সুরভি নার্সারিতে গণেশ গুলটাল।'

'হুঁ, ভবিষি তাই।' স্নান হাसे তপন। 'আমার কপালই খারাপ।'

কুনাল উঠে গিয়ে বসল তপনের পাশে। বলল—'ভাই তপন, তুমি তো শুনেছ আমার একটা ছোট ফার্ম আছে। ফসল রোগের কীট বা জীবাণুনাশক ওষুধও তৈরি করি। আমার কারখানার ল্যাবরেটরিতে যদি তোমায় চীফ কেমিস্টের পোস্ট দিই, নেবে? তোমার প্রতিভার যোগ্য মূল্য দেবার ক্ষমতা আমার নেই। তবু যথাসাধ্য দেব।'

সুনন্দ ফট করে চোঁচিয়ে উঠল—'খবরদার তপন। নিস্নে ও চাকরি। কুনালটা মহা ধড়িবাজ। তাকে বেকায়দায় পেয়ে ঠকাচ্ছে। সম্ভায় সারছে। আরে তোর টাকার ভাবনা কি? স্বয়ং ভারত কেমিক্যালস-এর ম্যানেজিং ডিরেকটর মিঃ কার্পেন্টার এখানে হাজির। ওঁর অফারটা শুনেছিস। ছু-লাখ তো তোর হাতের মুঠোয়।'

হো হো করে হেসে উঠলেন পিল্লাই। হেসে উঠল অগ্রা। তপন পরম কৃতজ্ঞভাবে—কুনালের ডান হাতখানি জড়িয়ে ধরল নিজের হাতে। অতিরিক্ত উচ্ছ্বাসের আবেগে মুখে তার কথা সরল না। তবে আনন্দ উজ্জ্বল চোখে মাথা হেলিয়ে সম্মতি জানাল কুনালের প্রস্তাবে।

শেষ

boirboi.net